

Lumingu Lwà Makùmi

Mwandamutekètè Lwà Danyèlè



Twasàkidila, wa manza tètè, Mwaneetu Neville. Mwoyi wènu awu, balunda bàanyi. Ndyèsè bwa kwikalakù baalùkile cyàkàbìdì mu tabernacle emu mu dinda emu, bwa kutungunuka ne Dyiisha dinene edi ditùdi tuditàcisha bwa kuumvwija, *Lumingu Lwà Makùmi Mwandamutekètè Lwà Danyèlè* elu. Ne tudi ne disànkà dya kumòna mùdi bààbúngì menemene basangile mu ditùkù edi dya luuyà lukolè, kadi nansha nanku tudi tulòmba luse bwa mutùdi katùyikù ne cibambalu ciikàle ne myaba ya disòmba. Kumòna bantu bapàte patapata mushindu awu ne biimàne mu nyungulukilu mwònsò, s'bidì byènza bibì be. Ne kanùyì bacyankàme mùvwàbì bìkèngela to, bidì byènza ne mbikolè bwa nwènu kuumvwa. Kadi netwènzè cyònsò citùdiku pèètù mwa kwenza aci bwa kuyabi lùkàsà.

² Nenku—nenku, leelu, ndi ntèkemena ne nenwikalè, mèmè munègekù ndambu, nenùmfwilekù luse, bwalu edi ndìbà dya kupoopela musonso pa Dyiisha edi, dìbà mene dya kudìpoopela musonso. Tudi baditèèke mu bitùpà bisatu bwa twamònakù mwa kwikala batwishìibwe bwa kuwùmvwà.

³ Mpindyewu, mu bushuwa bwa bwalu, di—disangisha didì òmwèka ne mèsù ndimanye ne òwò aa, anyì òwò Mayiisha aa, àdi àkwàciibwa pa mikàbà ya mèyi. Ne àdi àtùmiibwa pa buloba bujimà. Pàmwè ne ditùngà ne ditùngà dyònsò didì dipeta mikàbà ya mèyi eyi pa buloba bujimà. Nenku ndi muswe kwambila batèèlejì bàà mikàbà ya mèyi bwalu ebu ne, mwaba wònsò wunùdi nusanganyibwa, nì mmu citùpà kaayì cya buloba cinùdi nusanganyibwa, kùdi mwa kwikala bìngà bintu mwòmò emu binùdi bafwànyine kubènga kungiitaba pa malongesha àndì mèmè—mèmè mfilà. Kadi ndi muswe kwamba, nwènu bàna beetu, ne pàmwàpa, wèwè mwa kucyùmvwija mu mushindu wùdi wèwè ucimòna awu, ncifwànyine kushìilangana ne cìndì mèmè mufwànyine kwitabuuja. Kadi, ndi mufwànyine kwikala ne disànkà dya kutèèleja cyùdi muswe kwamba aci.

⁴ Ne mmu meeji a ne ndi ntwàla Mayiisha aa, bifùmìne ku... Dìyi dya Nzambi, mu mwoyi wànyì. Mbwa diibaka dya Ekeleeziya, bwa Ekeleeziya mujimà, Ekeleeziya wa buloba bujimà; Ekeleeziya wa Kilisto, wa buloba bujimà. Ne ndi cya bushuwa ngiitabuuja ne tudi mu dituku dya ndekeelu. Ne didyènzeja dyanyì bwa kuumvwija cyòci eci, kadi ncìyi nteeta bwa kucyènza, kucisàka, bwa ciikalè mushindu kampànda anyì kansanga to. Kacya ncitukù mwanjì kwambula dipiila bwa ku dyànyì dimanya, dya kwenza nanku to.

5 Misangu yàbúngì bantu bàtu bùmvwila pa mikàbà ya mēyi, kadi bàmba ne: “Ee, mēmè ndi mubèngangane ne aci. Yèyè kènà anu mumanye dilongesha dyèndè to, kí mmumanye Mifùndù to.” Ee, aci, cidi mwa kwikala cyònsò anu cilelèlè. Nwamònu anyi? Mēmè ncyèna mufwànyine kwamba ne kí ncilelèlè to.

Kadi, bwànyì mēmè, ndi—ndi nCìlonga, nciyikù ngangata mēyi. . . Ntu mbala bìdì bantu bakwabo bàmba, ne ntu mbàanyisha. Cyònsò cidi ní nganyì ní nganyì yònsò wàmba aci, mēmè ndi ncyànyisha. Kadi díbà adi—díbà adi ndi nya naaci kùdì Nzambi, ne nshààla naaci too ne pàndì mwa kucyùmvwija, kubangila anu ku Genese too ne ku Bwàkabuulwibwà, ne pashìishe mmòna cyònsò ciswikakana mu Bible. Ne díbà adi ndi—ndi mmanya ne cidi mwaba kampànda pabwìpì ne kwikala cilelèlè. Nenku, mu bushuwa bwa bwalu, mwaba wùdì wèwè mubingè awu, ki mwaba umwèpelè wùndì mēmè mupàtùke mu—mu njila. Ne pàmwàpa mwaba wùdì wèwè mupiile awu, anyi mubingè, ki wùndì mēmè mupàtùke mu njila, eci anyi eci.

6 Pa nanku, tudi tunwànyisha nwènù bònsò bantu balenga bàdì mu batèèleji kaaba aka aba, mu dinda emu, ne nwènù bantu balenga bàdì batèèleja mikàbà ya mēyi eyi abu. Nenku twètù. . . Byònsò bìdì byenjiibwe, byònsò bìdì bwa Bukalenge bwa Nzambi. Mēmè ndi ne balunda bààbúngì bàà maalu malenga pa buloba bujimà, bàndì ngaanyisha bikolè bya menemene, ne ndi ngiitabuuja ne nēmpicishè Cyendelele pàmwè naabò. Nenku kí mbifwànyineku kwikala mu mwoyi wànyì bwa kuteeta bwa—bwa kuseeswisha bóbò bantu abu to, nansha bya munyi, kadi bwa kuteeta kwenza ne byònsò byènzekè mu mushindu wà ne ndikù mwa kubàmbulwisha.

7 Ndi ndyùmvwà mwàkadyùmvwà Solòmò pàakasambilàye, ne kwambayè ne, bàmupèèshè lungènyì bwa wàmònakù mwa kulombola cisàmbà cya Nzambi. Ki disambila dyànyì dya meeji matòòke ndyòdì adi.

8 Bakwàcishi bàdì nàànyì kaaba aka aba, mu nyùngulukilu mujimà, ndi mmòna Mwanèètù Mercier, ne—ne Mwanèètù Roy Borders, ne Mwanèètù Neville, ne Billy Paul, mwanàànyì wa balùme. Gene ùdì kaaba aka mwaba kampànda, ne bàna beetu, Teddy, ne bakwabo. Ndi ngaanyisha bantu bònsò bàdì bàlwa bwa kunkwàcishakù aba.

9 Ndi mvùluka kaaba aka anu abidi àdì panshi aa, Mwanèètù Leo, cì—cìkèènà—kumòna cìvwàye mupetè; cilòòtà, mwàkacibiikilàye, dilòòlò kampànda ditwàkatwìlanganà bwa musangu wà kumpàla; bìvwà ne yèyè wàkamòna lusongo lwa cipaapu cinènè cya musàkà, muulu mu mpeepele. Ne mēmè mvwa kuulu aku nyiisha, mwaba kampànda, ki kubàndayè bwa kumòna ne byònsò abi bìvwà cinyì. Nenku pààkabàndàye kumutuu menemene kwa lusongo elu, mòna’s, kwambayè ne, kule menemene mu bukènkè kampànda bwa mmwènekèlu wa

argent, anyi cyenzè bu mwaba wa cibàtàbàtà, mvwa mwimane, nyiisha bantu. Nenku yèyè kukòka ntèmà yànyì, ne mèmè kukènzakana e kutàngila kùdìye. Ki kwambayè ne: “Mmunyì mùdìku mukafikè aku? Mmunyì mùmvwàku mèmè mufwànyine kafika aku?”

¹⁰ Mèmè kwamba ne: “Leo, muntu nansha umwe kèna mwa kulwa apa to. Nzambi ngudi mwa kufikisha muntu apa. Mpindyewu, bùdì naabù kí mbwà kubànda kuneeku nansha. Bùdì naabu mbwà kutùuluka ne kuya kajaadikila bantu panshi pààpa, paanyima pàà wèwè mumanè kucimòna ne, m’Bulelèlà, bwa ne Cyòcì aci m’Bulelèlà.” Leo kutùulukayè panshi, bwa kujaadikilayè bantu.

¹¹ Ciine aci ncyenzèke kùkaadi ntàntà bule kaayi, Mwanèètù Leo? Bidimu byàbùngì’s, kí mmwómò anyi? Bidimu byàbùngì. Kacya anu piine apu, bwa ku dyànyì dimanya, yèyè ùdì ne lulamatu mu kwenza kwa cyòcì aci, ùjaadikila bantu ne mudimu wà bwambi ewu mmufùme kùdì Nzambi. Mpindyewu, nenku ncyèna—ncyèna muswè bwa wùfuminè kùndì mèmè to. Wòwò wùfùmina kùndì, dìbà adi kí mwìmpèku to, bwalu kakwèna cintu cìmpè mu muntu to. Nwamònu anyi? Bìkèngela wùfuminè kùdì Nzambi.

¹² Mpindyewu, pàndì nkènzakana...Makèlèlè awu mu mapingaja, mvwa mulabùlàngàne ku cyanza ne mulunda wanyì, Mwanèètù West. Ncyèna anu mwanjì kumutwishila mèsù to, mu citanda emu; eyowa, nyewu ngààmumònu mpindyewu, mu dinda emu. Ne nwnènù nudi bamanyè ntàntà udi abu bàfùmina mu màshinyì, nkuumukila anu ku—ku Alabama kwàka, mu dyàlumingu, bwa kulwa kaaba aka, bùumukila kule ku Alabama kwaka!

¹³ Mwanèètù Welch Evans, ndi mupange kumumòna mu dyàlumingu dishààle adi. Muntu wàmbì ne yèyè ùvwa kaaba aka leelu ewu. Bantu abu bàdì bèndesha màshinyì kuumukila ku Tifton, mu Géorgie, bwa kwikala kaaba aka. Ne mwanèètù wa balùme udi musòmbe apa ewu, beena dyèndè. Bùngibù’s! Mwanèètù Palmer wa ku Macon, mu Géorgie. Ne ndi mmòna, ngeela meeji, Mwanèètù wa bakàjì Ungren ne bakwabo paanyima pààpa. Bònsò abu mbàà kule ku Memphis kwàka, mu Tennessee. Mpindyewu, nudi nwela meeji ne . . . Ne bakwabo bàà ku mikwabo myaba. Ndi mufùme ku ditwilangana ne inàbànzà kampànda kaaba aka wa ku, ku Caroline du Sud kwaka.

¹⁴ Mpindyewu, nudi nwela meeji ne bantu bàdì apa aba . . . Mvwa nkènzakana, mmòna bàà ku Chicago, ne bàà ku myaba mishiilèshiiàngàne, bèndesha màshinyì ntàntà wa nkàmà ne nkàmà ya kilomèètà, anu bwa kulwa kubwela mu disangisha. Pashiishe, pàdìbo bàfika kaaba aka, mwaba wà kusòmba kawùyikù to. Kakùyikù cibambalu ciikàle ne bifidi bya citaleela; citanda cikùlákàjì mwikàle luuyà lukolè, bwa kwimanamù,

nudikùpula bisùlulùlù. Bàngata mfrangà ya kutèeka naayi byàkudyà ku mèèsà, bwa bàna baabo balela, bwa kulwa apa bwa kutèeleja Mukenji awu. Udi muswe kungambila ne . . . dyàmwàmwa dya musùlù ewu, mwaba kampànda, kakwènakù mwaba wàyàbò, dimwe dya ku matùkù aa anyi? Cya bushuwa, wùdikù. Aci's ki lulamatu's! Bantu abu mbafuci bàà byàdiikùmi. Kì ng'anu ne bàdi bàlwa to, bàdi bàlwa ne byàdiikùmi byabo ne milàmbù yabo, ne bàlwa naabi mu nzubu wa Mukalenge, bàteeta kwenza cidi cijaalàme. Nzambi àbeneshèku mu mushindu mubanji ke cisàmbà cya lulamatu cya mushindu awu! Luse ne ngàsà wa Nzambi bìikalèku naabò.

¹⁵ Nyewu mmòna mulunda wanyi, Charlie Cox, ne aba bàdi bàfùmìne ku sud wa Kentucky kwàka. Ne myaba yònsò nàka, paùdi ukènzakana, udi umòna bantu bàdi bàfùmìne ku myaba mishiilèshiiàngàne.

¹⁶ Nsongààlùmè wa citende udi musòmbe pààpa wàwa, ncyèna mwa kumuvùluka dìnà dyèndè to. Ngàkatwilangana nendè mu Chicago. Kadi udi mufùmìne ku cilongelu kampànda cya Bible kule ne muneemu, mwaba kampànda, kì mmwòmò anyi? [Mwanèètù awu ùdi wàmba ne: "Springfield, Missouri."—Muf.] Springfield, mu Missouri; cilongelu cya Bible cya Assemblée de Dieu. Eyowa. Ee, mbilenga. Nudi numòna's, bàdi bàfùmìna anu myaba yònsò, mu kaèkèleeziya kakese menemene kàà kale emu.

¹⁷ Anji elàayi anu meeji, kùkaadi, bidimu bitwè ku makumi asatu kùngààkatèèkà dibwe dya mu ditumba mu dinda adi, mwawa mwimane mwaba wàwa mu mùsèèsù wa Septième Rue, ntàntà wa nzubu yibidi ne mwaba ewu. Ncivwa nansha mwanji kusèlangana to, ncivwa anu nsongààlùmè wa citende. Ki mèmè kumòna cikèènà-kumòna cya bantu bapàte bafinàkàne munda emu bàfùmìne myaba yònsò. Ne mwawa ne disànkà dyàbùngì, mwimane mu cyambilu. Nunku pôpò apu mpààkangambilàYe ne: "Kadi eci kì n'tabernacle webè to." Ki kunshikikayè mwinshì mwa maulu. Kadi nwènù biine's nudi bamanyè bikwabo bya bwalu abu bìdi bifùnda pa dibeji dya Bible udi mu dibwe dya mu ditumba mwaba wàwa abi.

¹⁸ Ndi ne kusàkidila kwàbùngì bwenu nwènù aba. Ncyèna mwa . . . Aci, cidi anu kakese cyanààna, bwa—bwa kwamba anu ne: "Ee, ndi ne kusàkidila kwàbùngì bwenu nwènù." Kadi ndi nnùsambidila. Ndi nnwítabuujà. Ndi ngiitabuujà malabula enu a kùdi Nzambi. Ncyèna ngeela meeji ne muntu mulùme anyi mukàji mmufwànyine kwendesha màshinyi ntàntà wa nkàmà ne nkàmà ya kilòmèèta bwa kulwa kaaba aka, bwa kuleeja mushindu wà bilàmbà bìdiye muvwàle to. Ncyèna—ncyèna ngeela meeji ne mbafwànyine kwenza nanku nansha. To. Kì mbafwànyine kulwa kaaba aka anu bwa kubàmònabò to. Bàlwalwa kaaba aka bwalu bàdi mu ndòndò wabò ne meeji matòoke bwa lupàndù lwa misùukà yabo. Disambila dyànyì didi ne: "Nzambi ànkwàcishèku, ànkwàcishèku bwa kwikalakù

nansha ne cyàbibìdì cìmwè cya meeji matòòke a mushindu awu, bwa kuteetakù kubàyiisha ne byònsò bìdì mu mwoyi wànyì, ne kwikala mweyèmène kùdì Nzambi.”

19 Diyiisha, nudi numòna’s, mu dinda emu, ndizòla ku cibàsa eku. Cìdì anu bwa kwenza, bwa kuumvwija pàndì ngenda nya apu, bwa kuteetakù kwenza bwa nwamòna mwa kuumvwa bìndì nteeta kwamba abi.

20 Nenu *Mbingu Makùmì Mwandamutekètè Yà Danyèlè* eyi yìvwa ndilonga dinene, matùkù abidi a mundaamuunyà ne abidi a bufùku, bu nànkù. Mvwa, ku ndekeelu wa lumingu eku, mvwa mufwàngàne anu naabì, nteeta bwa kujandula ne mmèyì kaayi a kwamba bwa Bulelèlè. Bìkèngela cìpalakajiiwbè ne Bible mujimà. Nwamònu anyi? Kwèna anu mwa kuCyàngata to, anu kaaMufùndù kakese kàmwèpelè ne kwenza dyu—dyumvwa kampànda, ne pashiishe kwamba ne: “Ee, ncìdì cyòcì eci cyàmba,” ne pashiishe kukùdimuka kadi kwamba ne: “Ee, kadi lwà apa nunku Cìdì—Cìdì cyàmba cikwabo cintu, cibèngangana ne eci” to. KaCyèna mwa kwenza nanku to. Bìkèngela Cyàmbè cintu anu cimwecimwe aci dìbà dyònsò. Kabiyi nanku to, kaa, aci, dìbà adi udi—udi mutùpàkàne. Nenu mushindu awu ngùntù mèmè muteetètètè bwa kuCilongesha.

21 Byòbì biine, pa mikàbà ya mèyì, bu mùdìbì ne bìdì pa mikàbà ya mèyì. Kadyuwù kàà katàmbe bunene kàntù mpeta pa mikàbà ya mèyì, kàà kùdì bânà beetu bàà mu bitùpà bishiilèshiilàngàne bya buloba, nkàà kwitabuuja kwà ngàsà wa Nzambi, ùndì ndongesha mushindu wùndì ndongesha ewu, ne: “Tuvwa badyànjlila kulongolola kumpàlà kwa dyulu ne buloba kutwàdijabi.”

22 Bânà beetu beena Mpenta, mu bushuwa bwa bwalu, ndi mumanye ne yenu mmwènenenu nyà beena ne anu mikenji, nwamonu’s, ne ndi—ndi mumanye ne cidi cibìndululakù ndambu yenu mmwènenenu. Kadi udiku, wèwè bu mwanèètù mwena Kilisto, udikù mwa kucipèèsha anu ndambu mukùmbàne wa mushinga bwa kutwàku binù kumpàlà kwa Nzambi, ne Bible webè, ne kulòmba Nzambi bwa kukuumvwijaci anyi? Udikù mwa kwenza nanku anyi? Udikù mwa kwangata mmwènenenu wa bwena ne anu mikenji awu ne kuteetakù bwa kutwànganaja kuumukila ku Genese too ne ku Bwàkabuulwibwà anyi?

23 Nenu: “Dimiinu dya nyòka,” s’ki cishebeyanganyi ncyòcì aci; bantu bààbùngì kabèèna bìitabuuja aci to. Kadi, bu wèwè anu mwa kubala mu Genese, Bible’s mmwambe ne nyòka ùvwa ne dimiinu. “Ne Nèntèekè lukunà pankacì pàà dimiinu dya nyòka ne Dimiinu dya mukàji.” Pa nanku, nyòka’s ùvwa ne dimiinu. Nenu pùikalàbì ne dimiinu dya nyòka òvwa dya nyuma, dìbà adi’s Yesu kàvwa muntu to, pa nanku Dimiinu dya mukàji’s òvwa dya nyuma. Bònsò babidi bàvwa ne mamiinu, ne lukunà alu lùcidikù. Nyòka ùvwa ne dimiinu. Nenu bu wèwè

anu mwa kwangata Bible webè awu, kutwà binù ne kwikala ne kaneemu kàà menemene kumpàlà kwa Nzambi, ndi ngiitabuuja ne Nzambi neàkusokòlwèlèci.

²⁴ Kadi wèwè kùyì mucyũmwè to, mèmè ndikù—ndikù, dîbà kanà dyònsò, bwa kwenza ne mwànyì mwònsò bwa kukukwàcisha, ku mukàndà mumfùndila anyì ku—anyì ku muyiiki wà babidi wà pàà nkààyeetù, anyì cintu kanà cyònsò cìndiku mwa kwenza bwa kukukwàcisha aci. Mu bushuwa bwa bwalu, tudi bamanyè ne aci kî ncìdì cìsùngila muntu to, anyì kî ncìdì cìpiisha muntu to, kadi cìdì cìtwàla anu Bukênkè cyanààna pa cyena-bwalu citùdì twètù bònsò tuteeta ne bukolè bwònsò bwa kufikisha bantu ku dimòna eci. Nwamònu anyì? Cìdì anu cìtwàla anu Bukênkè cyanààna.

²⁵ Mpindyewu, kùdì batèèleji bàdì bàmwènekà, ndi mwambe nenku mbwà mikàbà ya mèyì, nudi numòna's, ne mikàbà ya mèyì eyi yìyaaya pa buloba bujimà, myaba yònsò.

²⁶ Mpindyewu twinyikàayi mitù bwa katanci kakese cyanààna, kumpàlà kwa kuseemena kùdì Mwena Dìyì edi. Nenku mbanganyì mu batèèleji emu mu dinda emu bàdì mu lukèngelu, biikàle bàmba anu ne: “Mèmè ndi mu lukèngelu. Éyì Nzambi, ikàlàku naanyì luse”? Mukalenge ànùbènèshè. Ne kùdì aba bàtèèlejà mukàbà wà mèyì, pawàwùtèèlejà, Nzambi àkumbajèku dilòmbà dyebe.

²⁷ Taatù wetù wa mu Dyulu, twètù tudi cisàmbà cìdì ne kusàkidila, kadi pèètù cìsàmbà cìdì kaciyi cikùmbànyine. Kadi nyewu tuseemena ku Nkwasa Webè wa ngàsà mu dinda emu, bwalu tudi bapetè dìyì ditùtùmina bwa kulwa. Yesu mmwambe ne: “Nùlombàayi Taatù cintu kanà cyònsò mu Dìnà Dyànyì, Mèmè nèncyènzè.” Mpindyewu, tudi bamanyè ne aci ncilelèlà.

²⁸ Ne mwab'ewu mu batèèleji emu, ne pambèlu mu—mu ditùngà mwàyà mikàbà ya mèyì, nemwìkalè pàmwàpa makumi a binunu bya beena Kilisto balediibwe cyàkàbìdì bàtèèlejà cyòci eci. Ne tudi bamanyè, Taatù, ne patùdì tulediibwa cyàkàbìdì, nyuma wetù ùdì ùlediibwa ku Dyulu. N'Nyuma wa Nzambi, Nyuma Mwìmpè, pambidi pèètù. Ne tudi bamanyè ne Nyuma Mwìmpè awu ùdì ne bukolè bwònsò ne ùdì mwa kwenza cintu kanà cyònsò citùdì tujinga bwa kwenjiibwaci. Nanku, Taatù wa mu Dyulu, tudi baswè kuKulòmba bwa kulekelelakù diitabuuja dyetu kùdì Nyuma awu, bwa Yèyè wàmonakù mwa kutùpetela mu dinda emu, ne bwa butùmbì bwa Bukalenge bwa Nzambi, malòmba ònsò ne majinga aa, bwa twamònakù mwa kwondopiibwa ku màsaamà ètù ne ntàtu yetu, bwa twamònakù mwa kusadila Nzambi wetù ne byònsò bìdì munda mwetu.

²⁹ Kàngulàku maci ètù a luumvu leelu ewu, ne pàndì ndyènzeja ne mwànyì mwònsò bwa kutwàla lukonko lunene elu apa, ne kulùtòòkesha mu meeji a bantu. Mpindyewu, nyewu ndi naaci cìfùnda kaaba aka, Mukalenge, pa dibeji apa, ne cizòla ku

cibàsà eci eku, dizòla edi, kadi mémè yònsò nciyi mukùmbàne mwa kucyùmvwìjakù to. Mpindyewu tudi tuKusòka Wèwè, Mulongeshi munene Utu mufùndè Dìyì, Utu muDìsonsòle, WàkaDifila kùdì mupròfetà Danyèlè awu. Ne tudi tulòmba bwa Wèwè kutùma disonsola mu dinda emu, mu matùkù a ndekeelu aa, mwàkambàYe ne Mukàndà wùvwa mwa kukàngiibwa too ne ku cikondo eci, bwa Wèwè kukàngula cyumvwilu cyetu. Nenu swàku bwa kwikalè diitabuuja dinefùke mu mwoyi wètù diikalàku mwa kwenza bwa Dìyì kukwàtadi ne kwangatadi Mwoyi, ne kutòlweshadi micì ya bwakàne mu nsòmbelu yetu, yìdiDi ditùmina bwa kutòlwesha. Diitabuuja dyetu mu Nzambi, swàku bwa ditùpetèlè cyòci aci mu dinda emu. Bwalu tudi twindila ne kudìpwekesha kwònsò mpindyewu, ne tudilàmbula Kùdi, mu Dìna dya Yesu Kilisto. Amen.

³⁰ Mpindyewu, tudi ne kusàkidila bwa mu dinda emu, bwa mpùngà wa mushinga munene ewu cyàkàbidì bwa kubuululakù mabeji aa a Dìyì dya Cyendeleele dya Nzambi.

³¹ Mpindyewu, cìndì mudyàngàcile bwa kuteeta kuumvwija cyòci eci, mbwalu tudi tulonga Mukàndà wà Bwàkabuulwibwà, ne tudi tufùma ku dikeneta dya bikondo mwandamutekètè bya ekeleeziya. Ne, pashìshe, kundekeelu kwa nshapità mwi3 wa Mukàndà wà Bwàkabuulwibwà, Ekeleeziya ùdi ùmushiiibwa pa buloba, ùbànda mu Butùmbi. Nenu ndi nteeta, ne mwoyi wànyì wònsò, bwa kufikisha eci kùdì bantu ne, bàdì bindile bwa cintu kampànda kwenzekaci, cidìbo bamòne cifùnda mu Mukàndà wà Bwàkabuulwibwà, pààci kaciyi citàngila cikondo cya ekeleeziya to. Kadi tukàadi pabwìpì ne nshìikidilu kutàmba munùdi nwènù nwele meeji amu.

³² Kùkaadi ndambu wa malòòlò, Billy, wanyì. . . Anyì, mukàj'a mwanàanyi's wè, eyowa, kumbiikilayè, bufùku menemene, wàmba ne kùvwa muntu mulùme dyèndè Andy Herman, udi mwaneetu wa balùme mwànà wa tààtù-mukwabò, ùvwa mulààle, ùpùnga ne lufù mu lùpitàadi. Mémè kuya bwa kamumòna. Bàkaavwa bamupèeshe bwanga bwa kumulààdika tulù. Mémè. . . bwàbùngì be mu mushindu wà ne, ùkaavwa muyè mu tulù, ne mémè nciyikù mwa kwakula nendè to. Pàakacyàbu mu dinda. . . Mémè kulòmba Nzambi bwa kumulamakù ne mwoyi too ne pàmvwà mwa kwakula nendè. Andy ùtu muntu mwìmpè, kadi kàyì anu mwena Kilisto to. Kì ntààtù-mukwabò to; mmwànà wa tààtù-mukwabò, musèle mwaneetu wa bakàjì mwànà wa taatù-mukàjì.

Nenu pashìshe pààlu Taatù-mukàjì Ade kungambilayè, mwimane mwaba awu, kwambayè ne: “Billy, bidimu byònsò makumi mwandamukùlù bya mwoyi wèndè ebi, kàtu musadilekù Nzambi to. Kadi,” mwàkambàye, “kwènjì ndambu wa mbingu yìvwaye musòmbè mu nzubu. . .” Yèyè, bidimu byònsò makumi mwandamukùlù abi, mu bushuwa bwa bwalu, kàtu ùtamba kwenza midimu ya byanza to. Kadi kwambayè. . .

Kumubiikilayè e kwamba ne: “Ade, udi mumanye mùdì bwalu anyi? Kilisto mmulwe mwab’ewu kumpàlà kwànyì eku, kwènjà anu tusunsa tukese cyanààná.”

Mukàjì kumutàngilayè, kwambayè ne: “Andy, udi—udi . . . Ki cinyì aci?” Yèyè ne . . .

Mulùme ne: “To. Yèyè’s ùvwa mwimane anu kaaba aka kumpàlà kwànyì eku, kwamba Yè cintu kampànda.”

Mukàjì ne: “CyǎmbìYè ncinyì?”

“Dìbà dikaadi diyè kupìta mùdì wèwè wela meeji amu.”

³³ Mu ndambu wa mbingu kuumukila apu, mbingu yibidi anyi yisatu, kubwelayè mu kómâ ne kushààlayè mulààle mutekètè luseke mu lùpitaadi, ùpunga ne lufu. Mémè kwamba ne: “Taàtù-mukàjì Ade, bundù bwenu bwa kubènga kumbiikila anyi kubiikilakù muntu kapànda, bwa kutèèkakù mwoyi wèndè mu ngiikàdìlù mwìmpè bwa dìbà dyàfikiyè edi.”

³⁴ Mémè kulòmba Mukalenge, pàakacyàbu mu dinda, pánkaavwà . . . Yèyè kàcìvwa mwa kwakula to, ki mémè kumwela anu nkonko cyanààná. Mémè kwamba ne: “Udìkù mwa kungumvwa anyi, Tààtù Andy?” Kadi ùvwa—ùvwa mwa kushikulakù mutù kakese ne kunyungisha mbàngà. Mémè kumusambidila, kumwambila bwa kutondayè mpekaatu yèndè kumpàlà kwa Nzambi. Mwva muswe kumubàtiiza, ne Taàtù-mukàjì Ade kujingayè kubàtijiibwa.

³⁵ Mémè kupweka ne cibambalu cinène aci, bwa kumòna nsongààkàjì kampànda wa citende utu musòmbèle ku mutumba eku, uvwabò bàkèba kutùma ku lùpitaadi lwa bapàle, kadi Mukalenge kumwenzela Yè cintu cinène, kwalukilayè kumbèlu.

Dìbà adi, mu njila ngenda nyakù, mémè kutwilangana ne mwanèètù wa bakàjì kampànda wa bafìike, yèyè kwamba ne: “Kì ng’wèwè Mwanèètù Branham anyi?”

Mémè kwamba ne: “Mmémè.”

Yèyè ne: “Udi mumvùlùke anyi? S’mmémè Mándamù Drye.”

³⁶ Ki mémè ne: “Eyowa, ngeela meeji ne ndi mukumanye. Pete Drye ne bakwabo abu?” Mémè ne: “Eyowa, Ngàà—ngààkuvùluku,” Kutàpayè dísù mu cibambalu amu, nenku patwàkenzà . . . Mémè kudìkonka bwa cinyì wàkamba nanku. Kadi, mwaba awu, Tààtù Andy ùkaavwa mujuuke mu bulààlù, ne mushààle musòmbè mwaba awu, ùnyungisha byanza ne mabòko anu mùtù muntu mukwabo yònsò ewu, ùteeta bwa kupwekesha cintu aci, cilùmyànà cya ku bulààlù aci panshì apu, bwa wàmòna mwa kupàtuka muntwamu ne kukèba kwa diya. Patùdì twakulangana apa nebàlwe bwa kubàtijiibwabò mu Dìná dya Mukalenge Yesu, yèyè ne mukàjèndè.

³⁷ Pa nanku, kadi cìngàmbidì ciine aci, dìbà dikaadi diyè kupìta mutùdì twètù twela meeji. Ne ndi ngeela meeji ne *Mbingu*

Makùmì Mwandamutekètè Yà Danyèlè eyi neyitùfikishè ku dyumvwa.

³⁸ Mpindyewu, ciibúngì cya bânà beetu beena Mpenta, múnkaavwà mwambe ku ntwàdijilu kwa mukàbà wà mèyi ewu ne, bàdi bàbènga kwitaba Cyôci eci. Bôbò mbindìle cintu kampànda cinène ne cya bukolè, bwa kwenzekaci. Kadi, bânà beetu wanyì, bu nwènù mwa kutèeleja ne ntèmà yònsò, kanüyi. . . ne nutèeleja, nenüjandulè ne cintu kampànda cinène ne cya bukolè aci, cikaadi cimanè kupìta. Yesu ùkaadi pabwîpì ne kupingana.

³⁹ Ekeleeziya ùdi ùmuka mu nshapità mwi³ wa Bwàkabuulwibwà. Cintu nansha cimwè muntwamu kí ncyambiibwe bwa ní ncinyi ní ncinyi to, kadi cintu cya ndekeelu cìvwa anu mmusanjeela wa ndekeelu wa cikondo. Pashiishe, tudi tutàngila bwalu bwa beena Yudà too ne ku dilwa dya cyàkàbìdì pàmwè ne Mukàjì-musèla, mu nshapità wa 19. Kuumukila ku nshapità mwi⁶ too ne ku wa 19 byònsò mbya beena Yudà.

Mwaba awu ki wùndi muswe kuleeja mwaneetu udi apa ewu mu Bitampì ebi, Mwanètù Wood, uvwa kale wàwa Ntemu wa Yehowah, yèyè ne dîkù dyendè dyònsò dijimà, mu dinda emu ne, “binunu lukàmà ne makumi anaayi ne binaayi” abi kabàvwa, kakùvwa dipentengana pankaci pàà bôbò abu ne bàà Bisàmbà bya bendè to. Bôbò abu mbeena Yudà. Nwamònu anyi? Ne kabèèna Mubidi musokòmè wà Kilisto pa buloba leelu ewu nansha.

Mukàjì-musèla ki wòwò Mubidi musokòmè awu. Ku Nyuma Mwîmpè nkutùdi babàtìjìibwe mu Mubidi musokòmè awu.

⁴⁰ Mpindyewu, tudi bamanyè ne mu Mukàndà wà Danyèlè emu, mutùdi tubala emu, netùbalè anu cyàkàbìdì bwalu n’Diyi Dyèndè. Mu nshapità wa 9 wa Danyèlè, ku mvensà wa 24.

Mbingu makumi mwandamutekète mmikòsela cisàmbà cyebe ne cimenga cyebe cya cijila, bwa kulekeesha dishipa dya mikenji, . . . bwa kujikija mpekaatu, ne bwa kwenza dipungisha bwa bubì, ne kubweja bwakànè bwa kashidi, ne kutwa citampì ku cikèèna-kumòna ne ku cipròfeta, ne kwela mwaba Mutàmbe cijila maanyì.

Mvensà wa 25: “Ne ki bwa cinyi manyà ne umvwa ne, kuumukila ku. . .” Mpindyewu, pa cyôci aci mpatùvwa twakwila, ne ki twètù kujikijilapù mu dilòòlò dya dyàlumingu dishààle ne, “kwela mwaba Mutàmbe cijila maanyì.” Apa ki patùdi tubangila mu dinda emu, pa mvensà wa 25 ne: “Ne ki bwa cinyi. . .”

Ki bwa cinyi manyà ne umvwa ne, kuumukila ku dipàtuka dya diyi ditùma bwa kwalujulula ne bwa kwibakulula Yelusàlèmà (ki “cimenga cyebe cya cijila” aci, nwamònu’s) too ne. . .Maasiya

Mfumu awu nekwikalè mbingu mwandamutekète, ne mbingu makumi asambombo ne yibidi, ne mùsèsèsu newibakiibwè cyàkàbidi, ne bimanu, ne nansha mu bikondo bya ndululu.

Ne paanyima pàà mbingu makumi asambombo ne yibidi Maasiyà neùmushübwè, kadi kabiyi bwèndè yéyè mwine to; ne bantu bàà cisàmbà cya mfumu wâlwa nebâbutulè cimenga ne mwaba wà cijila, ne ndekeelu waci neïkalè ne dipaasalala dinene, ne too ne kundekeelu kwa mvità ayi cinyangu ncilongolola.

“Ne. . .” Mpindyewu, vùlukàayi ne, ki ndekeelu wa mvità ayi nyéyè awu. Tudi naaci ku cibàsà cya difùndila eku. “Ne,” mpindyewu tudi tubanga cintu kampànda cikwabo.

Nenku yéyè neàshindikè cipungidi ne bààbùngì bwa lumingu lumwe; kadi munkaci mwa lumingu yéyè neàlekeeshè mulàmbù wà mashi ne mulàmbù wà dyosha, ne bwa bwalu bwa ditàmba kutangalaka dya cinyangu yéyè neàcìvwijè dibùtuka, mene too ne dikùmbana dya maalù ónsò, (mbwena kwamba ne, bònsò), ne cidì cikòsa aci necipongolodiibwè pa cidì cibùtùdùbwe,

⁴¹ Kaa, dileesònà kaayi’s wè! Mwawa mwambile mukajàanyi ditùkù adi ne: “Ndi ndikonka bantu ní bàdi cya bushuwa bàbyùmwa’s.” Mpindyewu, ndi muswe bwa nwènù kubyùmwa. Kanwikadi. . . Panwikalà, byòbi bikèngela bwa twètù kushàala apa ditùkù dijimà, twashàala anu mwine. Mpindyewu, twètù tudi—tudi—tudi baswe kubyùmwa. Nwamònu anyi? Tudi—tudi baswe kumanya ne bìdi Bulelèlè. Nenku, nwènù, nwìkalakù anu mwa kubimòna’s wè! Ne mèmè nènkonkè, pàmwàpa. . .

⁴² Ne pashiishe, paanyimà, nènshiyè dizòla edi dikùdika apa, nenku nwènù nudi—nudi mwa kubizòla, paanyimà. Lwàyi mu mapingaja emu, díbà dyònsò dinùdi baswè kulwa adi, nenku nùzolaayi mazòla awu ne bikwabo. Nedinùkwàcishèku bwa kuumvwa. Ki bwa cinyi ndi muditèèke kaaba aku, mbwà nwamòna mwa kucyùmwa.

⁴³ Mpindyewu, twanjàayi anu kwambululakù ndambu bwa twètù kupeta cishimikidi. Mpindyewu kùvwa. . . Danyèlè ùvwa muumvwe bwalu bwa cisàmbà cyèndè bumutondè, bwalu ùvwa mubalè mupròfetà Yelèmiyà, ne kuumvwayè ne Yelèmiyà ùvwa mwambe ne bàvwa mwa kusanganyiiibwa mu bupika bidimu makumi mwandamutekète. Nenku díbà adi, kumònayè díbà adi ne bàkaavwa benzè bidimu makumi asambombo ne mwandamukùlù, ki kumanyayè ne cikondo cikaavwa pabwìpì. Pa nanku kutèèkayè ku luseke mudimu wèndè wònsò, kupwekeshayè, mutùdi mwa kwamba, ridò ya midimu yèndè ya bwàcyàbwilà. Kutàngijayè mpàla kùdi Nzambi, kuvwàlayè mufuku ne kudyélayè butù, ne kuditwayè mu kujila kwa

byàkudyà ne mu disambila, bwa kumònayè mwa kuumvwa ne civwa mwa kwikala dîbà kaayi. Pashiishe tudi tusangana, mûngăcyămbi kumpàla . . .

(Swàku ùcikùdimùnè, *lwàlwa* luseke, kakese cyanààna?) Dikàpàkapà adi, didi ditàmba kufila lupeepèle be. Cidi cimpàcisha dîyi. Pashiishe . . . (Twasàkídila, mwaneetu.)

⁴⁴ Mpindyewu, bwa twètù kujandula, Danyèlè, ùvwa muswe kupeta malubà aa bwa cisàmbà cyèndè. Ne mèmè ndi ngeela meeji ne, pùikalàbi ne Danyèlè, mu kubala kwa bapròfetà bàvwà bamudyànjidile, wàkapeta dyumvwa dya mushindu ewu, dya ne ùkaavwa pabwìpì ne ndekeelu, ne wàkakèba Nzambi, bwa kujandula ne ndekeelu ùkaavwa pabwìpì pàà bìshi, dîbà adi mèmè's ndi ngeela meeji ne tudi babingishiibwe, pa kumòna ne twètù tukaàdi ku ndekeelu wa njila mpindyewu, katùyi tuvwàla mufuku ne tudyèla butù to, kadi twimansha maalù a pa buloba, ne diditácisha dyetu dya mu nsòmbelu wa bwăcyàbwilà, ne kukèbangana ne Nzambi, bwa kujandula ne nditùkù kaayi dya cidimu ditùdi tusanganyiibwa, bwalu tudi tumòna ne tudi ku ndekeelu, ne bwa Ekeleeziya kwenzayè kujila kwa byàkudyà ne kusambila ne kudìlongolòla. Ki bwa cinyi ndi mudyènzèje bwa kudyàngacila mèmè mwine . . . Nciyi mumanye mwa kuumvwija byòbi ebi to, bwalu ntu anu mubicingùlùke dîbà dyònsò, ngamba ne: “Mbingu makumi mwandamutekètè ya Danyèlè ayi,” bwalu ncivwa mwa kuyùm vwa to. Nenku ki bwa cinyi ndi mudyàngacileyi mèmè mwine mpindyewu, bwa kuteeta bwa kuyùm vwiya. Ne ndi ngiitabuuja ne, ku dikwàcisha dya Mukalenge, ndi mwa kucyènza ku ngàsà Wendè, bwa kucifikishakù mwaba wà ne, nnùleeja mushindu wutùkaadi pabwìpì ne Dilwa dya Mukalenge.

⁴⁵ Mpindyewu, Danyèlè ùkaavwa yèyè anu mu bidimu bibidi cyanààna. Pashiishe tudi tusangana, ne, pàvwàye ùsanganyiibwa mu disambila, Mwanjelo, Ngabùdyèlè, wàkamupàtukila; ne kàakamuumvwija anu dîbà òvwà cisàmbà cyèndè ne cya kuumuka mu bupika to, kadi, kabidi, ne byònsò bìvwa bikòsela cisàmbà cyèndè, byònsò bìcìvwà bishààle bwa cisàmbà cyèndè abi. Wàkamba ne: “Kùcidi kushààle mbingu makumi mwandamutekètè bwa beena Yudà.”

⁴⁶ Pashiishe, tudi tusangana ne, Yèyè ùvwa ne twipàcìlâ tusambombo. Ne kàmwè kaa ku twòtò atu, kàvwa mbwa kulekeesha dishipa dya mikenji; ne—ne kujikija bwalu bwa mpekaatu; kwenza dipungisha bwa bubi; kutwàla bwakànè bwa kashidi; kutwà citampì ku cìkèènà-kumòna ne, ku cipròfetà; ne kwela mwaba Mutàmbe cijila maanyi.

⁴⁷ Nenku tudi bangàte, mu dyàlumingu dishààle mu dinda amu, Danyèlè mu ngiikàdilù wendè muntwamu, ùsambila. Mu dilòòlò dya dyàlumingu dishààle edi, tudi bafile Mifundu, bwa bantu

bààmòna mwa kuyibala pàvwàbo mwa kwalukila mu mààbò. Nuvwa bakayibalé anyi? Yívwa minùsànkishe anyi? Bilenga be!

48 Mpindyewu, twipàcìlà tusambombo. Ne tudi tusangana ne, mu kiipàcìlà kiisambombo aka, “bwa kwela mwaba Mutàmbe cijila maanyi,” tudi tusangana ne “Mutàmbe cijila” awu ùvwa misangu yònsò ùleeja anu Ekeleeziya, Tabernacle awu. Ne cintu cya ndekeelu cívwa ne cya kwenjiibwa, cívwa nkwela mwaba Mutàmbe cijila awu maanyi, awu n’Tabernacle wa mu Bukalenge bwa bidimu cinunu mwàsòmbelà Ye mu Bukalenge bwa bidimu cinunu amu, mutwàsòmbelà twètù.

49 Mpindyewu, leelu, mpindyewu tukàadi twenda tuseemena ku ne: “Mbingu makumi mwandamutekète ncinyi?” Ne eci citùpà ncyà mushinga mutàmbe bunene, mbingu makumi mwandamutekète eyi.

50 Mpindyewu, tudi bamanyè ne Mifùndù kayèena mwa kushima nansha. Yìdi ne cya kwikala Bulelèlà. Ne piikalàbi ne Mwanjelo Ngabùdyèlè wàkalwa kwambila Danyèlè ne kùvwa kushàale anu mbingu makumi mwandamutekète bwa beena Yudà... Mpindyewu, twètù tudi bafwànyìne kwangata aci bu matùkù asambombo...anyi lumingu lwà matùkù mwandamutekète. Kadi, mu cipròfetà citu misangu yònsò cifidiibwe anu mu nsùmwinù.

51 Ne pa nanku, kakwèna mpatà to ne munda mwa bikondo byònsò, mùvwa bantu nkàmà misangu nkàmà, bamanyi bàà mabàla, bantu bapilùke, bateetètèete bwa kuumvwija cívwa mbingu makumi mwandamutekète eyi. Ne mèmè nkàadikù mubalèbàle mèyi àbò àbùngì a dyela dya nsèke pa byòbi abi. Kadi ndi ne kwanyisha kwàbùngì kùdi Mukalenge Smith, wa mu ekeleeziya wa ba-Adventistes, bwa mmwènenu yèndè. Ndi ne kwanyisha kwàbùngì kùdi Docteur Larkin, bwa mmwènenu yèndè. Ndi ne kwanyisha kùdi bamanyi banene bònsò bàà mabàla aba, bwa mmwènenu yabo pa bwalu ebu. Ne mu kubala kwa bìdìbo bambe, bìdi bìntòòkeshila mèmè maalù bikolè, bwa mèmè kupetakù myaba yìdi yìmwèka ne nyà cya bushuwa. Kadi bwa kupeta mmwènenu yìmvwà—yìmvwà mèmè ngeela meeji ne mvwa muswèku kuumvwija, ndi mukèbùlùle mu mukàndà wà cibungu, wà “cikondo,” bwa kujandula cívwa mwaku “cikondo” wùmvwija,

52 Kadi tudi tusangana mwab’ewu, tudi ne “cikondo, cikondo, ne citùpà cya cikondo.” *Cikondo* mbwena kwamba cinyi? *Lumingu* ncinyi? Mpindyewu, kùkaadi bidimu binunu bisatu, nkàmà yinaayi ne makumi asatu, kacya anu cyòci eci cyènzeka, kacya anu Nzambi wàbanga kukwàta mudimu ne beena Yudà; kùkaadi bidimu byàbùngì, byàbùngì menemene. Danyèlè ùvwa nkumpàlà kwa Kilisto, ne cikondo aci cívwa mmu cidimu cya 538 kumpàlà kwa Kilisto, cidimu cya 538 kumpàlà kwa Kilisto, pàakambàye cyòci eci bwa “cikondo, cikondo, ne citùpà

cya cikondo” apu. Nenku, mbingu makumi mwandamutekète, tângilàayi nùmònè kùdì mbingu makumi mwandamutekète mifwànyìne kamufikisha. Mòna’s, yèyè ùcìvwa anu mu Baabùlònà, mu mbingu makumi mwandamutekète amu, kadi pààbì Nzambi’s ùvwa mumwambile ne ki cikondo cyònsò cìvwa cikòsela cisàmbà aci.

⁵³ Mpindyewu, ekeleeziya wanyì kaaba aka mmumanyè ne mu bidimu byònsò ebi ntu misangu yònsò anu munwàmbilàmbile ne: “Wèwè muswe kumanya ditùkù dya lumingu, tângilà ku kabalamatùkù. Kadi wèwè muswe kumanya cikondo citùdì ne mwoyi, tângilà beena Yudà abu.” Ki ntankù umwèpelè udikù. Nzambi kàtukù mukòsèle bàà Bisàmbà bya bendè bikondo bibala to—to; kakùvwakù cipòòlò kampànda cya cikondo to. Nenku ki mwaba awu wùndì mèmè ngeela meeji ne bafùndi banene mbapetè cibwejàkàji, ne bàvwa bàteeta kwangata cyòci eci bu cya beena Yudà ne bàà Bisàmbà bya bendè, bwalu Yèyè wàkamba ne: “Cisàmbà cyebe.” Kadi uvwaYè wàkula nendè awu n’Danyèlè, kí ng’Ekeleeziya to; cisàmbà cya Danyèlè, beena Yudà. Bu Yèyè wàkula ne Ekeleeziya; kwèna mwa kuya ne aci mwaba nansha wumwe to; wèwè’s udi—wèwè’s udi usanganyibwa paanyima pale, nansha mene kumpàlà kwa dilwa dya Kilisto. Cìvwa cifwànyìne kupàtuka pambèlu pàà mbingu ya cipròfetà ya mushindu kanà wònsò mùvwà uswa kucitèèka amu. Cikaadi cimanè kupità. Kadi Yèyè ùvwa wàkula ne beena Yudà, ki bwa cinyì beena Yudà bàdi ntankù wa Nzambi.

⁵⁴ Nudi bavùlùke kaaba aka, anu abidi àdì panshì aa ne, pàvwà Mwanèètù Arganbright, wa mu Californie, cindondà cya mfumu wa Kasùmbù kàà Buloba bujimà kàà Beena Kantuku-byanza bàà Evanjeeliyo mu Kaabujimà, mulwè kwànyì kumbèlu muntwàdile mukàbà wà—wà mèyi; kí mmukàbà wà mèyi to, kadi mmukàbà wà bindidimbì, wùvwàbo. . . wà *Tusunsa Tùsàtù Kumpàlà Kwà Mundankùlù*. Wùvwa mukwàciibwe pa dikèbulula dya mu maalu a mamanya. Pàngàmònu beena Yudà abu bàalukila, bàalukila mu Yelusàlèmà, mèmè kulwa ku tabernacle eku, kwamba ne: “Ndi ndyùmvwà anu bu mukùdimùnùne cyàkàbidì mucimà.” Bààbùngì bàà kunùdì mbavùlùke cyòci aci. Mèmè kwamba ne: “Pa kumòna beena Yudà bàba bàalukila’s wè!”

Mu Maatàayi nshapità wa 24, Yesu mmwambe ne: “Panùdì numòna mucì wa mfigi wèla ntòngà.” Nudi bamanye cya dindila, nwamònu’s, beena Yudà munkaci mwa kwalukila!

⁵⁵ Mpindyewu, ndi ne mèyi kampànda a dyela naawu nsèka mafùnda kaaba aka. Ndi muswe kuditwamù. Mpindyewu, mpindyewu, nèn—nèngàngatè dìbà dyàbùngì, bwa nwamònakù peenu mwa kubifùnda. Mpindyewu, byònsò ebi bìdi byènzeka, ebi. . . Mpindyewu tudi. . . Mu cikondo citùdì mpindyewu eci. byònsò ebi bìdi byènzekela. . . Mbeena Yudà; kí nciàngile Ekeleeziya to, nansha kakese. Byònsò kuumukila ku

Bwàkabuulwibwà nshapità mwiɓ, too ne ku wa 19, kabyènakù ne dipetangana nansha òmwè ne Ekeleeziya to. Kwèna mwa kwenza ne bimwenekè bijaalàme to. Kacyèna anumù to.

⁵⁶ Mpindyewu ndi muswe kuumvwija mùndi mupetè cyòci eci. Mpindyewu, ku cibàsà cya difùndila, bààbùngì bàà kunùdì nebàmonè ne ndi muzòle, bikondo bishùlàngàne ntàntà, mùdibi bikabwela mu ntàntà wa bikondo, bwa kwenjiibwabì mu mushindu wa bantu bònsò kuumvwabò. Nudi mwa... Kanwèna mwa kubimwèna lwà paanyima pààpa to, ngeela meeji, mbabifunde ne tuumàleetà tutàmbe bukese. Bwalu mmfùndilu wa Becky. Mwva ngeela meeji... Nenu, dizòla adi, mwva ne dibi ditàmbe dyòdi adi. Kadi, Becky ngudi muzòle dyòdi adi, dya cimfwànyì cya cilòdà cya Nebùkàndànèèsà. Ne ndi ngeela meeji ne nciitàmbe kufwàngana ne nsongààkàjì's, Becky, kaciyi bu muntu mulùme to. Kadi, nansha nanku, neci—neci filè anu bulubà, citùdi naaci bwalu.

⁵⁷ Mpindyewu, twètù babalè mu Bible ne kùdi mbingu makumi mwandamutekète mikòsela cisàmbà, mpindyewu, aci... kacyènakù ne dipetangana ne Ekeleeziya to. Mbingu makumi mwandamutekète kayènakù yitàngila Ekeleeziya to. Nwènù bamòne kaaba aka, ku dizòla eku, ndi mutèeke cikondo cya ekeleeziya pankaci pàà mbingu makumi mwandamutekète ayi.

⁵⁸ Tudi naadi kaaba aka. Mwanèètù kampànda wa mu Géorgie nguwva mutùzòlèledì kaaba aka, patùvwà tulonga bikondo bya ekeleeziya apu. Nenu tudi cya bushuwa batwishùbwe ne tudi mwa kuumvwa cidi cyòci eci cyùmvwija. Mwaba mutòoke mu ekeleeziya ewu, mbwena kwamba ne ciwva cyònsò cya cipostòlò. Ne pashùshe mu cikondo ciibìdi cya ekeleeziya, bàwva ne dilongesha dya beena Nikàlàwù, anyi, bàwva ne byenedi bya beena Nikàlàwù's wè; kacicvwa cyanjì kuvwijiibwa dilongesha to. Cikondo ciisàtù cya ekeleeziya, kulwaci dilongesha. Nenu mu cikondo ciinâyì cya ekeleeziya, kulwaci bulongolodi, ki kwikalaci buupaapà bwa cyena Loomò. Kadi mu cikondo ciinâyì cya—cya ekeleeziya, ki ciwvwa bikondo bya mîdimà.

Nudi numòna's, mîdimà yidì pònsò apu ayi yidi yileeja cyena Nikàlàwù, anyi cyena Loomò. Citùpà citòoke aci cidi cileeja Nyuma Mwîmpè, Ekeleeziya. Nenu, pàakabangàci mu cikondo cya Pòlò Munsantu, Ekeleeziya mujimà wa cipostòlò ùwva mùle tètè ne Nyuma Mwîmpè. Pashùshe bantu bàà cipidì citùmbùke bààkabanga kulwamù. Pashùshe ki ndekeelu wa byònsò kudyenzabò cimùkù ne kucyènzabò ekeleeziya mupyamùpyà. Ne anu beena kaèkèleeziyà kakese aku mbàvwàbò bòosha, ne bàbàasa mabwe, ne babèelela nyama ya ntambwe, ne bikwabo byònsò.

⁵⁹ Mu Dilongolola ki Luther kupàtukayè, ne bukènke bukòlèku ndambù, nudi numòna's. Mu matùkù a Wesley, kutwàlayè

bukênkè bukwapo bukole ndambu. Kadi mu cikondo cya ekeleeziya cya ndekeelu eci, cikondo cya ekeleeziya cya beena Nikâlâwù, ki cikondo citùdì. . . Kî ncyà beena Nikâlâwù to, kadi Laòdikiyà, ki cikondo citùdì ne mwoyi eci. Nudi numòna's, kamwèna Bukênkè bupitèpìte bungi to.

⁶⁰ Muntu kampànda, pàakamònàye dizòlà dyàci kuulu kwàka, kwambayè ne: “Bundù bwebe, Mwanèètù Branham! Ditùkù dinene dya dikenkesha dya bukênkè edi!”

Mèmè kwamba ne: “Nêndifwànyikijilè ne, pàasenguludiibwàci, aci kacýèna nansha cìcìleeja mu cyòci to, paùdi wangata bàà myoyi mikezùke menemene, balediibwe cyàkàbìdì ku Nyuma.” Vùlukàayi ne, eci ki cikondo cya ekeleeziya cimwèpelè cìvwà Kilisto mwela pambèlu pàa Ekeleeziya Wendè Sungasunga, ku byònsò. Tudi ne ditonda dinene, kadi: “Tudi ne citùdì naaci anyi's?” ki citùdì twètù twamba ncyòci aci. Kilisto ùdi cya bushuwa mu ekeleeziya anyi? S'neikalè wa banyàabanyà menemene.

⁶¹ Mpindyewu, mpindyewu twanjì kwambaayi mu cikòsò mbingu makumi mwandamutekètè ya Danyèlè ayi. Mpindyewu ndi mufwànyìnekù kwambulula cyàkàbìdì kaaba aka; bambi bàà Evanjeeliyo, nwènù babènge kwitaba eci, bìdi anu bìmpè. Mmyabanya mu bipungu bisatu, mutùdì tusangana mu Danyèlè 9. Bipungu bisatu. Cya kumpàla, cipungu cya mbingu mwandamutekètè; pashiishe makumi abidi misangu yisatu ne yibidi, mbwena kwamba ne makumi asambombo ne yibidi; ne pashiishe cipungu cya lumingu lumwe. Mmyabanya mu bipungu bisatu bishiilàngàne.

⁶² Mpindyewu, ndi muyàbànye ku cibàsà cya difùndila eku. Cipungu cya kumpàla; cipungu ciibìdì; ne ku dyànyì dyumvwa, ku Evanjeeliyo, ku Nyuma Mwimpè, ne, ku cikondo cya nshiikidilu, Nzambi ùdi ùpingana cyàkàbìdì kùdì beena Yudà.

⁶³ Mpindyewu, tudi bamanyìne ku Evanjeeliyo yònsò, yìdì Pòlò mulongèshe, ne bakwapo, ne, Nzambi neàpinganè cyàkàbìdì kùdì beena Yudà. Ee, dìbà adi, piikalàbi ne Yèyè neàpinganè cyàkàbìdì kùdì beena Yudà, mmunyi mutùdì mwa kucyàngata kucyàluja ku cikondo cya Danyèlè? Bikèngela tucyàngatè bwa cikondo cya ndekeelu eci. Piine apu mpaanyima pàa Ekeleeziya wa bàà Bisàmbà bya bendè mumane kuya, bwalu Yèyè ùdi ùtàngila bwalu bwa Izaleela bu ditùnga, twètù bu muntu-nkààyà.

⁶⁴ Mpindyewu, ndi ne ndambu wa mifùndù kaaba aka yindì muswe kunùbadila patùdì twenda tuya apa. Mpindyewu:

*.. dipàtuka dya diyì ditùma dya kwibakulula
Yelusàlèmà . . .*

Aci, cìvwà mmu matùkù 14 a ngondo mwisàtù. Yònsò wa kunùdì yèyè muswe kufùnda aci, mu cyena Ebelu neùsanganè bàcibìkila ne *N-i-s-a-n*, *Nisan*, mbwena kwamba ne “ngondo

mwisâtù.” Dîyì adi dyàkatùmiibwa mu matùkù 14 a ngondo mwisâtù, cidimu cya 445 kumpala kwa Kilisto, dîyì kupàtukadi bwa kwibaka, kwibakulula ntempèlù. Nudi nucyùmvwà, bu munùkaadi babalè Mifùndù. Too ne pààkajikijiibwàye, byàkangata bidimu makumi anaayi ne citeema bwa kujikija ntempèlù ne cimenga, bwa kubìibakulula. Ne mùdì Bible mwambe kaaba aka, Danyèlè ngudi wakula, anyi Mwanjelo wàmabila Danyèlè, ne:

... bimanu, ne bìvwa mwa kwibakiibwa *mu bikondo* bya ndululu.

Ne bààbùngì bàà kutùdì mbavùlùke ne, pààkiibakiibwàbi, bàvwa ne kakàsù ku cyanza ne mwelè wà mvita ku cikwabo cyanza, bwa kwikala kpongwela mwena lukunà. “Ne bìvwa mwa kwibakiibwa mu bikondo bya ndululu.”

⁶⁵ Pa nanku, apa mpândì mpetela cyòci aci, mpetà matùkù àànyì awu. Mpindyewu, tudi ne tubala-matùkù tubidi, tusatu tushìilàngàne. Patùdì twalukila ku kabala-matùkù kàà kale kàà maalu a mabùlùnga, ne tudi tusangana ne, mu kabala-matùkù kàà Julien mùdì matùkù nkàmà yisatu, ne makumi asambombo ne ataanu ne cyàbinaayi cimwè cya ditùkù mu cidimu. Bàdi baàbadila pa dipità dya Saadi ne mitooto mishìilèshìilàngàne, ne bikwabo. Ki pàdìbo baàbadila apu. Mpindyewu tudi tusangana, mu kabala-matùkù kàà cyena Loomò mutùdì ne mwoyi mpindyewu emu, matùkù nkàmà yisatu ne makumi asambombo ne ataanu, ku kabala-matùkù aku. Kadi mu kabala-matùkù kàà beena Kilisto, anyi kàà cipròfetà, tudi tusangana ne mùdì matùkù anu nkàmà yisatu ne makumi asambombo cyanàànà mu cidimu. Mpindyewu, nudi bafwànyine kudìkonka ne mmunyi mùdì cibwejàkàjì eci cilwè.

⁶⁶ Mpindyewu, eci ncìndì mwa kwamba anu bu ne mèmè mwinè ngudi wakula. Ndi ngeela meei ne kale wàwa kumpalà kwa kabùtù kàà mvula ya Noà, kale mu matùkù a Yobò, ne bikwabo, bàvwa bàlama dìbà ku mitooto. Nenku tudi tuumvwa bàmba, anyi kale kumpalà kwa cikondo aci ne, buloba bìvwa bwimàne bululàme. Ne pashìshe mu mpekaatu wàkenza muntu awu, ki ditònkodiibwa dya buloba, bwàkasendama ne mvula ayi yàkalwa, ki bwa cinyi tukàadi ne mabwe manene a mashika, ne bikwabo, nenku lusongo lwònsò ne ntàku wa buloba mbyùle ne mabwe a mashika. Aci tudi bamanyè. Nenku buloba kí mbusòmbe bululàme to. Mbusòmbe busendàme. Aci ncyàkabùnyùkushà, e kubuumusha mu mwaba wàbù dìbà adi, wùvwàbo bàtàngidila ngondo ne mitooto awu. Anyi—anyi, kí mbafwànyine kabidi kulama dìbà ku byòbi abi to, bwalu bùkaadi buyè luseke, bushààle busendàme. Ki bwa cinyi, kí mbufwànyine kupetangana ne mitooto ayi pa dìbà dimwedimwe adi to, bwalu mbu—mbupampalàmùke ku mitooto ayi. Nudi bumvwè anyi? Ngeela meei ne ki cidì bwalu ncyòci aci.

67 Mbushààle bulààdile paanyima mu mushindu awu. Nenku aci cidi anu cileeya ne eci cidi anu cipungu cya cikondo. Kanwènaayikù mwa kumòna anyi? Nzambi kàtu ne bintu bipampàlààmùke nansha. Ùdi ùbilekela anu byènda mushindu awu bwa cikondo cikese cyanàànà. Ne ndi cya bushuwa ngiitabuuja ne cintu aci ncyàkenzekà.

Nenku ku matùkù a ndekeelu eku nkwàbuulwilà Nzambi Ekeleeziya minsokòntù eyi. Kàtu mucyènzè kumpàla nansha. Ne cidiYè kàyì mucyènzè, mbwà kulama Ekeleeziya mwikàle mutàbàle ne ùsambila dìbà dyònsò, kàyì mumanyè dìbà divwàci mwa kulwa to. Kadi nudi bavùlùke ne, mu Danyèlè 12, Yéyè mmwambe ne: “Bàdi ne lungènyi nebùmfwè ku ndekeelu, mu ditùkù dya ndekeelu edi.” Nwamònu anyi? Cyàkamupèèbwa.

68 Nyuma wa lungènyi ùdi ùlwa mu Ekeleeziya, bwa kumanyisha Ekeleeziya, ku dibuulula dya Nyuma Mwímpè, ùbweja Ekeleeziya ne ùbuulula ne nditùkù kaayi ditùdi ne mwoyi. Bya mwomumwe anu mwàkalwà Ngabùdyèlè kùdi—kùdi Danyèlè amu, Nyuma Mwímpè ùdi ùlwa kùdi Ekeleeziya mu matùkù a ndekeelu, bwa kubuulula bintu binène, bya ndòndò, bisokòme ebi. Nuumvù mpindyewu anyi?

69 Mpindyewu, aci's ncifwànyine kutònkola cidimu cya maalu a mabùlunga anyi cidimu cya Julien, kabala-matùkù aku, nwamònu's, cidimu cya ba-Franc-maçons, bwalu buloba mbusendàme. Aci, twètù bònsò tudi bacimanyine ku dilonga dya mu tulaasa. Nenku mbupampàlààmùke, ki bwa cinyi yòyi, mitooto ayi, ki mmifwànyine kujaalamangana ne buloba dìbà òmwèdimwè adi to. Ki bwa cinyi, kabala-matùkù kàà cyena Loomò nkabi, kòkò pàakù, bwalu kwèna mwa kululamija matùkù to. Kùdi anu bintu byàbùngi bìndi mufwànyine kwamba mwab'ewu mene. Bwa apu tudi tujandula, ku bufùki bwòbù bwine ne, bùdi bùtulongesha ne kùdi matùkù anu makumi asatu bulubulu mu cidimu.

70 Mpindyewu, twàngatàayi Bwàkabuulwibwà mutwikalà ne cya kuya kaaba aka mu matùkù a bapròfetà babidi abu. Bible mmwambe ne: “Bàakamba cipròfetà munda mwa matùkù cinunu ne nkàma yibidi ne makumi asambombo.” Mpindyewu, paùdi wangata kabala-matùkù kàà maalu a mabùlunga, ncyà bushuwa ne ncifwànyine kupangila anu menemene bwa kwikala bidimu bisatu ne cyàbìbidì cimwe. Ne paùdi wangata kabala-matùkù kàà cyena Loomò katùdi naaku leelu ewu aka, ncifwànyine kuçipangila kule ne kule. Kadi paùdi wangata kabala-matùkù kàà cipròfetà, mùdi menemene anu matùkù cinunu ne nkàmà yibidi ne makumi asambombo, pa kubala matùkù makumi asatu ku ngondo. Nwamònu anyi?

71 Tudi ne matùkù makumi asatu mu yìmwè ngondo, makumi asatu ne òmwè mu udi ulonda, makumi abidi ne mwandamukùlù mu mikwabo. Nwamònu's, tudi bònsò

mu cibwejàkàjì. Kadi Nzambi kàtu ùya naabi mànkònya, wàbànda wàpweka, wàtwa kumpàla wàtwa paanyima to. Ùdi Yèyè ùcilenga anu mushindu wumwewumwe awu. Eyowa's, mukalenge. Mushindu anu wumwewumwe awu menemene, matùkù makumi asatu mu ngondo; kabiya bya makumi asatu ne òmwè, pashiishe makumi asatu, cintu kampànda cikwabo to. Nwamonu anyi? Kadi byònsò abi mbìvwà byenza mu cibùcilu cinènè cya Nzambi, bwa kulama Ekeleeziya mwikàle mutàbàle ne ùsambila, mudilongòlòle, biikàle ne bivwàlù byenu bisukula mu Mashi a Mwànà wa mukooko. Kadi, kaa, mu matùkù a ndekeelu aa, Yèyè mmulayè! Uh-huh. Mpindyewu tudi bamòne mwaba wutùdì ne mwoyi. Mpindyewu, vùlukàayi, kiipàcilà, kiipàcilà kamwèpelè, nkàà kwenza cyòci eci.

⁷² Mpindyewu, bu kwikàle mwandamutekète... Tàngilàayi, kùdi anu matùkù makumi anaayi ne citeema bulubulu... bidimu makumi anaayi ne citeema's wè, eyowa, mu cikondo cya diibaka dya ntempèlù aci. Mwandamutekète awu, mmbingu mwandamutekète ya cipròfetà, mbingu mwandamutekète, bwalu kùdi mbingu mwandamutekète mikòsela ntempèlù, bwa kwibakulula ntempèlù. Ne wàkiibakiibwa anu mu bidimu makumi anaayi ne citeema bulubulu. Mpindyewu tudi ne dyumvwija dya cikondo aci cya mbingu, bwalu piikalàbi ne Bible ngudi mwambe, Mwanjelo ngudi mwambe, mbyangàte mbingu mwandamutekète too ne ku diibaka dya ntempèlù. Nanku cívwa anu bidimu makumi anaayi ne citeema bulubulu bwa kwibaka ntempèlù, kuumukila—kuumukila ku matùkù 14 a ngondo mwisàtu too ne ku 5—538 kumpàla kwa Kilisto. Too ne pàakalwà ntempèlù kwalujuludiibwa cyàkàbìdì, ne ku dyalujuludiibwa dya mìsèsù, bidimu makumi anaayi ne citeema bulubulu. Pa nanku, citùdì tupeta ncinyi? Citùdì tupeta ncinyi? Bwalu, piikalàbi ne mbingu mwandamutekète bìdì byènza bidimu makumi anaayi ne citeema, dîbà adi lumingu lùmwe's lùdì bidimu mwandamutekète. Ne mwandamutekète kuvudija ku mwandamutekète bìdì byènza makumi anaayi ne citeema. S'ncyòci menemene. S'ki bwalu mbwòbù abu.

⁷³ Pa nanku mpindyewu kakùcyèna kabidi bya difwikakaja pa bwalu abu to. Twàmanyi mpindyewu ne lumingu ne lumingu lùvwa luumvwija bidimu mwandamutekète. Nwacyùmvù anyi? Tùcyàmbàayi bònsò pàmwe. “Lumingu lùmwe mmwomùmwe ne bidimu mwandamutekète.” Bwa mpindyewu kaayi tudi bamanyè ne twacyùmvù. Lumingu lùmwe mmwomùmwe ne bidimu mwandamutekète.

⁷⁴ Ki twètù *aba*, kaaba aka mene, lumingu lwà kumpàla. Bidimu makumi anaayi ne citeema bwa diibakulula dya ntempèlù. Mpindyewu, mushoonyi wà ku lusongo ewu wùdì wùleeja ditungà dya beena Yudà pàdìwu wùkòsolola apa. Eci cìdì anu cikondo cyanàànà. Ne pàdìwu wùpweka kaaba aka, wùdì wùpweka wùpàtuka mu ditungà dya beena

Yudà, wùkabwela mu cikondo cya bàà Bisàmbà bya bendè. Pashiishe wùdi wùbànda cyàkàbìdì wùkabàkula Izaleela, ne wùtùngunuka.

⁷⁵ Mpindyewu, bàà Bisàmbà bya bendè kabàtu babàkòsèle cikondo to. Mbambe anu ne: “Cikondo cya bàà Bisàmbà bya bendè.” Kadi tudi tusangana ne, nansha Yesu mwine kààkabàkòsela cikondo kampànda to. Bwalu tudi tusangana kaaba aka, mu Luukà 21.24, Yèyè mmwambe ne: “Nebàdyatakajè ku makàsà bimanu bya Yèlusàlèmà too ne pààlwà bàà Bisàmbà bya bendè. . .” Imànaayi nteelè aci. Ndi ncitèèla ku mwoyi’s. Imànaayi ncibalè, bwalu neciikalè pa mukàbà wà mèyi apa, nenku tudi baswe kwikala batwishibwe ne tudi bacyūmwè bīmpè. Eyo, nwènù baswe kubuululakù pāmwè naanyì mu mwaba awu, mu Luukà Munsantu 21.24. Ndi mulongè cyòci eci bitòòke tòò, ne mwànyì mwònsò.

Ne nebàponè ku lusongo lwà mwelè wà mvità, ne nebàye naabò. . .

BàdiYe wàmba aba mbanganyi? Beena Yudà. Aci cìvwa ndibùtudiibwa dya ntempèlù, mu cidimu cya 70 cya bikondo byetu ebi.

. . .ne bôbò nebàye naabò mu bupika mu matùnga ònsò, . . .

Mpindyewu vùlukàayi ne, kī ng’anu mu Baabùlònà nkààyaamù to, kī ng’anu mu Loomò nkààyaamù to, kadi mu “matùnga ònsò.” Ki mùdì beena Yudà bàsanganyiibwa leelu ewu, “matùnga ònsò.”

. . .ne Yèlusàlèmà neàdyatakajiibwè ku makàsà kùdì bàà Bisàmbà bya bendè, too ne pìikalà cikondo cya bàà Bisàmbà bya bendè cyùle.

⁷⁶ Nenku, ki cikondo cikòsa aci, kadi muntu nansha umwe kī mmumanyè ne neciikalè dībà kaayi to. Nwamùnu anyì? Mbwalu busokoka, nwamònu’s, cikondo cya bàà Bisàmbà bya bendè aci. Kadi, beena Yudà. . . Nenku, katwèna mwa kumanyina cikondo pa bìdì bitàngilà Ekeleeziya to, nansha Yèyè mutwè cimpìngà anyì nansha Yèyè mutùngùnùke, anyì nī ncinyi cidiYe wènza. Kwèna mwa kumanyina ku aci to. Kadi, tàngilàayi beena Yudà, ki kabala-matùkù kàà cikondo. Nudi nucimòna anyì? Nzambi ùtu cya bushuwa mubàkòsèle ditùkù, dībà, ne cikondo menemene, kadi Yèyè kàtukù mubikòsèle bàà Bisàmbà bya bendè to. M’Mukòsèle beena Yudà, pa nanku tùtangilàayi beena Yudà, dībà adi netùmonè mwaba wutùdì.

⁷⁷ Mpindyewu, mpindyewu, mbingu mwandamutekètè yìvwa mbidìmu makumi anaayi ne citeema. Twacyūmvù mpindyewu bitòòke tòò ne, lumingu lùmwè alu lùdì—lumingu lùmwè lùdì bidìmu mwandamutekète; lumingu lùmwè, bidìmu mwandamutekète.

⁷⁸ Mpindyewu mbatwãmbile ne: “Kuumukila ku dipàtuka dya dîyì ditùma...” Mpindyewu, ki mwaba wùdì lutàtù lùlwa ngwôwò ewu. Mpindyewu mbatwãmbile ne:

...kuumukila ku dipàtuka dya dîyì ditùma bwa kwibakulula cimenga too ne ku Maasiyà (ne Maasiyà awu ùvwa n’Kilisto, mu bushuwa bwa bwalu) nekwikalè mbingu mwandamutekète, ne mbingu makumi asambombo ne yibidi; (byènza mbingu makumi asambombo ne citeema)...

Nwamònu anyi? Eyo. Ne mwandamutekète kuvudija ku makumi asambombo ne citeema bidi byènza bidimu nkàmà yinaayi ne makumi mwandamukùlù ne bisatu. Mpindyewu, nudi nucifùnda anyi? Nwènù baswe bwa ncyãmbùlùlè kabidi, nêngiikalè ne disanka bwa kucyènza.

⁷⁹ Mpindyewu mbatwãmbile ne: “Kuumukila ku dipàtuka dya dîyì ditùma bwa kwibakulula cimenga, too ne ku Maasiyà, nekwikalè mwandamutekète,” (mwandamutekète, ayi nyà kumpàla—ya kumpàla, apa mene) “mbingu mwandamutekète, ne makumi abidi misangu yisatu ne yibidi,” byènza ne, makumi asambombo ne yibidi kusangisha ne mwandamutekète mmwomùmwe ne makumi asambombo ne citeema, mbingu makumi asambombo ne citeema. Mwandamutekète kuvudija ku makumi asambombo ne citeema bìvwa mwa kwenza bidimu nkàmà yinaayi ne makumi mwandamukùlù ne bisatu. Ki bwa cinyi, too ne ku Maasiyà... Mpindyewu tukàadi tuseemena ku citùpà eci kaaba *aka*. Too ne ku Maasiyà, kùdi ne cya kwikala bidimu nkàmà yinaayi ne makumi mwandamukùlù ne bisatu, bidimu nkàmà yinaayi ne makumi mwandamukùlù ne bisatu.

⁸⁰ Mpindyewu, mpindyewu, Yesu, Maasiyà, wàkabwela mu cimenga cya Yèlusàlèma, bu mucimunyi, mubànde paanyima pàa kampundu katòòke, mu Dyàlumingu dya Malala, mu matùkù a2 a ngondo mwinâyì, cidimu cya 30 cya bikondo byetu ebi. Yesu wàkabwela mu Yèlusàlèma mu Dyàlumingu dya Malala, mu cidimu cya 30 cya bikondo byetu ebi. Nenu mpindyewu, mpindyewu, kuumukila ku cidimu cya 445 cya kumpàla kwa Kilisto too ne ku cya 30 cya bikondo byetu ebi, kùdi bidimu nkàmà yinaayi ne makumi mwandamutekète ne bitaanu bulubulu.

⁸¹ Kadi, anu mutùkaadi bamanè kumòna, mbingu makumi asambombo ne citeema yidi yènza bidimu nkàmà yinaayi ne makumi mwandamukùlù ne bisatu. Mpindyewu. apu mpàdì lutàtù lùlwa, anu apu mene. Nwamònu anyi? Tudi anu, bwa ku bidì bifùnda mu Bible emu, cikondo, anu ne bidimu nkàmà yinaayi ne makumi mwandamutekète ne bitaanu. Kadi, mu bushuwa bwa bwalu, bìdi mbidimu nkàmà yinaayi ne makumi mwandamukùlù ne bisatu, dishiilangana dya bidimu mwandamukùlù.

⁸² Mpindyewu, Nzambi kèna mwa kwenza bwa bipangilè to. PìikalàYe mwambe ne nebiikalè matùkù búngì kampànda, bìdi anu matùkù búngì abu. Yéyè mwambe ne mbúngì kampànda, bìdi anu búngì abu. Pa nanku citwènzà twètù ki cinganyi? Mpindyewu, bidimu bya 475 kumpalà kwa Kilisto too ne ku cya 30 cya bikondo byetu ebi abi, abi mbidimu bya kabala-matùkù kàà Julien anyi kàà maalu a mabùlunga, bìdi ne matùkù nkàmà yisatu ne makumi asambombo ne ataanu ne cyàbinaayi cimwè dya ditùkù ku—ku cidimu. Kadi patùdi tukèèpesha matùkù awu bilondèshile kabala-matùkù kèètù kàà cipròfetà . . .

⁸³ Mpindyewu ngánjì kwimana apa bwa katanci kakese cyanààna. Bwa nwènù kumanya kakùyi mpatà nansha ya kànà ne, ncyèna anu mufwànyine kwangata kaaba kàmwè aku to. Ndi mwa kubyàngacila mu kaabujimà kàà Mifùndù bwa kunùjaadikila ne matùkù mwandamutekète awu ngwòwò mwandamutekète awu, lumingu lùmwe lùdi—lùdi bidimu mwandamutekète, mu Bible. Ndi mfùma ku dicyènza apa, mu Bwàkabuulwibwà nshapità wa 13, anyi nshapità wa 11 ku mvensà mwi3. Bapròfetà abu nebènzè cipròfetà munda mwa matùkù cinunu ne nkàmà yibidi ne makumi asambombo, cìdi munkaci mwa lumingu lwà ndekeelu lwà beena Yudà, pashìishe bàdi bàkòshiihwa ne mvità ya Amàgedô yibanga. Dìbà adi byòbì nanku, ki cyòci kabidi, mmatùkù anu makumi asatu menemene mu ngondo. Nwamònu anyi? Nenku, kabyèna—kabyèna bya matùkù makumi asatu ne òmwè ne bya matùkù makumi abidi ne mwandamukùlù, ne bikwabo abi to. Bìdi anu matùkù makumi asatu menemene mu ngondo, musangu wònsò.

⁸⁴ Kabala-matùkù keetu kàà cipròfetà kàdi kàya neetu ku matùkù nkàmà yisatu ne makumi asambombo, mutùdi tukwàta mudimu mpindyewu mu Mifùndù. Tudi menemene anu ne nkàmà yinaayi ne makumi mwandamukùlù ne isatu. Ki bwalu abu's, nkàmà yinaayi ne makumi mwandamukùlù ne isatu. Ki twètù aba anu menemene ne cileeji cya cipròfetà, bulelèlà anu bwètù bwa menemene ebu. Bwalu, kuumukila ku cikondo cya dipàtuka dya òyì dya kwibaka ntempèlù, too ne ku dibùtudiibwa, pàakabèngàbo Kilisto ne kuMushebeyabò mu cidimu cya 33 cya bikondo byetu ebi, pàakashebeyiibwà Kilisto, kùdi anu menemene bidimu nkàmà yinaayi ne makumi mwandamukùlù ne bisatu.

Mpindyewu, kuumukila ku dipàtuka dya òyì ditùma bwa kwibakulula Yelusàlèmà, mbingu mwandamutekète nyàkakòshiihwa, cìvwà cyùmvwijà bidimu makumi anaayi ne citeema. Nenku bidimu makumi anaayi ne citeema abi kukùmbanabi anu bulubulu. Ee, kuumukila ku diibakuludiibwa dya ntempèlù too ne ku Maasiyà, kùvwa bidimu nkàmà yinaayi ne makumi asatu ne mwandamukùlù. Pa nanku, nkàmà yinaayi ne makumi asat- . . . nkàmà yinaayi ne makumi asatu ne binaayi. Ne nkàmà yinaayi ne makumi asatu ne ne yinaayi (cikondo),

makumi anaayi ne citeema, bìdi byènza anu menemene bidimu nkàmà yinaayi ne makumi mwandamukùlù ne bisatu. Ncituutè anu mu cyôci, anu ditùkù menemene, ku ditùkù too ne ku ditùkù. Amen! Ki bwalu abu's.

⁸⁵ “Maasiyà Mfumu neàlwe.” Nwamonu anyi? Mwandamutekète kuvudija ku makumi asambombo ne citeema mwomunwe ne nkàmà yinaayi ne makumi asat-...ne—ne makumi mwandamukùlù ne yinaayi ya bidimu. Ncituutè anu mu cyôci, menemene. Pa nanku, díbà adi, tudi bamanyè anu bipwàngàne, tudi bamanyè anu menemene ne, Mufundù awu ngwà cya bushuwa. S’ki cyôci eci. Kadi, nudi numòna’s, yònsò eyi. . .

⁸⁶ Pàvwà Nzambi mubùtùle buloba bwa kumpala kwa mvula ya Noà ku máyi, ne mushintùlùle matùkù a ngondo a maalu a mabùlunga; ne pashiishe mulekèle beena Loomò babwelè ne bakwàtàkàje kabala-matùkù kaabo bóbò, kàdì kènza kutuuta kadi kutùpika, ne bikwabo apu. Ne mémè, ndi ngeela meeji ne, nansha mene mu mukàndà wa cibungu mùmvwà mbala. . .

⁸⁷ Byòbì biine, ambà tǔng, Mwanèètù Kenny Collins, yèyè mwine ùdi mu citanda emu mu dinda emu anyi, Kenneth Collins? Udi mumanyè paùvwà muntùmìne cisumbu cinene cya mikàndà yà bibungu aci anyi? Udi muvùlùke cyôci aci anyi? Uvwa muntùmìne kuntu kwàka pàmwè ne màshinyi majimà tèntè a cisemuna a bibungu abi. Mémè kudyàmbidila ne: “Ncinyi cìdiku muntu wa kàyi mumanyè cintu ciine bu mémè ewu mufwànyine kwenza ne byònsò abi?” Udi mumanyè’s, Mukalenge nguvwa ukulombola awu, Kenny. Mwómò amu ki mùndi mupetèle maluba aa, anu mu mukàndà wà kale wà cibungu awu, “cikondo,” ne mùmvwà ndonga. Ne Becky ùdi ùkwàta naabi mudimu mu cilongelu cyabo. Ndi naabi mu bíro byànyì amu, mu cibambalu cyànyì cya ciikishilu cya mwinshì mwa buloba aci. Ki twètù kupwekamù ne kucyàngata, ne twètù kutàpamù dísù, ne kucisangana, anu menemene, mu tubala-matùkù twònsò ne bikondo bikaadìku kacya abi. Nwamònu anyi? Pa nanku, twètù kucipeta.

⁸⁸ Ki cyôci aci, anu menemene, bidimu nkàmà yinaayi ne makumi mwandamukùlù ne bisatu. Kuumukila ku dipàtuka dya díyi ditùma bwa kwalujulula—bwa kwalujulula nzubu awu, too ne ku cikondo cìvwà Maasiyà Mfumu mubèngiibwe, bìdi byènza anu menemene bidimu nkàmà yinaayi ne makumi mwandamukùlù ne bisatu, bilondèshile kabala-matùkù aku.

⁸⁹ Mpindyewu nudi numòna ne, twètù tudi tukwàta mudimu ne kabala-matùkù kamwekamwe aku mwab’ewu mene. Bwalu, bu Nzambi mwa kukwàta mudimu ne kabala-matùkù aka, díbà adi’s bìkèngela Yèyè kukwàta naako mudimu mu bikwabo bikondo abi mu Bible mujimà. Ncya bushuwa anyi? Nzambi kàtu ùshintuluka nansha. Pa nanku, piikalàbi ne

mbingu mwandamutekète yìwva bidimu makumi anaayi ne citeema, mbingu mwandamutekète cyàkàbìdì's yìdi bidimu makumi anaayi ne citeema. Lumingu lùmwe lùdi bidimu mwandamutekète, nwamònu's, pa nanku bìdi byènza ne cìikalè anu cipwàngàne. Ne piikalàci cikùmbanangana anu menemene mwaba awu, necikumbànnganè anu menemene cyàkàbìdì. Amen! Kaa, ekelekele! Aci's cìdi cìnsalula anu mèmè yònsò. Kaa, ntu—ntu—ntu munange, ntu munange kumanya bìndì ngamba. Ntu—ntu—ntu mucinangè.

Bwalu, anu mwàkambà mukùlumpè awu, mu Kentucky mwàmwa, ùngambila mèmè, wàmba ne: “Mèmè ntu muswe kutèleja muntu kampànda wàkula, udi mumanye bìdiye wàmba.”

Mèmè kwamba ne: “Nansha mèmè pàànyì, ntu munange nanku awu.”

Kwambayè ne: “Ki lutàtù lunùdì naalù nwènù bayiishi, kanùtu bamanyè binùdi nwamba to.”

⁹⁰ “Ee,” mûngààkambà, “Mèmè ndi ngaanyisha kààlumbandi keebe aku, kadi's kùdi bimwè bintu mutùdi cya bushuwa bamanyè bitùdi twamba.” Uh-huh. Ncya bushuwa. Mèmè ndi mumanye ne ndi mulediibwe cyàkàbìdì. Ndi mumanye ne ndi muumùke ku lufù muyè ku Mwoyi. Ndi mumanye ne kùdikù Nzambi, bwalu nkààdikù mwakùle Nendè.

Nkààdikù muMuumvwe wàkwila kùndì, ne wàkula naanyì, ne wàkula ne bakwabo, ne ùngambila bwa bakwabo. Ne ndi mumanye ne Yèyè ùdi Nzambi. Aci ncyà bushuwa. Yèyè wàkapetakù musàngèelu wà kupweka ne kulekela ndikwàcisha Nendè fòtò, cìdi beena maalu a mamanya kabàyikù mwa kuvila to. Ne pàndì mbuulula mu Mifùndù ndi mumòne ne aci mbwà kuuja anu menemene cikondo cya ekeleeziya eci, anu menemene cìdi cyènzekà, mu mushindu wà ne ndi mmanye ne ki kutùkaadi. Amen.

⁹¹ Mpindyewu, tudi mwa kwikala katùyi balongè tulaasà to. Tudi mwa kwikala katùyi bantu bàà tuyaayi tükamòne to, ne bikwabo bya nanku awu. Tudi mwa kwikala katùyi bantu bàà myanzù mitùmbùke to, kadi bwa Nzambi kaayi tudi baMumanyè. Tudi baMumanyè bwalu kùdi Nyuma Mwimpè, nwamònu's, ne bìdi bìpetangana ku Mwaku ne ku Mwaku mu Mifùndù yònsò nkòòng, díbà adi's tudi tumanya ne mbilelèlè. Tudi ne mwoyi mu matùkù a ndekeelu.

⁹² Mpindyewu, mwaba awu, vùlukàayi mpindyewu, ne, cidimu cya cipròfetà eci, cya matùkù nkàmà yisatu ne makumi asambombo mu cidimu eci. Tàngilàayi bikwabo bintu byònsò. Bufùki, bamwe bàà kunùdì ní bàdikù mwa kuumvwa, nansha pa bìdi bìtangila bakàji, ne bikwabo. Nwamònu anyi? Makumi asatu, matùkù makumi asatu, cimònaayi anu cyanàànà—cìdi . . . Bufùki bwònsò mbulongolola mushindu awu. Nwamònu anyi?

Kí mmakumi asatu ne dimwe, makumi asatu, makumi abidi ne mwandamukùlù, anyì cintu kampànda nansha. Bidi anu menemene matùkù makumi asatu. Bwa cidimu ne cidimu cyònsò, ki kabala-matùkù kàà cipròfetà aku, anu matùkù nkàmà yinaayi ne makumi mwandamukùlù ne asatu menemene.

⁹³ Apa tudi ne cileeji mu cyòci cya cipròfetà, bidimu nkàmà yinaayi ne—ne makumi anaayi ne bitaanu, kumpàla, ki cìvwà anu cyòci menemene. Mpindyewu, byònsò abi bìvwà byamba mu cipròfetà ne nebyènzekè. Ne mbingu makumi mwandamutekète ayi kayààkuulakù musangu awu to, pa nanku mmishààle bwa matùkù a ndekeelu mpindyewu.

⁹⁴ Mpindyewu, nwènù bânà beetu beena Mpenta, mpindyewu, nwènù bânà beetu Bantèmù bàà Yèhowàh, nudikù nufika ku dyumvwa anyi? Nudi bamanyè mwaba wùdì binunu lukàmà ne makumi anaayi ne binaayi abu bamwènekèle anyi? Nudi bamanyè mwaba wùdì bishimà binène byònsò bya Bwàkabuulwibwà abi bimwènekèle anyi? Mu cikondo cya beena Yudà, kí mmu cyetu twètù to. Kakwèna cintu nansha cimwe citèèlamù to, anu Ekeleeziya mwikàle ùdìlongolola ne ùpàtuka. Bushuwa, ne bukolè bwa Nzambi, tudi twenza bishimà ne maalu manene. Aci kaayi tudi bamanyè. Kadi cintu menemene cìvwa apa kùdì beena Yudà; ndi nswa kwamba, bukolè bwena dìinà, bùdì bwènta maalu, bùdì bwènta bishimà. Binaayi . . .

⁹⁵ Binunu lukàmà ne makumi anaayi ne binaayi abu kabèèna bàmwènekela amu to. Bòbò bàdi . . . Kabèèna bàmwènekela mu nshapità mwi3 to. Bàdi mu Mifùndù amu, kumpàla kule. Nenku mpindyewu tudi tumòna ne bintu byònsò bìvwà ne cya kwenzeka ebi, bìvwà mmu cikondo cya lumingu lwà mwandamutekète eci, lumingu lwà ndekeelu elu. Mpindyewu, pìikalàbi ne bòbò bàkaadi bamanè kwangata mbingu makumi asambombo ne citeema, ne bayipìcishe anu menemene mwàkambà Nzambi ne mbayipìcishe amu, ne byenzèke anu menemene mwàkambà Nzambi ne bìvwà mwa kwenzeka, dîbà adi's kùcidi kabidi lumingu lùmwè lulaya beena Yudà. Mpindyewu, bânà beetu, dìlongòlòlàayi anu cyanàànà. Nwamònu anyi? Nwamònu anyi? Tèèjàayi mutùkaadi pabwìpì. Lumingu lwà ndekeelu, mwandamutekète, cidimu cya mwandamutekète.

⁹⁶ Mpindyewu, bantu bònsò mbumvwèku too ne apa anyi, panwikalà bumvwè? Bantu bònsò mbumvwè too ne apa ne, m'Bulelèlà anu bwetu bwa menemene ebu. M'Bible. Mbidimu bya cipròfetà.

⁹⁷ Mpindyewu twáfiki too ne mwaba awu, ne twabyàngàcìdì apa too ne ku dibèngà dya Maasiyà, nwamònu's, kuumukila ku . . . too ne ku dibèngà dya Maasiyà, lumingu lwà ndekeelu.

⁹⁸ Mpindyewu, ndi muswe kwimana anu apa bwa katancì kakese cyanàànà bwa kuumvwijakù eci. Ne, pàkabèngàbo Maasiyà, mpàvwàbo, mu bushuwa bwa bwalu, babènge Yesu bu

Musùngidi, ne baMupoopèle pa nkùrusè. Vùlukàayi mwab'ewu cidi Bible mwambe ne: “Ne Yèyè neùmushiibwè, kadi kacyi Bwèndè Yèyè mwine to, Maasiyà, Mfumu awu.” Mpindyewu anji elàayibi meeji mùdi cipròfetà aci cituutè anu mu cyòci menemene. Ndi muswe kunùbwejacì. Cya ne, piikalàbi ne cipròfetà aci nciutuutè anu menemene mu ditùkù dya ngondo, anu menemene pa díbà, ne anu menemene mwàkambiibwàbi ne civwa mwa kwikala, lukwabo lwà mwandamutekète elu, mbingu mwandamutekète yidi mishàale eyi, anyi, bidimu mwandamutekète ebi's wè, (matùkù mwandamutekète: bidimu mwandamutekète), s'neyituutè anu menemene bilondèshile Mifùndù.

⁹⁹ Mpindyewu vùlukàayi ne, Yèyè wàkuumushiibwa, Maasiyà. Beena Yudà, Nzambi wàkalekela kutàngila bwalu bwàbò. Kabàakaya kule to. Díbà adi bàakatangalajiibwa kùdi Bukalenge bwalàbàle bwa Loomò. Nenku, díbà adi, nwènu bamòne pa dizòlà dyànyì edi, ndi muswe bwa nùdipetè mpindyewu ne nùdizòlè. Nudi bamòne pàndi mutèeke nkuruse apa anyi? Ki pàakaMubèngàbo apu. Kadi cikondo cyàkaleepakù anu kakese cyanààna pa cyòci aci, nwamònu's. Bwa cinyi? Makumi asatu, makumi anaayi, makumi ataanu, makumi asambombo, makumi mwandamutekète. Paanyimà pàa bidimu makumi anaayi, Tiitò, kalààlà kàa màsàlaayi kàa Loomò, kubùtulayè Izaleela, Yèlusàlèmà, ne kutangalajayè cisàmbà aci pa buloba bujimà. Nudi numòna's, Tiitò, paanyimà pàa bidimu makumi anaayi. Pa nanku, mu bushuwa bwa bwalu, cikondo cya beena Yudà cyàkaleepa too ne ku cijimà. . .

¹⁰⁰ Nzambi kàvwa ùtàngila bwalu bwabo to. Yèyè ùvwa ùtàngila bwalu bwabo anu too ne pàakabèngàbo Kilisto apu. Díbà adi pàakapoopelàbo Kilisto pa nkùrusè, bàakeela lubilà ne: “Mashi Èndè ikalè pambidi peetu ne pàa bânà beetu balela,” ne cyàkenzeka nanku kubangila anu apu. Kadi kumpàlà kwa bôbò kutangalajiibwa. . . Tèèlejàayi! Kaa, mwanèètù! Kumpàlà kwa bônso kutangalajiibwabò pa buloba bujimà, byàkangata Nzambi bidimu bitwè ku makumi anaayi bwa kushimbula ntempèlù ne kubàtangalaja pa buloba bujimà. Kadi Nzambi wàkapanga kutàngila kabidi bwalu bwabo. Nzambi wàkapanga kutàngila kabidi bwalu bwabo.

Wàkatungunuka ne kutàngila bwalu bwa bàa Bisàmbà bya bendè. Aci nudi bamanyè, nwacyũmvù mpindyewu anyi? Mpindyewu, apa mpatùdi tubangila mu bikondo bya ekeleeziya, cikondo cya bàa Bisàmbà bya bendè, Nzambi kule ne beena Yudà.

¹⁰¹ Mpindyewu, wèwè mwanèètù missionnaire, wa kùdi—kùdi—kùdi beena Yudà, mwanèètù munanga wa mushinga mukole kaaba aka. Apa mpàndi muswe bwa wèwè kubàkwila aci ne kucyũmvwa. Nwamònu's, Nzambi wàkiimanyika ditàngila dya bwalu bwa beena Yudà anu apu, bwalu Nzambi misangu yònsò

ùtu ùtàngila bwalu bwa Izaleela anu bu ditùnga. Tudi bônso bamanyè ne Izaleela nditùnga. Bàà Bisàmbà bya bendè bàdi cisàmbà, ne byàkakèngela bwa kwangataYè cisàmbà munkaci mwa bàà Bisàmbà bya bendè, bwa Dîna Dyèndè. Netùkafikèku mu katanci kakese emu.

¹⁰² Kadi mpindyewu, mu bikondo mwandamutekètè bya ekeleeziya mutwàlongù amu, mu cikondo cya bàà Bisàmbà bya bendè, kuumukila ku dipoopediibwa dya Kilisto pa nkùrusè too ne kundekeelu kwa bikondo bya ekeleeziya. Mpindyewu twàpèci aci. Tudi bacìlongè, too ne kundekeelu. Mpindyewu tukàadi tukafika mwaba wutùdi mwa kulenga cyòci eci, kubwela mu Bitampì Mwandamutekètè, Mpànza Mwandamutekètè, Mpungi Mwandamutekètè, ne byònsò abi, ne kubileeja byònsò pàmwe mu bimfwànyì; byònsò bitàngila beena Yudà, ne dilumbulwisha dya bantu bàdi pa buloba kùdi Nzambi. Ne bàshàadilè . . .

¹⁰³ Vùlukàayi ne, mu cikondo cinène cya dikengeshiibwa eci, nekwikalè miliyò ya bàà Bisàmbà bya bendè biikalà mwa kufwàmu. Mukàjì-musela mubèngiibwe awu, bàshàadilè bàà dimiinu dya—dya mukàjì abu, virgo mukùtakàne awu, yèyè neàpicilèmu buludì. Cyòci's—cyòci's ncitòoke anu mùdi mbingu makumi mwandamutekètè eyi; citòoke anu tòò. Ne bôbò nebàpicilèmu. Pa nanku, wèwè kùyi ne Nyuma Mwîmpè to, mbîmpè ùditwè mu diMukèba lukàsà ne mwebe mwònsò. Tudi ku cikondo cya nshìkidilu.

¹⁰⁴ Mpindyewu mònaayi, bikondo mwandamutekètè bya ekeleeziya. Mpindyewu, kabyàkunkèngela bwa kubikenketa nansha, bwalu tudi naabi pa mikàbà ya mèyi, ne bìdi munkaci mwa kufùndiibwa mu mikàndà ne bikwabo byònsò. Aci, aci cìvwa ncikondo cìdi Nzambi kàyikù mwambe ne nekwikalè matùkù búngì kampànda, mèbà búngì kampànda, anyì bidimu búngì kampànda to; Yèyè kàtukù mwambe cintu nansha cimwe to. Mmwambe ne: “Too ne pàajikà cipungu cya bàà Bisàmbà bya bendè.” Mmwambe ne: “Too ne!” Bimanu nebìdyatakajiibwè ku makàsà too ne pàalekelà Nzambi kutàngila bwalu bwa bàà Bisàmbà bya bendè.

¹⁰⁵ Mpindyewu, tudi tusangana ne, munda mwa biine bikondo ebi, tudi bapetè Nyuma Mwîmpè mulwè. Ne dîbà adi Nzambi, ku cibangidilu kwàka, ùkaavwa mubange kwamba dîbà adi, ku dibèngà dya Kilisto kwàka, Nzambi wàkaleeja Yone anu menemene cìvwa mwa kwenzeka mu bukòokeshi bwa bàà Bisàmbà bya bendè. Mpindyewu, nwamònu's, twètù katwènakù ne cikondo kampànda ciimanyika to, mùdi beena Yuda amu, kadi tudi twètù ne cimanyinu kampànda. Tudi ne—tudi ne dikunji dya cimanyinu. Ee, Nzambi mmwenze ne beena Yudà anu menemene cyàkambàYè ne Neènzè mu bidimu makumi asambombo ne citeema amu abi, anyì, bìvwa mbidimu nkàmà yinaayi ne makumi mwandamukùlù ne bisatu, kadi mbingu

makumi asambombo ne citeema. Ne lumingu lùmwè ndushààle, lumingu lùmwè lùcidi lukòsa.

¹⁰⁶ Mpindyewu, katwèna mwa kucyàngata bwa *apa* nansha, bwalu eci m'Bisambà bya bendè, Ekeleeziya. Mpindyewu, mbanganyì bàdi bumvwe aci? [Disangisha dìdi dyamba ne: "Amen."—Muf.] Mpindyewu, eci m'Bwàkabuulwibwà, kubangila ku nshapità wa kumpàla, too ne ku nshapità mwi3 mùdibo bàya neetu too ne mu Laòdikiyà. Mpindyewu, tudi tumòna anu menemene mùdibi ne cyònsò aci cìvwa ng'Ekeleeziya, bukwà'Èkèleeziyà bwòbù bwine. Nzambi kacya kí mmwelèmu ngènzàmpèkààtù to, yèyè awu ùdi anu. . . ambà anu yèyè muswe kusùngidiibwa's. Kadi, bukwà'Èkèleeziyà abu bùvwa bwònsò butòòke; pashìishe kulwakù beena Nikàlàwù bàakaswà kwenza bulongolodi kampànda. Bantu bàà myànzù mitùmbùke bààkabwelamù. Eci cìvwa nku Nicée, Loomò, pààkenzàbo Nsangilu wa ku Nicée. Kadi cyàkenzàbo ncinyi? Bààkavwija ekeleeziya bulongolodi, pashìishe kubangabò kukèngesha beena Kilisto. Pashìishe, mu cikondo cya ekeleeziya cyàkalondà, pàmwè ne cyònsò, bwena Kilisto, mu mmwènekelu wa dibàtiiza dya Nyuma Mwìmpè, bwàkuumushiibwa bwònsò.

¹⁰⁷ Kadi dìbà adi, aci nwènù nudi bamanyè ne, ngàkaya kangata maalu-malonda, *Baataatù Bàà Ku Nicée*, ne *Baataatù Bàà Kumpàlà Kwà Nicée*, ne maalu-malonda ònsò a ekeleeziya, ne mifùndù ya kale menemene yìmvwàku mufwànyine kupeta ayi, ne cyònsò cya ku byòbi cyàkanujaadikila ne Ekeleeziya uvwa Nzambi wamba awu kàvwa ng'ekeleeziya wa Katolike uvwa muvwijìibwe bulongolodi awu anyi bulongolodi bukwabo nansha bumwe to. Cìvwa Nzambi wamba, ne mitooto yònsò minene ya bikondo ayi, bàvwa mbantu bàkalongeshà dibàtiiza dya Nyuma Mwìmpè, dibàtiiza mu Dìna dya Yesu Kilisto, ne dilwa dya Nyuma wa Nzambi, ne—ne dyakula dya mu myakulu, ne dyandamuna dya myakulu, ne dyondopa, ne bishimà, ne bimanyinu. Abi kí bidì Nzambi wàbanya. Yèyè kèna mwa kushintulula mmwènenu Wèndè nansha, kwamba ne: "Ee, ewu mmwènenu Wányi wa Ekeleeziya, Ekeleeziya wa bapostolo; bwa mpindyewu mmwènenu Wányi ng'ekeleeziya wa bantu bàà myànzù mitùmbùke." Nzambi kàtu ùshintuluka nansha! Cìcidi anu Nyuma Mwìmpè.

¹⁰⁸ Nénku tudi tutàngila ne tulwa naaci, dìbà adi, patùdi tumòna ngiikàdilù wa Nzambi ne cìdiYe. . . ne dìbà adi kupàtula Mufùndù Wèndè. Nénku pashìishe kwangata bwalu—bwalu-bulonda bùdi bùleejà ne cidi cituuta anu menemene pa kaaba; anu menemene pa ditùkù dya ngondo, pa dìbà, pa cintu cyònsò cìdi Nzambi mwambidile kùdi Yone ne, cìvwa mwa kwenzeka aci, cyàkenzeka mu cikondo cya bàà Bisambà bya bendè aci.

¹⁰⁹ Mpindyewu, tudi tudìsangana, kakùyikù mpatà nansha mikese to, mu Cikondo cya Laòdikiyà. Tudi bamanyè ne ki mutùdi tusanganyiiibwa. Tudi bapicìle mu Cikondo

cya ba-Luthériens; tudi bapicile mu Cikondo cya Wesley; mpindyewu tudi mu Cikondo cya Laòdikiyà, cikondo cya ndekeelu. Ne tudi tufika ku dyumvwa ne yònsò wa ku ekeleeziya ayi ùvwa ne musanjeela. Tudi tusangana nanku awu. Mitooto mwandamutekète mu cyanza Cyèndè, yivwà Nyuma Mwandamutekète yidi mipàtùke kumpalà kwa Nzambi. Umwe ne umwe ùvwa ne musanjeela. Nenku tudi tupweka ne tujandula, ku Bible, ngiikàdilù kaayi ùvwa musanjeela awu mwa kwikala nendè, ngiikàdilù kaayi ùvwa musanjeela awu mwa kwikala nendè. Nenku twangata muntu mu maalu-malonda uvwa ne yèyè ngiikàdilù awu awu. Ne pashiishe patùdi tupeta muntu awu mu maalu-malonda, uvwa ne yèyè ngiikàdilù awu awu, tudi tufika ku dijandula ne yèyè nguvwa musanjeela wa cyòci cikondo cya ekeleeziya aci. Pashiishe tudi tujandula Nyuma, ne civwà mwine muntu awu mwenzè. Ne tudi tujandula ne yèyè awu ùvwa munsantu mùle tètè ne Nyuma Mwimpè, Irénéé Munsantu, ne bakwabo bònsò abu, ne—ne Colomban Munsantu, ne bantu bònsò bàvwà bùle tètè ne Nyuma Mwimpè abu. Ne tudi bamanyè, ku Mufundù ne, mushindu wà Nyuma awu nguvwa ne cya kwikala pa muntu wa mushindu awu bwa cyòci cikondo aci. Ki bwalu mbwòbù abu, pa nanku kacýèna mwa kwikala cya mafi nansha. Amen! Butumbi kùdi Nzambi's wè! Aci cidi anu . . .

¹¹⁰ Ncyèna mumanye to, mwanèètù. Aci cidi ne bwenzèji kùndi kutàmba nì ncinyi nì ncinyi cyònsò cindiku mumanye, nwamonu's, bwalu n'Diyi dya Nzambi Dyòdi diine dyàkula. Pàndi ngumvwa Nzambi wàmba cintu kampànda, ndi ngamba ne: "Amen! Aci ncilelèlè. Ncyà bushuwa." Nwamonu anyi? Aci cidi cikòsa bwalu. Kwònsò nkujikè. "Nzambi ngudi mwambe." Aci, aci cyàmanyi bwalu.

Ee, Nzambi mmwambe ne necyènzekè mushindu awu, nenku pèètù tucisangana mu maalu-malonda ne ku Mifundù. Tuvwa mwa kubala pa bidì bitàngilà cikondo cya ekeleeziya eci, civwàci mwa kwenza, civwà mwa kwenzeka, musanjeela wa mushindu kaayi uvwakù bwa cyòci cikondo cya ekeleeziya aci. "Kùdi—kùdi mwanjelo wa ekeleeziya wa Laòdikiyà. Kùdi mwanjelo wa ekeleeziya wa Saadi, Twatilà," mikwabo yònsò mishiièshiièlàngàne eyi. Nenku twalukila mu maalu-malonda ne tupeta musanjeela wa—wa yèyè ekeleeziya awu, nenku tujandula ne ùvwa nganyi. Pa nanku dībà adi tuvwa tucizòla, tufunda mènà àbò mwinshi mwàci, nenku ki bòbò abu's. Nwamònu's, tudi bamanyè ne civwa cikùmbanangana anu menemene.

¹¹¹ Mpindyewu, kabidi tudi bamanyè ne Nzambi ùvwa, ùvwa misangu yònsò, ne ùtu misangu yònsò, anu ùbèngangana ne ntèndeleele mudìlongolwela. Eyowa's, mukalenge. Wàkacyàmba ne: "Beena Nikàlàwù, bàNdi mukine!" *Nickao* mbwena kwamba ne "kukwàta beena kwitabuuja ku bukòokeshi." *Beena kwitabuuja* mbwena kwamba ne, beena kwitabuuja mbwena

kwamba ne, “ekeleeziya, mubidi.” *Nickao* mbwena kwamba ne “kukwàta ku bukòòkeshi, kucimuna,” mu ngaakwilù mukwabo, “kuvwija muntu munsantu kampànda, muntu kampànda kumutù kwa mukwabo.”

Twètù bônò tudi bânà. Tudi ne Mfumu umwèpelè, n’Nzambi. Tudi ne Umwèpelè udi Munsantu, ne mwine awu n’Nzambi. Amen! Ne Yèyè ùdi munkaci mwetu emu, mu mmwènekeli wa Nyuma Mwímpè. Ki Munsantu n’Yèyè awu.

112 Mpindiyewu, tudi tupweka too ne patùdi tutwishiibwa anu menemene ne mu kupicila kwa mu ci—cikondo cya beena Yudà aci tudi anu menemene ne mbingu makumi asambombo ne citeema ayi, ku maalu-malonda, ku kabala-matùkù, ku cidimu cya cipròfetà cya Nzambi, twenda tuya ne maalu-malonda a kabala-matùkù kàà cipròfetà aku, tuumukila anu ku Dipungila Dikùlukulu too ne ku Dipyadipyà, ne biikàle tulejeja anu menemene ne ncintu cimwecimwe aci. Nwamònu anyi?

Mpindiyewu tudi ne ekeleeziya wa bàà Bisàmbà bya bendè kuumukila anu ku ntwàdijilu, too ne ku ditùkù dya ndekeelu, ne tudi tumanya ne tudi ne mwoyi mu ditùkù dya ndekeelu. Amen! Nudi nuumvwa anyi? [Disangisha didi dyàmba ne: “Amen.”—Muf.] Mpindiyewu, dîbà adi, piikalàbi ne tudi ne mwoyi mu ditùkù dya ndekeelu edi, kundekeelu kwa cikondo eci, tudi penyì dîbà adi?

113 Mònaayi, lwà paanyima menemene apa, nudi numòna ewu mushoonyi wùdi mwela paanyima lwà munda *emu*, mùvwà Nzambi ùtàngila bwalu bwa beena Yudà...Anyi, kàyikù ùtàngila bwalu bwa beena Yudà to, byàkaMwangata cikondo cile bwa kubàfikisha. ByàkaMwangata bidimu makumi anaayi bwa kubàfikisha mu ngiikàdilù uvwaYè mwa kubàbutwisha, mu matùnga ònsò. Mu myaba yònsò, mu matùkù a bàà Bisàmbà bya bendè, byàkakèngela bwa kubàfikishaYè mu ngiikàadilù awu kumpàlà kwa kufikishaYè Dìyi Dyèndè ku dyenzeka. Nudi numòna cìndi njinga kwamba anyi? Bônò bàdi bacyùmvwè bàmbe ne: “Amen!” [Disangisha didi dyàmba ne: “Amen!”—Muf.] Nwamònu’s, ndi muswe kwikala mutwishiibwe ne nudi nucyùmvwa.

114 Mpindiyewu cidi cyenzèke ncinyi? Bàndishàayi mèsù kuulu ku lusongo lwà cikondo cya ndekeelu cya ekeleeziya eci. Nudi numòna dileepesha dikese edi anyi? Matùkù a bàà Bisàmbà bya bendè àkaadi àjika. Nenku munda mwa bidimu makumi anaayi bya ndekeelu ebi, beena Yudà bàdi munkaci mwa kupingana ku Yelusàlèmà, bàalukila ku buloba bwabo. Aleluuyah! Nudi bamòne kutùkaadi aku anyi? Byàkakèngela bidimu makumi anaayi, kuumukila ku dyumushiibwa dya Maasiyà, too ne pàakalwà Tiiò kushimbula ntempèlù ne kutangalaja beena Yudà. Nkupite kabidi bidimu bikwabo makumi anaayi bidì Nzambi mupapishe myoyi yà ba-Pàlò bàà mishindu yònsò mu

myaba yònsò, ne kwaluja beena Yudà mu buloba bwabo. Kadi leelu ewu bàkaadi baalùkile cyàkàbìdì mu buloba bwabo, ne Ekeleeziya ùkaadi kundeelelu. Amen! Kaa, ndi—ndi—ndi nteeta anu bwa kubala's; ncyèna ne mushindu to.

115 Mònaayi, beena Yuda bàdi mu buloba bwabo, ne bàdi munkaci mwa kwalukila. Nwênù bapetè mukàndà wà *Dishùikila Dyà Mvità Yà Buloba Bujimà*, mupimbu mwibìdì, pàvwà Kalààlà kàà bàsàlaayi Allenby, paanyimà pàà Mvita ya Kumpàlà ya Buloba Bujimà, mulwe mu ndèkè kuulu kwa Yelusàlèmà ne mumubùcikile, ne mukwàte Yelusàlèmà. Ki beena Kilisto abu kwendabò mu Yelusàlèmà amu buumùshe bifulu ku mitù. Ki Allenby kudifilayè kàyì mutuutè cingoma nansha cimwe to, anyi—anyi, bòbò bààkadìfila kùdì Allenby, ba-Turcs abu. Ne kubangila anu apu, Nzambi wàkabanga kupapisha mwoyi wà Mussolini, mwoyi wà Hitler, mwoyi wà Stalin, myoyi ya bantu mu ditungà dijimà, bàkina beena Yudà abu.

116 Ki pashiishe nyuunyi ya minene menemene yàkatùùlukà ayi, yibìikidiibwa ne Ndèkè ya ku Esètè, anyi Ndèkè ya Amerike Mujimà, anyi, cyònsò cìvwàyì aci, ngeela meeji ne yìvwa yibìikidiibwa ne n'TWA, cìvwa mu ci—cikàndàkàndà—cikàndàkàndà cya *Life*, ngeela meeji ne ki cyòci, *Look anyi Life*, ngeela meeji ne cìvwa n'*Life*, anu mu bidimu bisatu anyi binaayi cyanààna byàshààdi ebi, ki Nzambi kumbà kwaluja beena Yudà mu buloba bwabo, mùvwàbò kabàcìyi bàsanganyibwa to munda mwa bidimu binunu bibidi, pàvwà bàà Bisàmbà bya bendè munkaci mwa kudìlongolola apu. Kadi patùdì twakulangana apa bàà Bisàmbà bya bendè bipàci Kilisto bààMwedi pambèlù pàà ekeleeziya, bilondèshìle Bwàkabuulwibwà nshapità mwi3. Kàcyèna nansha mene mwa kwalukila mu ekeleeziya Wendè to. Kakwènakù mwaba wà kuyaYè nansha wumwe to. Yèyè mmubèngiibwe.

117 Kadi dībà dyàkànyì bwa Dyambwibwà's. Bapikula bònsò bàà too ne *apa* abu, tutobà tukese tukese etu mushindu ewu, ndijuuka dya bansantu mu dibìikà dya ku lufù. Nudi numòna's, tudi tusangila bònsò *apa* mene. Bible mmwambe ne: "Twètù bàdi ne mwoyi ne biikàle bashààle too ne ku dilwa dya Mukalenge katwàkupangisha anyi kucyàmakana kumpàla aba bàdi balààle to." Kubangila anu *apa*, *apa*, ne *apa*.

118 Mmunyì, wèwè mwanètù mwena Mpenta, mmunyì mùdìku mwa kubyàngata byòbì byònsò bwa apa mu Cikondo cya Ekeleeziya wa Laòdikiyà emu?

Bòbò's—bòbò's mbalààle, munda mwa cyònsò cya ku bikondo ebi, bindile. "Ne twètù bàdi ne mwoyi, musumbà mukese wùdì mushààle apa ewu, bàdi bashààle ne mwoyi too ne ku. . . Dilwa dya Mukalenge katwàkucyàmakana aba bàdi balààle to; bwalu mpungi wa Nzambi neàdìlè, ne bafwè mu Kilisto nebànji kubiika dyàmbedi; ne netwàmbwibwè pàmwè naabò," amen, "pàmwè

naabò,” s’ki twètù *aba*, tusangila *apa* mene, “bwa kuya kasangila ne Mukalenge mu mpeepèlè.” Nenku’s ki bwalu mbwòbù abu. Tudi penyi? Anu *apa* mene. Maasiyà wàkuumushiibwa penyi? Anu menemene mwaba wùvwà Díyi dyambè awu. Lumingu lwà makumi mwandamutekète alu nelùbangilè penyi? Anu menemene paanyimà pàà Ekeleeziya ewu muumùshiibwe. Dìbà adi Nzambi wàlukila kùdi beena Yudà.

¹¹⁹ Kanwènaayikù nuvùluka anyi? Aci mpàdi anu ne Ekeleeziya wàyi. Ekeleeziya ùya, dìbà adi beena Yudà bèèla bàkwàta, bàbwela. Kadi, dyàmbedi, cintu cìdi cìlondà mu dilondangana adi, kí nditàbuluja dya bukole dya ditunga—dya bukole dya ditunga dijiima munkaci mwa bàà Bisàmbà bya bendè nansha. Cintu cìdi cìlondà mu dilondangana adi, ndilwa dya Bukalenge bwa Nzambi, Dilwa dya Kilisto.

¹²⁰ Mpindyewu, nwènu baswè, tudi bafwànyineku kwalukila apa mpindyewu ku Danyèlè nshapità mwi2, mvensà wa 34 ne mvensà wa 35. Nenku Danyèlè pààkapèeshiibwàye. . . nshapità mwi2, 34 ne 35, Danyèlè pààkamanàye kupèeshiibwa cikèènà-kumòna cya ne matùkù a cisàmbà cyèndè àkajika, ne bwa kikondo kampànda, ne kumònayè bàà Bisàmbà bya bendè bàbwela, ne kumònayè cikèènà-kumòna cya dibwe dinene menemene edi apa, anyi, lupingu lunene menemene, lùvwà ne mutù wà ngòlò, ne cyàdi cya argent alu (Mpindyewu tàngilàayi, cìdi cyènda citàmba kushila, cyùmuka ku argent ciya ku ngòlò.), cìdi cìlondà ciikàle bibelu bya cyamu cifiike, anyi, bibelu bya cyamu cya mitakù, ne pashiishe makàsà ne mikòlò bya cyamu cifiike, kadi bânà bàà nkàsà, bàvwa mbânà bàà nkàsà dikumi, ne bânà bàà nkàsà abu bàvwà bàà cyamu cifiike ne diima, ne yèyè wàkamba ne: “Anu muwàmònu ne cyamu cifiike kacìvwa cifwànyine kusambakana ne diima amu, makalenge aa neikalè matàpùluka ne kaayi mwa kusambakana ebu ne ebu to, kadi neàsambakaje pàmwè mamiinu àwù, àteeta bwa kucìbulangana makole.” Nwamònu anyi?

¹²¹ Mpindyewu, cìdi cyenzèke, mutù wà ngòlò awu wùvwà n’Nebùkàndànèèsà, mwàkacyùmvwijàye. Kwambayè ne: “Mfumu mukwabo nealwe kadi mwikàle mushààdile kùdi wèwè,” ùvwa n’Darius, wa beena Medàayi ne Peelààsà, ùkwàta bukalenge bwa bàà Bisàmbà bya bendè ku bukòokeshi bwèndè. Bààkalondà, paanyimà pàà beena Meedàayi ne Peelààsà, bàvwa mbanganyi? Beena Ngelikà, Alexandre le Grand, ne bakwabo; beena Ngelikà kukwàtabò bukalenge abu ku bukòokeshi bwàbò. Pashiishe mbanganyi bàbùnyènyi beena Ngelikà? Beena Loomò. Nenku mbanganyi bàdi bakòokèshe bàà Bisàmbà bya bendè kubangila apu? Beena Loomò! Beena Loomò, mpindyewu, ki bàvwà cyamu cifiike aci.

¹²² Dìbà adi mònaayi ne, Loomò ùdikù too ne kündekeelu, bwalu yèyè ngwàkaya too ne kündekeelu kwa bânà bàà nkàsà. Nenku yèyè wàkamòna bitoci, diima; ne abu mbantu, citùdi benjiibwe

naaci aci. Ne cyamu cifiike, dikàndà dya Loomò, dyàkendela mu dyònsò dya ku matùnga awu. Ne Loomò ngudi ne dikàndà mu ditùnga ne ditùnga dyònsò mwinshi mwa Dyulu.

¹²³ Kùdi muntu umwèpelè pa buloba udi mwa kwimanyika mvità anyi kajuula mvità, kakùyi . . . mu kwamba anu kwa díyi dimwe cyanààna. M'paapà. Anjì ambààyi tũng bu yèyè mwa kwamba ne: “Mwena Katolike nansha umwe kàmbulu cingoma to.” Aci's ncikòse bwalu, mwanèètù, wàmbe wèwè cyònsò ciwàsà kwamba aci. Citùpà cya citàmbe bunene cya pa buloba, cya bwena Kilisto, s'mbeena Katolike. Nwamònu anyi? Eyo. Yèyè àmbè anu díyi dimwe cyanààna, ki cidiku.

¹²⁴ Anu mùdibo bambè kaaba aka ne: “Nganyi. . .” Netùbwelemu pashiishe. “Nganyi udi mwa kwenza nyama wa lwonji mvità? Nganyi udi mwa kwakula bu yèyè? Nganyi udi mwa kwenza nanku? Nanku, twènzààyi cimfwànyì cya nyama wa lwonji.” Ki nsangilu wa maèkèleeziyà nyèyè awu, “kwenza cimfwànyì cifwànàngàne nendè.” Nwamònu anyi? Kusanga mangumba pàmwè, ncikaadibo bamanè kwenza. Kaa, tukàadi anu kundekeelu. Ki cyònsò cidiku's, mulunda wanyì. Tudi apa ku ndekeelu. Nwamònu anyi? “Twènzààyi cimfwànyì cya nyama wa lwonji,” cintu cifwànàngàne nendè. Cimfwànyì ncintu cifwànàngàne ne cintu kampànda. Nwamònu anyi? Mpindyewu tudi ku cikondo cya nshìikidilu.

¹²⁵ Mpindyewu mònaayi emu nunku, kundekeelu kwa cikondo eci. Mpindyewu, Danyèlè, mu nshapità mwi2, ku mvensà—mvensà wa 34 ne wa 35, wàkatàngila lupingù elu ne ntèmà yònsò. Ne yèyè wàkalùtàngila too ne pàakalwà Dibwe kutùuka ku mukùnà, kakùyi dyambulwisha dya byanza to, ne Dyàkabùnguluka ne kutuuta lupingù alu ku makàsà, ne kulùngutula. Mpindyewu, kaDyàkalùtuutakù ku mutù to, mpindyewu. Dyàkalùtuuta ku makàsà; aci cívwa ncikondo cya nshìikidilu, bânà bàà nkàsà dikumi abu.

¹²⁶ Nukààvwakù bamòne, anu kaaba aka menemene, dyàkàmwè kumpalà kwa Eisenhower kupàtukayè, mwena Mishòònyì wa ndekeelu wa . . . wa Amerike awu, ku diikala—ku diikala Mfumu wa ditùnga, bwalu ndi ngeela mpatà ne nekwikalakù mukwabo's. Kadi—kadi pìikalà . . . anu bwa kuleeja cyòci aci, anu bwa bantu bàtabulukèku. Pààkenzàye ditwilangana adi, kùvwa . . . Cisangilu cya ndekeelu cívwa (bòbò) cívwaye mutwilàngàne ne Russie aci, kùvwa dileeja dya mpalà dya matùngà ataanu a ku Esètè a ba-communistes, matùngà ataanu a ku Wesètè. Mukalenge Khrouchtchev nguvwa kumutù kwa matùngà a ku Esètè. Mukalenge Eisenhower nguvwa kumutù kwa matùngà a ku Wesètè. Nenku Khrouchtchev, mùndi ngumvwa bamba ne mùdibo bandondèle ne, mu mwakulu wà cyena Russie, *Krushchev* mbwena kwamba ne “diima.” Ne *Eisenhower* mbwena kwamba ne “cyamu cifiike,” mu Anglais. Ki cyamu cyenu cifiike ne diima mbyòbi abi, kabyàkudisangakù

to. Ki kukòpolayè cisàbaatà cyèndè ne kucituutayè pa mèèsà, ne bikwabo byònsò. Kabyàkudisangakù to.

¹²⁷ Kadi mùvwa mmu matùkù a makalenge maalàbàle aa mùvwa Dibwe adi, Dibwe dyàkatùuka ku mukùnà adi, kakùyì dyambulwisha dya byanza, kutuutadì lupìngù alu ku makàsà. Mpindyewu: “Ditùuke ku mukùnà.” Cìvwa ne cya kwikala mukùnà wà dibwe. Dyàkatùuka ku mukùnà wà dibwe. Mpindyewu, nukààvwakù bamòne anyi?

¹²⁸ Mpindyewu, nwènù bambi naanyi, ne bânà beetu bàà balùme ne bàà bakàji, pa buloba bujimà. Ku dyànyì dyumvwa, Bible wa kumpalà wàkafundiibwa, Nzambi wàkamufùnda mu dyulu, bwalu bàdi ne cya kwikala bàtàngila muulu bwa kumòna ne kùtu—kùtukù Nzambi mu Dyulu, ne Nzambi awu ùtu kumutù kwabo. Ne nwènù bamòne mu cidiminanzaji. . Mpindyewu nansha umwe wa kunùdi kùkadikù wàya. . . Shààlaayi anu ne Bible ewu. Nwamònu anyi? Kadi, ci—cidiminanzaji, udi ubanga kumpla mu cidiminanzaji, mùndi mèmè ngumvwa, mvirgo; cya ndekeelu mu nombà wa cidiminanzaji cidi n’Leo nyama wa Ntambwe. Aci n’Dilwa dya kumpalà dya Kilisto, muvwile kùdi virgo; Dilwa diibìdi, n’Ntambwe wa cisàmbà cya Yuda. Nwamònu anyi? Pashìishe tudi ne cikondo cya kànsèrè, ne, kabidi, mu cidiminanzaji amu.

¹²⁹ Mpindyewu, tudi tusangana ne kùvwa mukwabo mufùnda, anyi mukwabo mutèeka, ne bivwa mbipaapu bya musàkà. Nukààvwakù bamòne mu bipaapu bya musàkà, mwàkabangàci, cyalàbàle ku ntàku, cyenzè bu mukùnà, cyenza ne lubwwebwe lushindàme, cibànde muulu too ne mùdici cikafika ku lusongo anyi? Kadi kacya kakùvwakù mùsongà mwasa pa cipaapu cya musàkà apu to, cipaapu cinènè cya musàkà mu Èjiipitù mwàmwa. Pàtulàku webè. . . Wèwè ne kabeji kàà ndola umwe mu mpaayà, pàtulà kabeji kàà ndola umwe aku kadi ùkàtàngilèbi, Nenku neùsanganè kaaba aka citampì cya Amerike ku luseke lùmwè, ne ku lukwabo luseke kùdi, lwà kwìnshì aku, cipaapu cya musàkà. Ne kuulu kwa cipaapu cya musàkà aku, dibwe dya mùsongà, kadi cidi ndisù dinene menemene. Ne cidi cibùkidiibwa, kwìnshì kwa cipaapu cya musàkà eku ne: “Citampì cinène.” Mukankù wà Amerike kawèna citampì cinène bwa cinyi? S’ki citampì cya Nzambi. Vùlukàayi ne, tuvwa ne ciibidilu cya kwimba kaamusambu kakese ne:

Mu njila mujimà batàngile ku cisòmbedi
cilelèlè cya musùuka,
Kùdi Dìsù dikujooja;
Cidya cyònsò cyùdi wela, Dìsù dinene edi
nditàbàle,
Kùdi Dìsù dikujooja.

Ncya bushuwa. Nudikù bavùlùke, patùvwà kale wàwa ne kaacibilù kakese—kakese kàà disànka apu anyi? Tuvwa twamba ne:

Wèwè wiba ne wiibila ne ushimangana, kadi
mu ekeleeziya ufla bujaadiki,
Kùdi Dísù dīkujooja.

¹³⁰ Mpindyewu, citampì cinène. Mpindyewu, tudi bamanyè, ne mèmè ncyèna ncyùmvwakù to, diine dipima dya cipaapu cya musàkà adi. Kadi ndi mufùme ku dinwàmbila mu malongesha a ndekeelu, mu àmwè a ku malongesha atùdi bapetè aa, bwa nùmonè ne byònsò bìdì anu bìtùngunuka, pàmwè.

¹³¹ Mpindyewu, cipaapu cya musàkà cyàkabanga, bwa kuleeja Ekeleeziya, cyalàbàle ku ntàku. Ne pàdici cyènda cibànda cìseemena ku lusongo, cìdi cìbanga kutàmba kulwa mu—mu mmwènekeli wa mùlòngoji.

¹³² Mpindyewu, tudi tusangana ne, cìdi cìfika buludi kumutù menemene kwa lusongo aku, kadi kabààkacìjikijakù to. Bwa cinyi? Bwa cinyi? Ntu ndìkonka ne mbwà cinyi! Bwalu Bible mmwambe ne Dibwe dya mùsongà dyàkabèngiibwa. Àkabèngiibwa.

¹³³ Mpindyewu tàngilàayi, cikondo cya ekeleeziya... Tèèlejààyaaku ne ntèmà mpindyewu. Eci kacinùpici to. Cikondo cya ekeleeziya ncyumùkile ku cibangidilu cya Dilongolola, Luther, mu bikondo bya kale byàbya mùvwà mabwe a cishìmikidi matèèkiibwe, cìvwa dilongesha dya bapostolo aci. Pashìshe tudi tusangana ne, pàvwà bikondo byènda bìya, kuumukila ku cikondo kuya ku cikwabo, Ekeleeziya ùvwa wènda ùtàmba kushààla mukèèpèle dībà dyònsò, too ne mùvwàye ùshààla mwenzè bu... Luther wàkayìisha dibingishiibwa. Cikondo aci, anu bwa kwikala cyanàànà, kujìkula anu ne udi mwena Kilisto, bàvwa bafwànyine kukushebeya, matùkù a difwilà dya diitabuuja awu, bafwile diitabuuja abu.

¹³⁴ Mpindyewu tudi tusangana ne, mu matùkù a Wesley, wèwè uvwa munsantu mubùnguluki wa mu malaba wèwè mujìkùle Kilisto musangu awu, Méthodiste mupyamùpyà awu. Bantu bààkapàtuka muneemu emu pààkalwà Wesley muneemu, ne Asbury, kwenzabo masangisha muneemu mu Amerike, mwva mbala bwalu bwabo bulonda, mùvwàbo bàenzela mu nzubu ya tùlaasà. Ekeleeziya yabo muneemu kayìyi mwa kubìitabilakù to. Kadi ndekeelu wa byònsò kufikabò too ne mùvwà Nyuma Mwìmpè ubàpwekela, ne bàvwa bàpòna panshi, ne bàvwa bàbàpòngolwèla màyi, bàbèèla lupeepèlè ne cipeepudi, bèèla meeji ne mbafwè cipùùkà. Ne mèmè mwine nkààtùkù mubwelè mu masangisha àbò, munda mwa bidimu byànyì makumi ataanu emu. Ne ngàkabàmòna bàpòna panshi ku bwenzeji bwa Nyuma Mwìmpè mushindu awu, ne biikàle bàbààsa màyi mwìsù, ne

bikwabo byònsò, ba-Méthodistes bàà kale bàà badìkàdile abu, kùkaadi bidimu byàbùngi. S'civwa ndikèngeshiibwa.

¹³⁵ Mpindyewu, pashiishe, paanyimà pàà cikondo aci cimanè kujika, cikondo cya Wesley, kwàkalwa cikondo cya beena Mpenta ne dibàtiiza dya Nyuma Mwîmpè. Nwamònu's, nudi nwenda nwangata mbùngakeenu, dîbà dyònsò. Mpindyewu vùlukàâyî ne, Dibwe dya mùsongà adi kadivwa dyanji kwikalapù to. Bwa cinyi? Bàvwa bàpèèsha Ekeleeziya mbùngakeenu anu mu yèyè menemene, anyi cipaapu cya musàkà mbùngakeenu bwa kukùmbananganaci ne Dibwe dya mùsongà, kadi Dibwe dya mùsonga kacya kadyàkalwakù to. Kaa, nudi bamòne mwaba wùndi, kî mmwòmò anyi?

¹³⁶ Mpindyewu, mudimu wà bwambi kuumukila ku Luther too ne ku ndekeelu wa Mpenta, mu banyààbanyà bàà menemene abu kuulu eku abu. . .Ki bwa cinyi Bukênkè bùdi bwàmba kujîma, mu cikondo eci, pa kabala-matùkù pààpa, pa dizola adi. Ncikondo cya mpenta, cya mpenta; kî—kî mmangumba a beena Mpenta to, bwalu bôbò mbenzè anu menemene bu Laòdikiyà. Bôbò mbeena Laòdikiyà. Mbenzè bu beena Nikàlàwù, badivwijè malongolodi.

Kadi Ekeleeziya mulelèlè, pa buloba bujimà, ùkaadi mwangàte mbùngakeenu ne mukèèpèle mu mushindu wà ne nkulwe mudimu wà bwambi munkaci Mwèndè, mufwànàngàne anu menemene ne mudimu wà bwambi wà Yesu Kilisto. Mpindyewu ncinyi cìdibo naaci? Bàdi ne cintu cimana kwakaja. Mpindyewu cintu cidì cilondà ncinyi? Dibwe dibèngiibwe, dya cipaapu cya musàkà edi, ditùuke ku mukùnà kakùyi cinyi? Kakùyi dyambulwisha dya byanza. Nzambi nguvwa muDitùme. Nudi bacimòne anyi? [Disangisha didi dyàmba ne: "Amen."—Muf.] Didi dibèngiibwe adi, Dibwe dibèngiibwe adi, didi mutù wà Eci; ki mutù, dibwe dya musongà. Ne Yèyè mene udibò babènge awu, munda mwa cikondo cya bàà Bisàmbà bya bendè, n'Kilisto. Ne Kilisto kààkakòshiibwa kadi kutèekiibwa apa bu mupinganyi, anyi mwànà wa Nzambi, anyi muntu kampànda wa mwânzù mutùmbùke mu ekeleeziya nansha. Yèyè ùdi Nyuma Mwîmpè. Ne mùsongà wà cipaapu cya musàkà newikalè Kilisto wàlwa awu. Nudi bacimòne anyi? ["Amen."]

¹³⁷ Mpindyewu, mbwalu bàdi ne mbùngakeenu udi ukèngediibwa, (Nudi bamòne mwaba wùndi mupèèshe eci mbùngakeenu bu wa cipaapu cya musàkà, dijuuka dya bansantu anyi?) bènta lwendu lwà mindòlòlooci batàngile mu Butùmbi. Nudi mpindyewu nucyùmva anyi? [Disangisha didi dyàmba ne: "Amen."—Muf.] Kilisto, Dibwe dya mùsongà, Dibwe dibèngiibwe, Dìsù didi dimòna byònsò, ùlwa anu menemene mùdi Bible mwambe. Ne Danyèlè mmwambe ne yèyè wàkatàngila cikondo cya bàà Bisàmbà bya bendè eci too ne mwàkuumukà Dibwe ku mukùnà, divwà kadìyi dikòsa ne byanza to. Kacya kabàtukù batèèke dibwe dya mùsongà pa

cipaapu cya musàkà aci to. Kadyàkatùùdiibwa ne byanza bya muntu to. Cyanza cya Nzambi ncyàkatùùlà Dibwe adi. Nudi nucimòna anyi? ["Amen."] Ne Dyàkenza cinyi? Dyàkatuuta lupingù alu ne bukolè bwònsò ku makàsà, kulùvingutula, kulùshiya anu lupwishi. Aleluuyah! Cyàkenzekà ncinyi mu cikondo aci, ku dilwa dya Dibwe adi? Ekeleeziya wàkabànda mu Butùmbi, mu Dyambwibwa, bwalu aci cyàkajikija cipungu cya bàà Bisàmbà bya bendè. Nzambi ngwàkacijikija, dilwa dya Dibwe adi.

¹³⁸ Kale wàwa kùvwa kùlwa bantu kampànda mu ekeleeziya emu, muntu mulùme mukese ne mukàjèndè. Bàvwa bàngata Bible bàMutèèka panshi mwaba kampànda; ne bàvwa bàya, bènda bimba ne:

Kaa, ndi ngenda nkèba Dibwe dìvwà dyènda
dìbùnguluka mu Baabùlònà adi,
Dìbùnguluka mu Baabùlònà... (Bàya eku
ne eku, bènda bàkèbangana ne Cyòci aci,
nwamònu's.)
Ngenda nkèba Dibwe dyàkalwà dyènda
dìbùnguluka dìbwela mu Baabùlònà adi.

¹³⁹ S'ki Yéyè awu! Kilisto ki Dibwe adi. Yéyè kààkalediibwa kùdi muntu to. Wàkalediibwa kùdi Nzambi. NeÀlwe bwa kwangata Ekeleeziya udi mulediibwe cyàkàbìdi, ku Nyuma wa Nzambi, bwalu dikànda dya Dibwe dya mùsongà adi didi dyèndakana mu Ekeleeziya mujimà, cyenzè bu cyamu cya cikòka bintu.

¹⁴⁰ Ndi mvùluka pàmvwà kuntweku, mbandila cyenzedi cya byamu aci mwine musangu awu, kùvwàbo bàpeeya bintu byònsò abi. Nenku bisòtà byònsò bìvwà mwaba awu abi, ne bòbò bàbìkòmba. Dibwe dinene adi kulwadi kubyàngula, dibwe dinene dya cyamu cya nzemu adi, kubyànguladi byònsò bwalu bìvwa bìkòkiibwakù.

Bìdi bikèngela bwa twètù kukòkiibwa ku Dibwe dya mùsongà adi. Dibwe dya mùsongà adi n'Nyuma Mwìmpè, Kilisto. Ne yònsò wa kutùdi udi ne dikòkiibwa ku Nyuma Mwìmpè. Pàdi Dibwe adi dítuuta lupingù, Ekeleeziya neàbuukè àye kùdiDi, wàlukila mu Butùmbi. NeAngaciibwè muulu, mu Dyambwibwa dya bansantu, pààyàYe mu ditùkù adi.

¹⁴¹ Mpindyewu, tàngilàayi kùneeku. Tudi tusangana ne, beena Yudà bàdi mpindyewu bààlukila, kwènji bidimu bitwè ku makumi anaayi, cikondo pabwìpi ne cya mwomumwe ne cya bwena cyàkabàngatà bwa kuya too ne ku dibùtudiibwa dya ntempèlù. Mbibàngate pabwìpi ne bidimu makumi anaayi bwa kwalukila, too ne piibakàbo mukwabo ntempèlù. Nwamònu's, tudi anu kundekeelu kwa njila mene. Ee, bàà Bisàmbà bya bendè bòbò... .

142 Mpindyewu twàngatàayi. . . Tudi tumòna Ekeleeziya, dilwa dya Dibwe adi. Twàngatàayi cikondo cya ndekeelu eci. Tudi bacìlongè. Tudi tumòna mpindyewu. Ngeela meeji ne ndi ne bintu bifùnda mwab'ewu pa cyôci aci. Tùmonèbi, katanci kakese cyanààna. “Nenku mfumu udi ne cya kulwa awu, udi mufwìlakanyi ne Kilisto awu, neénzè cipungidi ne beena Yudà.” Nenku mu Danyèlè 7. . . anyì—anyì 9.27. “Kadi munkaci mwa lumingu, bidimu bisatu ne cyàbibìdì cimwe, nyama wa lwonji neénzè cipungidi cyèndè. . .” Ndi—ndi muswe nye kafika ku cyôci aci, pashiishe ndambu, cipungidi aci. Tudi baswe kushiya. . . Ndi muswe kubangila apa mene mpindyewu.

143 Cyònsò cya ku bikondo bya bàà Bisàmbà bya bendè ebi ncijaadikùbwe kakùyi kalèma ku mùsànjeelà wabò, ku mukenji, ne ku cìvwà mwa kwenzeka aci.

Cikondo eci *eci* cìvwà cikondo cya butùmbi.

Cikondo cyàkalondà, mbambe ne kùvwa mwa kwikala dilongesha dibùkidiibwa, anyì kùbwela cintu kampànda, cìbùkidiibwa ne, “maa—maalu mamba a beena Nikàlàwù.”

Pashiishe kulwakù, cintu cyàkalondà, too ne kushàalaci dilongesha.

Pashiishe kulwaci, dibàkà dya. . . ne ekeleeziya wa beena Nikàlàwù, ne dikèngesha dya bansantu. Byònsò byàkenzeka anu mushindu awu.

Twètù kulwa ku cyàkalondà, anu ndambu mukese menemene wa Bukènkè kubangayè. “Udi ne kaadikàndà kakese, ne udi ne dìnà dya ne udi ne mwoyi, kadi pèèbè mufwe. Kànkamikà cyùkaadi naaci aci, bwa Nciikadi ngâlwa, kuumusha citèekedi cya mwèndù.”

144 Pashiishe kulwakù Wesley, paanyimà pàà aci, ne cyèndè cikondo. Twètù kumòna anu menemene cìvwà. . . cikondo cya Wesley, cyàkabiikidiibwa bishi? Cya Filàdèlèfiyà. Cikondo—cikondo cya citàmbe bunene cya dinanga citùkaadiku bapeté, cikondo cya Filàdèlèfiyà, cìvwà anu mu cikondo mene cya John Wesley amu.

Pààkuumukàyè, ki Mpenta kulwayè, ne aci cìvwà cya cìvùmvù.

Pashiishe tudi twalukila ne tusangana ne m'Mukenji wa mushindu kaayi wùvwà mwa kulwa kùdì beena Mpenta, ku ndekeelu.

Vùlukaàyi ne, yònsò ùvwa ùlwa ku ndekeelu kwa cikondo. Pòlò Munsantu wàkalwa ku ndekeelu. Bakwabo bònsò bààkalwa ku ndekeelu, Irénée Munsantu ne bakwabo bònsò bàà kùdìbò. Cikondo cya umwe cìvwà citùngunukila ku cya mukwabo, bitentamangana, ne yèyè ùvwa ùcyàngata ne ùtùngunuka naaci too ne ku cikondo cìvwà cilondà. Nwamònu anyi?

¹⁴⁵ Mpindyewu, tudi tusangana ne, mu eci cikondo, mùdi mutooto, mutùdi naawù kwòkù aku. Tùdi ne mutooto, mùsànjeelà. Tudi ne muntu kampànda, Mukenji ka—kampànda wùdi wùpàtuka bwa cikondo; kùdi cisàmbà bwa kuWùbènga; kùdi cisàmbà bwa kuWàkidila. Ne mùsànjeelà wa cikondo eci ùvwa ne cya kulwa mu bukòlè bwa Eliyà. Aci ncya bushuwa. Ne yêyè ùvwa ne cya “Kwalujulula Diitabuuja dya bânà kùdi baataatù, kwaluja bàshààdilè bàà mpenta, bàdi bashààle abu, ku Diitabuuja dilelèlè dya bapostolo.”

¹⁴⁶ Mpindyewu, Diitabuuja dilelèlè dya bapostolo, nwênù baCìbalè mu Mukàndà wà Byenzedi, nenùsanganè ne kakùvwakù musangu nansha wùmwe wùkaadiku muntu nansha umwe mubàtìijìibwe, “mu dìnà dya ‘Taatu, Mwànà, Nyuma Mwìmpè’” to. Kakùvwakù nansha umwe wabò mumyamìnyìibwe màyi to. Kakùvwakù nansha cimwe cya ku bintu bitùdi naabi leelu ewu, bìdi bìbìikidiibwa ne Mpenta ebi, cìkaavwàku cyenzèke mwine musangu awu to. Bòbò bàvwa ne mamwèneshiibwa malelèlè, ne Nyuma wa Nzambi munkaci mwabo, uvwa kakùyi dipangila to Mwànà wa Nzambi mwikàle ùkwàta naabò mudimu.

Mwine muntu uvwa ne cya kulwa ewu, Mukenji ewu, eyowa’s wè, wùvwà ne cya kulwa awu, ùvwa ne cya kwikala mufwànàngàne ne Eliyà. Eliyà ùvwa ne cya kulwa misangu yisatu.

Mpindyewu wêwè udi wamba, ne: “Yone Mubàtìiji’s nguvwa muntu awu.” Bu nwênù mwa kumòna, Yesu wàkamba ne Yone Mubàtìiji nguvwa mùsànjeelà wa Maalàki 3, kàyì wa Maalàki 4 to. “Mònaayi, Ndi ntùma mùsànjeelà Wanyi kumpalà Kwànyi.” Ngeela meeji ne mu Maatàayi 11.6, mwaba kampànda mwômù amu nenùcisanganè, Maatàayi nshapità wa 11.

¹⁴⁷ Mpindyewu, kadi mu matùkù a ndekeelu aa, kùdi ne cya kulwa Nyuma wa Eliyà munkaci mwa bantu, ne yêyè ùdi ne cya kwenza cintu anu cimwecimwe cyàkenzàbo kale wàwa aci. Ngiikàdilù wendè ùvwa mwa kwikala anu umwèumwè awu, ngiikàdilù wa Ekeleeziya. Ngiikàdilù wa yêyè—yêyè muntu awu ùvwa mwa kwikala anu umwèumwè awu. Ne Mukenji wùdi wùpàtukà awu, ùteeta. . . Yêyè ùvwa mwa kukìnyìibwa, kùdi bantu. Yêyè ùvwa mwa kukina bakàji, bàà ngiikàdilù ya mibi abu’s, twamb’eku twamb’eku, bàà babì abu. Munangè myaba ya bipèèlà; muntu wa cilunji cya cìshintuluka, wa ùbinduluka dìbà dyònsò, mùvwà Eliyà, ne mùvwà Yone amu. Ne tudi bamòne cintu cyònsò eci cyènzeka. Pìikalàbi ne tudi bapetè Mukenji, s’tudi tumòna Kilisto mubèngiibwe. Bikèngela wikalè wa ku bùmwe bwa ku malongolodi aa bwa cyanàànà kwèna mwa kubwelamù to. Pa nanku, Yêyè, Yêyè mmwimansha pambelu. Nwamònu anyi? Kilisto kèna mwa kukwàta mudimu munkaci mwabo to.

“Wèwè udi mwena nganyi?”

“Mwena Kilisto.”

“Udi wa mu d̄ingumba kaayi?”

“Ncyèna nansha wa ku dimwe to.”

“Katwèna mwa kukwàta neebe mudimu to.”

¹⁴⁸ Nwamònu’s, Yèyè mmubèngiibwe. Cya bushuwa! Nwamònu’s, mubèngiibwe! Ki mwàkabèngiibwà kabidi Eliyà, ne ki mwàkabèngiibwà kabidi Yone. Kadi, ncinyi, byàkabàtácisha anyi? Byàkatàcisha mukenji wàbò anyi? Bàakamba ne: “Kaa, nwènu bàà nshingu mitàndàbàle nwè.” Bàakabàpòngolwelaci pambidi. Kabàakadyàngana mukana to. Bàakaya anu kumpàla. Ne Mukenji wà Nzambi newùtungunukè anu ne kuya, cidi ní nganyi ní nganyi mwambe nansha ciikàle cinyi, nwamònu’s, too ne ku dikumbana dya maalu ónsò, ne piikalà . . . cidi cimana kulongolola necipòngolodiibwè. Nenku tudi ku ndekeelu.

¹⁴⁹ Mpindyewu, tudi tusanganyiibwa mpindyewu, mu bidimu makumi anaayi bya dyalukila, kacya ku Mvità ya Kumpàla ya Buloba bujimà, nenku beena Yudà mbaalùkile mu buloba bwabo. Kacya Nzambi kàtukù mutàngile bwalu bwa Izaleela pàdiye kàyi mu buloba bwèndè to.

¹⁵⁰ Mpindyewu, nudi bavùlùke pàvwa beena Yudà bàalukila apu, beena Yudà bàà mu matunga makwabo abu, ne cikàndàkàndà cya *Look* cyàkafila kaabwalu kàà cyòci aci. Mèmè mwakù mubalè kapese kàà cibèjibeji aku, cikàndàkàndà kampàndà cya maalu a ntèndeleeleu, ne pàvwàbo . . . Ndèkè ayi kwikilayi bwa kwambula beena Yudà abu mu Iran mwàmwa. Kadi ncyèna mumanye ne bàvwa bònsò penyì to, bàvwa batàngàlake anu cyànààna.

Mpindyewu, ki beena Yudà balelèlè mbòbò abu, bàvwa kacya kabàyikù bapetè mpungà nansha mukese to. Mpindyewu, mwanèètù, ki binunu byenu lukàmà ne makumi anaayi ne binaayi mbyòbì abi. Patwàyà mu Bwàkabuulwibwà 11, nenùbàmònè. Yèyè mmwambe ne: “Kùdi bisàmbà dikumi ne bibidi (bya Gaadà), bisàmbà dikumi ne bibidi (bya Azèlèlè), bisàmbà dikumi ne bibidi (bya Lubènà), bisàmbà dikumi ne bibidi . . .” Ne bòbò bònsò abu bàvwa biimàne penyì? Pa Mukùnà wà Sinaayi. Beena Yudà, baalukile mu buloba bwabo, ki bòbò abu mwaba awu. Bàvwa ng’aba bàvwa kabàyi musumbà wà beena mucimà bàà Wall Street aba nansha. To, mukalenge. Bàvwa mbeena Yudà bàà balelèlè abu.

¹⁵¹ Nenku laabi mukùlàkàji ewu pàvwaye mwimane mwaba awu ne kumònayè ndèkè awu wikila, beena Yudà abu. Nudi bacibalè mu cikàndàkàndà amu. Bòbò bàcivwa anu bàdima ne nkàsù ya mabaya. Kadi pàakamònàbo cintu aci ciikila kuntwaku, kabàakaseemenakù pabwipi naaci to. Laabi

mukùlákàjì awu wàkiimana mwaba awu e kwambayè ne: “Vùlukàayi ne, mupròfetà wetù wákamba ne: ‘Patwàlukilà ku buloba bwetu, netwàlukilè bambula pa mapwâpwà a mukankù.’”

Matungà àkaadi àpanduluka, Izaleela nyewu
ùtâbuluka,
Bimanyinu byàkadyànjlà bapròfetà kwamba.

Tukàadi mene anu pa kulenga lumingu lwà mwandamutekète alu bwabo bôbò.

¹⁵² Ndi ngeela meeji, mêmè mwine ne, mwimàne mwaba awu, pàvwà Mwanèètù Pethrus mubàtùmine tukàndà tukese twa Dipungila atu, ne kutùbalabò. Kwambabò ne: “Ee, cyôci ne m’Maasiyà, twänji—twänji tùMumònèbi wènza cimanyinu cya Mupròfetà aci; pùkalàYe kàyi mufwe to, Ûdi ne mwoyi.” Kwambabò ne: “Yèyè mmubiike ku lufù; Ûdi ne mwoyi mu Ekeleeziya Wendè; twänji tùMumònèbi wènza cimanyinu cya Mupròfetà aci, nenku netùMwitàbùjè.” Beena Yudà bôbò bàtu misangu yônso anu bìitabuujà. . . Bôbò mbamanyè ne Maasiyà awu ùvwa ne cya kwikala Mupròfetà.

¹⁵³ Nenku pâmvwà mwimàne kwa Mwanèètù Arganbright ditùkù adi, kwèndè kumbèlu aku, ne beena Yudà abu biimàne mwaba awu, kwambabò ne: “Wèwè lwàku anu kwetu kwàka, ku cisàmbà cyetu.”

¹⁵⁴ Mêmè kwamba ne: “Bushuwa, nêngiikalè ne disànkà bwa kulwa.” Mêmè kumbà kwangata dipàngadika, ne lùkàsà bu lwà mênýi.

¹⁵⁵ Mêmè kuya ku Caire, mu Èjiipitù. Dilòòlò adi, pàngàakamòna ndèkè awu wikila mu Caire amu, cyàkamvùlwija bwalu abu. Nenku patwàkafikà kuntwaku, mvwa ne ticket wanyì ku cyaanza bwa kuya ku Izaleela, bàvwa ne cya kutwilangana naanyì. Mvwa mwambe ne: “Ndàayaaku, nùsangishè ndambu wa binunu bya balombodi. Nùlwayi naabo mu cibandabanda mu mwaba kampànda, netùjandulè ne Yèyè ní ùcidi Mupròfetà. Amen. Ee, tùmonèbi cyènzaYè.” Kaa, aci’s cìvwa cibàtèekela anu ku dyùlù. Aci’s ki cìvwàbò bàkèba. Bu bôbò mwa kumòna aci, bàvwa mwa kwitabuujà.

¹⁵⁶ Kadi cìngààkenzá ncinyì? Mêmè kuya ku Caire aku, ne mêmè kubanga kuya kuntwaku. Nkààvwa mumane kupeta ticket wanyì; kushààle tusunsa tutwè ku makumi abidi bwa kubìkilabò. Cintu kampànda kwambaCì ne: “Kì mpindyewu to. Lupànza lwà bubi, lwà bàà Bisàmbà bya bendè, kì ndwanjì kuula to. Lwà beena Amòlà kì ndwanjì kuula to. Umùshà mukòlò mu bwalu abu.” Mêmè kudyàmbidila ne pàmwâpa mêmè nguvwa mudifwànyikijile cyôci aci, ki mêmè kuya kumfundu kwa ditanda adi ne kusambila. KwambaCì ne: “Umùshà mukòlò mu bwalu abu bwa mpindyewu.” Dìbà adi ki mêmè kwangata

ticket wanyì awu e kuya mûngà mwaba. Ncyàkaya to, bwalu dîbà kî ndyanji kukûmbana to.

¹⁵⁷ Mpindyewu, ndîbà kaayi dyànyishilà Nzambi beena Yudà abu, bwa kubangulula Yè kutàngila bwalu bwabo, ncyèna mwa kunwàmbilaci to. Ncyèna mumanyè to. Muntu nansha umwe kî mmumanyè aci to. Kadi, tèelejàayi, Izaleela pîikalàye ùkaadi mu buloba bwèndè, byònsò's bikaadi bilongolola. Mabwe ònsò àkaadi mangula, ne midimu ya dimyamina dya mâyi, ne mâyi, ne byònsò bitù Nzambi mulayè. Mbasangàne biinà bya mâyi ne bikwabo muntwamu, ne misùlù minene ya yìdipwekela, byenzè ne kî mwaba wà mutàmbe kulengela wà kacya nwamòna's. Bàkaadi biibàke cimenga muntwamu. Bàkaadi ne midimu ya dimyamina mâyi. Bàdi ne ditùnga dya ditàmbe bwîmpè bwa buloba bujimà, kuntwaku. Ne tudi basangàne, mu Mbù Mufwè mene amu ne, mùdi bintu bya mushindà, bipite bûngì, bikûmbàne bwa kusûmba buloba bujimà. Nwamònu anyi?

¹⁵⁸ Byònsò mbimacîle anu mu byanza byàbò bôbò. Mbafikè ku dicyènza bìshi? Mbwalu mwoyi wà Hitler wàkapapishiibwa, mwoyi wà Mussolini wàkapapishiibwa, anu mwàkapapishiibwà mwoyi wa Pâlò amu, biikàle bàbàsàka bàbààluja mu buloba abu. Ne munda mwa bidimu makumi anaayi ki kwalukilabò mu buloba abu eku. Mpindyewu's ki bôbò abu basòmbe, bindile.

¹⁵⁹ Ekeleeziya wa bàà Bisàmbà bya bendè ùdi mu Laòdikiyà, ku ndekeelu kwa Cikondo cya Laòdikiyà. Bu. . . Beena Yudà bàkaadi mu buloba bwabo, bàkaadimù. Ne dipàmbuka dya bàà Bisàmbà bya bendè dikaadi dyenzèke. Ne twètù tudi ne Mfumu wa ditùnga mutùdi nendè emu. Tudi ne ditùnga dipandùlùkàngàne mutùdi naadi emu. Tudi ne maabômbè a mushindà makùdika mu matanda. Tudi ne ekeleeziya udi wa civùmvù. Tudi ne Ekeleeziya, cisàmbà, cidi cidisangè pàmwè. Tudi ne mudimu wà bwambi wùdi wùkûmbananganà ne mudimu wà bwambi wà Yesu Kilisto, bwa kubàkula Dibwe adi pààlwàDi. Ncinyi cidi cishààle bwa kwenzekaci? S'ncifwànyine kwenzeka mu kasunsa kanà kònsò. Kî nkushààle kantu nansha kàmwè to. Tukàadi ku cikondo cya nshùkidilu. Kaa, butùmbi's wè! Ncyèna mumanyè ní ngàpeta mushindu wà kubwela mu cyanga aci, anyi ncyàkupeta, kadi ndi muswe—muswe anu bwa kunùpeteshakù citùpà cyàci, nansha bishi.

¹⁶⁰ Tèelejàayi, nudi. . .? Mbanganyi bàdiku mwa kumòna mpindyewu? Nudi bamòne mwaba wùdi Mufùndù wùjaadika ne mbingu makumi mwandamutekètè yìvwa mbidimu makumi anaayi ne citeema awu anyi? [Disangisha dìdi dyàmba ne: “Amen.”—Muf.] Nudi bamòne mwaba wùdibi ne mbingu makumi asambombo ne yibidi yìvwa mbidimu nkàmà yinaayi ne makumi asatu ne binaayi awu anyi? Nudi bamòne mwaba wùdibi ne—ne mbingu makumi asambombo ne yibidi yìvwa—yìvwa—yìvwa. . .? Cìvwa ncinyi? Nkàmà mwandamukùlù ne. . . Bidimu nkàmà yinaayi ne—ne makumi mwandamukùlù ne bisatu.

Bidimu nkàmà yinaayi ne makumi mwandamukùlù ne bisatu too ne ku cikondo eci. Nudi bamòne mwaba wàkuumushiiwbà Mfumu anyi? Nwamònu's, nudi nwangata bidimu makumi anaayi bwa bôbò beena Yudà abu bwa ndekeelu wa byònsò kubwelabò mu mwaba wàbò, wàkambà Nzambi awu.

¹⁶¹ Tàngilàayi apa pàdì cikondo cya bàà Bisàmbà bya bendè cipicile mu byònsò bitùdì bambè ne cìvwa mwa kupìcila amu; mwaba awu, kí nne *twètù* mbàdì bambè ne cìvwa mwa kupìcilamù to; ncìdì Bible mwambè ne cìvwa mwa kupìcilamù aci. Cìdì Bible mwambe ne cìvwa mwa kupìcilamù aci, ncilwe buludì too ne ku cikondo cya ndekeelu eci; ne munda mwa bidimu makumi anaayi mmùdì beena Yudà abu munkaci mwa kwalukila apa, bàdìlongolola bwa Nzambi kwenzaYe anu menemene cyàkenzàYe apa nunku aci. Bààkapàtuka mushindu awu, ne bàdì bààlukilamù mushindu awu. Nenku Izaleela ùkaadi mwalukile mu buloba bwèndè.

¹⁶² Mpindyewu, ndìbà kaayi dyàbangà Nzambi lumingu lwabo lwà ndekeelu alu? Ndìbà kaayi? S'dìdì mwa kwikala leelu ewu. S'dìdì mwa kwikala kumpàlà kwa dìbà kubweladì dilòlò edì. Nzambi ngwadyàmba. Dìbà dìikalàci, mèmè ncyèna mumanyè to. Ndi pàànyi ndikonka. Kadi nèntwalè cintu kampànda kaaba aka, mpindyewu, mu katanci kakesè, ne ncyèna mumanyè ní nwaciitabuuja anyi kanwàkuciitabuuja. Kadi bikèngela n—n—ncyàmbè, nansha bìshi, ngeela meeji.

¹⁶³ Twètù tudi mu buloba bwetu. Beena Yudà bàkaadi mu buloba bwabo. Tukàadi ku ndekeelu kwa cikondo, badìlongòlòle bwa Dyambwibwa. Dyambwibwa dìdì dìlwa, Ekeleeziya ùbànda, twètù twangaciibwa muulu bwa katwilangana Nendè mu mpeepèlè. Aci kaayi twètù bònsò tudi bamanyè. Dìbwe dyàkatùukà ku mukùnà adi, dìdì pabwìpì ne kulwa pa dìbà kanà dyònsò. Nenku pààlwàDi, Dìdì dyènza cinyi? Dìdì dìimanyika cikondo cya bàà Bisàmbà bya bendè. Byònsò byàjìkì, ne Nzambi ùdì wimanyika anu kashidì dítàngila dya bwalu bwabo. “Ewu udi mukooyìke àtungunukè ne kwikala mukooyìke; ewu udi wa cijila àtungunukè ne kwikala wa cijila.” Nwamònu anyi? Dìbà adi cìdìYe wènza ncinyi? Ùdì wàngata Ekeleeziya Wendè, bàdì bùle tètè ne Nyuma Mwìmpè abu.

¹⁶⁴ “Mukooyìke” awu nganyi? Ki virgo mukùtàkàne awu ne aba bàdì bàjuukà bwa dilumbulwisha, lwà *emu* nunku. Netwàngatè aci pa karta kakwabo, patwàtungunukà ne cyòci eci paanyimà, mwaba wùdìye ùlwa ku Cilumbulwidi cya Nkwasa Mutòòke ne mwikàle ne cya kulumbulwishiibwa kùdì bapikula. Pòlò mmutwàmbile bwa katwikadi tuya ne cilumbu ku tubàdì to, bwalu bansantu mbàalumbulwishà buloba. Neya bushuwa. Tudi ku nshìikidilu, *apa*, mpindyewu. Eyo.

¹⁶⁵ Kadi munkaci mwa lwine lumingu elu. . . Mpindyewu, ki makumi mwandamutekètè ngòwò aa. Mpindyewu, piikalàbi ne

yôyi eyi yìvwa anu menemene bidimu mwandamutekète, lwônsò lwà ku mbingu ayi, ne twètù bamanè kwangata mbingu makumi asambombo ne citeema, dîbà adi's tudi ne cikondo cya bàà Bisàmbà bya bendè, ne tudi bamanyè ne tudi ku ndekeelu wa cikondo cya bàà Bisàmbà bya bendè, dîbà adi's nkushàale lumingu lukwabo lumwepele bwa beena Yudà. Ncya bushuwa anyi? Ne aci cìdi anu menemene bidimu mwandamutekète. Piikalàbi ne *eci* cìvwa mbidimu mwandamutekète, *cyàcya* mbidimu mwandamutekète, bwalu Yèyè wákamba ne: “Kùdi mbingu makumi mwandamutekète mikòsela cisàmbà cyebe.” Nanku tudi bamanyè ne tudi ne bidimu mwandamutekète bwa beena Yudà. Aci ncilelèlà anyi? Mpindyewu citàngilaayaaku. Kwòkò lukonko, ndi muswe ndùmanyè. Nwamònu anyi?

166 Mpindyewu, nenku munkaci mwa lumingu, munkaci mwa lwine lumingu lwà beena Yudà elu's; nwamònu's, mbwena kwamba ne mbidimu—mbidimu bisatu ne cyàbibìdì cimwe; mufwilakanyi ne Kilisto, mfumu awu, mfumu udi ne cya kulwa awu. Nenku nùvulukàayi ne, yèyè awu ùdi ùpàtukila mu Loomò, mwine mfumu udi ne cya kulwa awu. Nganyi mwine awu? Paapà kampànda. Mfumu munkaci mwa bantu, udi ne cya kulwa, nekùjuukè Pàlò kampànda udi kàyi mumanyè Yòzefù to.

167 Mpindyewu, nwènù beena Mishònyì nudi nwamba ne: “Ee, mpindyewu, ki cyòci.” Kadi anjì indilaayi kakese. Tudi tusangana ne beena Mishònyì bàdi ne bulongolodi kampànda, bwènza nsangilu wa maèkèleeziyà, cimfwànyì cya nyama wa lwonji, ne biikàle anu bènda pàmwè naayi.

168 Ne tudi tusangana mwab'ewu ne beena Yudà mbabiikidiibwe bwa kubwela mu yèyè nsangilu ewu, (eyowa's, mukalenge), ne bôbò mbiitàbe. Ne Bible mmwambè ne mbiitàbe. Ne yèyè awu ùdi wènza naabo cipungidi.

Munkaci mwa lumingu lwà makumi mwandamutekète, yèyè ùdi ùcishipa, mufwilakanyi ne Kilisto ùdi ùshipa cipungidi cyèndè aci ne beena Yudà, “cisàmbà cyebe.” Bwa cinyi?

Ne tudi tubala mu Bwàkabuulwibwà 11, ne: “Mèmè nêntumè. . .” Ki 11 awu. Nukàadi nwenda nusemena ku 19 mpindyewu. Bwa ne Yèyè neàtumè bapròfètà Bèndè babidi, ne bôbò nebàmbè cipròfètà mu ciine cikondo aci, ne pashiishe nebàfiikilè bapròfètà aba munda ne nebàbàshebèye cya bushuwa. Mmwòmò anyi? Ne mibidi yabo mifwe neyishaalè milàadika mu mùsèsù wà nyuma wùdibo bàbìikila ne n'Sodomà ne Gomòlà, mùvwà Mukalenge wetù mupoopèdiibwe pa nkùrusè amu, Yèlusalèmà. Mmwòmò anyi? Ne yìdi yìshàala milàadikamù munda mwa matùkù asatu a mundaamuunyà ne a bufùku. Ne paanyimà pàà matùkù asatu a mundaamuunyà ne a bufùku, nyuma wa mwoyi neàbwelè munda mwabo, ne nebàbiishiibwè ku lufù ne nebàye mu Butùmbi. Cyàdiikùmì cimwe cya cimenga cyàkapòna pa dîbà adi. Mmwòmò anyi? Nwamònu anyi? Ncinyi

ciine aci? Munkaci mwa bidimu makumi mwandamutekète bya ndekeelu ebi.

169 Pààbànda Ekeleeziya; dîbà adi nsangilu awu, virgo mukûtàkàne awu, ba-Méthodistes, ba-Baptistes, ba-Presbytériens, ne beena Mpenta bàà civùmvù abu, bôbò bônso bàdisangè mu nsangilu kampànda. Bôbò biine, s'bàkaadi ne ndongolwelu wabò munene patùdì twakulangana apa. Nenku pènzàbo nanku, nebènzè cipungidi. Nenku, ee, mpindyewu, paapà mupyamùpyà utùdì nendè mpindyewu ewu mmuswe kubàbwejamù bônso. Kanwènaayikù mwa kumòna mùdì cintu aci cyènda cibànda buludì anyi? Yèyè neènzèpu muyiiki, ne neàbàbwejèmu bônso, musangu wà nzànzànzà wà kacya kùkaadi nkàmà ne nkàmà ne nkàmà ya bidimu; bidimu cinunu, anyi bibidi, bìdici kacya kaciyikù cyanjì kwenjiibwa to. Kadi mpindyewu yèyè neikalè ne cya kubàbwejamù, bônso pàmwè, ne kwenza nsangilu kampànda, mwikalà beena Yudà mwa kuciitabila. Kaa, ekelekele! Butùmbi's wè! Aleluuyah! Butùmbi bwikalè kùdì Nzambi wetù Udi ne mwoyi kashidi ne kashidi! S'kì walu mbwòbù abu! Mpindyewu, mwanèètù, s'mbipeepèle anu menemene, bipeepèle mu mushindu wà mwànà mukese mufwànyine kucyùmvwà. Nsangilu wa kubwejamù beena Yudà, ne beena Mishònyì, ne beena Katolike awu, bônso pàmwè.

Nenku, vùlukàayi, bapròfetà babidi aba nebènzè cinyi pàalwàbo?

170 Nyama wa lwonji ewu, mfumu wátangalaja bukòlè bwa cisàmbà cya cijila ewu, cyènzàye ncinyi? Neàshipè cipungidi cyèndè aci naabò. Paanyimà pàà bidimu bisatu ne cyàbibidi cimwe, yèyè neàbèlè pambèlu. Mpindyewu, bantu bàdi bôbò bèèla meeji ne awu n'communisme. Aci's cidi anu walu wèwè udi...Nyuma wa Nzambi kî mmwanjì kukwambila to. Kè n'communisme to; nntèndeleele. Bible mmwambe ne: "Ncifwànyine kwikala cifwànàngàne menemene mu mushindu wà cifwànyine kuseeswisha ne Basungula mene bu ne bìvwa mwa kwenzeka." Yesu ngwákamba nanku awu. Nwamònu's, tukàadi ku ndekeelu.

171 Mpindyewu, bapròfetà babidi aba, cyènzàbo ncinyi? Mòsà ne Eliyà mbàajuukà mu cyalu. Nebàmbilè beena Yudà abu cilèmà cyabo. Nenku mu musùmbà wà beena Yudà bàdi kuntwaku mpindyewu, bàdì ne cya kwenza binunu lukàmà ne makumi anaayi ne binaayi abu, Nzambi neàbàbiikidilè ku bapròfetà aba. Ncinyi aci? Nyuma wa Eliyà, uvwa pa Ekeleeziya wa bàà Bisàmbà bya bendè ewu awu, neàtungunukè buludì àkabwelè mu ekeleeziya wa beena Yudà awu, ùya anu buludì bwa kubìikila; ne Mòsà pàmwè nendè. Aleluuyah! Nudi nucyùmvwà anyi? Ne yèyè neàyiishè Mukenji wumwewumwe wà Mpenta awu, kùdì beena Yudà abu ne, bààkabènga Maasiyà. Amen! Nudi nucyùmvwà anyi? Neciikalè Mukenji wà Mpenta anu wòwò wumwewumwe awu, wàbàyiishàbo kùdì beena Yudà

aba. Kadi nebàkinè beena Yudà abu bibi be mu mushindu wà ne nebàbàshebèyè ne kubàshebeya. Ne bàakakinyiibwa kùdi matùngà ònsò.

Kadi munkaci mwa lumingu, bwalu bàakajuula binunu lukàmà ne makumi anaayi ne binaayi, banene ne bàà bukole. . . Bàvwa ne Nyuma Mwimpè. Nenku, mwanèètù, wèwè udi wakula wamba bwa dyenza dya bishimà, bôbò's bààkabyènza. Bààkiimanyika maulu, ne kakwàkamata mvùla mu matùkù a cipròfetà cyabo to; bààkatuuta buloba ne bipùpù, misangu yònsò yìvwàbo baswe bwa kucyènza. Bààkafila bipùpù ne bintu bikwabo byònsò. Bôbò's nebàyoobeshè beena Loomò n'ubu. Kadi, ndekeelu wa byònsò, nebàshebeyiibwè. Nzambi wetù n'Nzambi wa ùkwàcisha bwòwà pàdiYe ùkwàta ciiji. Kadi vùlukàayi ne, aci mmu lumingu lwà makumi mwandamutekète alu, ne Ekeleeziya ùdi ùsanganyiiibwa mu Butùmbi, amen, Didya dya Dibanji didi munkaci mwa kwenzeka. Eyowa!

¹⁷² Mpindyewu mònaayi. Mwaba awu ki wutùdi bamòne Mukàji-musèla wàlukila mu Ntempèlù wa Bukalenge bwa bidimu cinunu apa nunku ku ndekeelu kwa cikondo cya beena Yudà, “mwela maanyi awu.” Ki Mubàki ulwàlwa ewu, mubànde pa kabalù katòòke; bôbò bàvwa bènda bàMulonda, pa tubalù tutòòke. *Kabalù*, “makolè.” Muvwàle cilàmbà citòòke; mashi, anyi, cinkutu cizabika mu mashi; bafùnde pambidi Pèndè ne: “Diyi dya Nzambi.” Yèyè ùvwa ùlwa bu Mucimunyi wa bukole, eyowa's, mukalenge, bwa kushikika Bukalenge bwa bidimu cinunu, kubwela mu Ntempèlù. Butùmbi's wè! Ki pàdiYe ùtwilangana ne binunu lukàmà ne makumi anaayi ne binaayi abi, mpindyewu, paanyima pàà lumingu lwà makumi mwandamutekète alu kaaba aka.

¹⁷³ Lumingu lwà makumi mwandamutekète, eci cidi cyènzeka munda mwa lumingu lwà makumi mwandamutekète. Mu bisatu abi, munkaci mwàbi amu, yèyè ùdi ùcishipa, bwalu ùdi ùshebeya bapròfetà babidi bàà cyena mpenta abu, eyowa's, mukalenge, bàdi bàtuutà buloba abu.

Nenku, balùmyànà wa yààyà, Yèyè ùdi wèla ekeleeziya awu mulawu, ne Ùdi ùmwosha ne kapyà. Ne, mòna's, yèyè. . . Tudi tumusangana mwaba awu, nansha mene bendeshi nendè bàà màtù biimàne mànzàlànzàlà kwàka, bàmba ne: “Bakwètù wanyì, bakwètù wanyì, cimenga cya Loomò civwà kacyi mwa kufwà cyàcya, cyàfiki ku ndekeelu waci munda mwa dībà dimwe.” Cyàkashiyiibwa anu tusùnsukilà. Nzambi's mmumanyè mwa kwenza maalu. Ki umwe wa ku Banjelo kutàngila, kwamba ne: “Mona's, mashi a yònsò wàkafwila diitabuuja dya Kilisto àkasanganyiiibwa munda mwèndè,” bwa diseeswishangana dyèndè, ùpàtuka apa ne ùdyènza bulongolodi, ne wènza bintàkanyì bikwabo byònsò ebi, ne ùkooyisha ekeleeziya, ne mubwejemu bintu abi, ne mushebeyèshèbèye bwa diitabuuja

biine bàvwà bàteeta kuCìtwa nyama ku mikolo ne kubìpàtula abu.

174 Butùmbi's wè! Kaa, ncyêna—ncyêna mumanyè to. Ndi—ndi—ndi ndyùmva anu ne ntungunukè ne lwendu's. Nwamònu anyi? Kanwènaayikù ne disànka bwa Bukênkè bwa Mwànà anyi, kwendela mu Bukênkè bwa Mwànà! Tudi penyi's, mwanèètù? Ku dîbà dya ndekeelu's! Mbifwànyine kwenzeka, pa dîbà kanà dyònsò. Tukààdikù's!

175 Mu—Mukenji mmwambùbwe kùdi ekeleeziya wa ndekeelu, ekeleeziya udi mubènge Kilisto wendè awu. Beena Yudà bàkaadi mu buloba bwabo kùdi cipòòlò cya dîbà, bidimu makumi anaayi. Cimenga cipyacipyà cîbàkiibù. Mbindile cinyi? Maasiyà udi ne cya kulwa awu. Necyènzekè dîbà kaayi? Ncyêna mumanyè. Pàtuutà Dibwe adi lupìngù *elu*, Yèyè neikalè muyè; byònsò nebìikalè bijikè dîbà adi.

176 Mpindyewu mònaayi apa. Munkaci mwa lumingu, matùkù asatu ne cyàbibidì cimwe. . . bidimu bisatu ne cyàbibidì cimwe's wè, eyowa, yèyè ùdi ùshipa cipungidi ne ùlekeesha mulàmbù wà mashi ne mulàmbù. . . wikalàbo bamanè kulongolola awu.

Bwalu, nebààlukile buludi ku dyamba ne: “Mpindyewu, tàngilàayi, nwènù bònsò nudi maèkeleeziyà. Nudi mwa kwanyishiibwa mu cimfwànyì cya nyama wa lwonji eci. Netùshaalè mu bwobùmwe. Netùumushè communisme. Netwàngatè anu communisme awu tùmwelè yònsò pambèlu.” Nwamònu anyi? Ne bòbò's bàdi mwa kucyènza. Nwamònu anyi? Ne nebàcyènzè's.

177 Kadi tàngilàayi mpindyewu. Nenku kulongolola, ne kulongolola cyòcì eci, dikuukwila ne mulàmbù wà bwàcyàbwàcyà nebyàlukilè mu cimenga piibakuludiibwà ntempèlù. Nenku mfumu wikalà ne cya kulwa munkaci mwa lumingu ewu, neàshipè cipungidi cyèndè ne neàlekeeshè milàmbù. Mbambe ne: “Yèyè neàtangalajè, neàbitangalàjè.” Ne cyènzàye, necishaalè too ne ku dikùmbana dya maalu ònsò.

178 Nenku mònaayi:

. . . *ditàmba kupaasalala dya* cinyangu bwa kuvwija kabùtù. . .

“Ditàmba kupaasalala dya cinyangu.” *Cinyangu* ncinyi? “Dikooyika.” Nwamònu anyi? “Kuvwija kabùtù,” ncinyi aci? “Kulekeesha.” Ditàmba kupaasalala dya *cikampànda*, kulekeesha *cikansanga*. Nwamònu anyi? Ditàmba kupaasalala dya bukolè bwa Loomò abu, bwa kukwàta virgo mikùtākàne yònsò, beena Yudà ne bònsò ku bukòokeshi bwèndè. “Anyi netwikalè bònsò beena Loomò anyi katwàkwikalà cintu nansha cimwe to.” Yèyè neàshipè cipungidi cyèndè munkaci mwa lumingu.

179 “Ditamba kupaasalala dya cinyangu.” Piikalabi ne civa ncinyangu mu cikonondo cya Yesu, paakalwa Loomò kuntwaku ne dilàkà dyabo dya mukana adi, s’neciikalè Loomò cyàkàbìdì, s’neciikalè cinyangu cyàkàbìdì kùdì ekeleeziya.

. . . bwa kuvwija *kabùtù*, ne necitungunukè too ne ku *dikumbana dya maalu ónsò* . . .

Cyènzàye ncinyi? Yèyè neátungunukè naaci too ne ku dikumbana dya maalu ónsò, mbwena kwamba ne, ndekeelu.

180 Mpindyewu, cyena Yudà, ne cyena Loomò, cyena Mishòònyì (mbwena kwamba ne, virgo mikùtākāne ayi), nebàdyènzè cimùkù mu mmwènekèlu wa nsangilu wa maèkèleeziyà. Ne nebùikalè bu mwākambà Yesu mu Maatàayi 24, ne mu Bwākabuulwibwà 13.14.

Twàngatàayi Bwākabuulwibwà 13.14, tùmonebi ne ncinyi. Mvwa mucifunde kaaba aka, bwa kumòna ne ncinyi, 13.14. Eyo, mukalenge.

Ne wàkaseeswisha bònsò bàdì basòmbèle pa buloba ku bishimà bìvwàye ne bukolè bwa kwenza abi (wènzeja ekeleeziya eyi cimùkù's) ku mèsù . . . wàmba . . . ku mèsù kwa nyama wa lwonji; wàmbila bàdì basòmbèle pa buloba ne, bàvwa ne cya kwenza cimfwànyì cya nyama wa lwonji, yèyè uvwa ne mpùtā wa lufù wa ku mwele wà mvitā, ne uvwa ne mwoyi awu.

181 Mpindyewu, kakùyi mpatà nansha mikese to, tudi bamanyè ne, nyama wa lwonji awu uvwà nganyì, bukolè bùvwà ne mpùtā wa lufù bwākashāàlā ne mwoyi abu. Mpàākashèbeyiibwà Loomò wa cimpàngaanù, kadi Loomò wa ciipaapà kwangatayè kaaba kèndè; pàākashèbeyiibwà bukolè bwa cimpàngaanù, kadi bukolè bwa ciipaapà kwangatabù kaaba kààbù;

182 Mpindyewu, mpindyewu, Bwākabuulwibwà 13.14. Yesu, mu Maatàayi 24, wākabādimwija pa bwalu abu. “Cimfwànyì cya nyama wa lwonji.”

183 Pòlò, mu Tesàlònìkà Mwibìdì nshapità mwi2, ku mvensà mwi3 ne mwi4. Tùmwangàtaayi, tùmonebi Pòlò, cidìye wàmba pa bwalu abu kaaba aka. Nyuma Mwîmpè munene awu pambidi pàà mupròfetà munene wa Mukalenge ewu, tùmoneàayibì cidìye mwambe pa bwalu abu mu ditùkù dya ndekeelu. Mu Tesàlònìkà Mwibìdì nshapità mwi2 ki mùdici. Eyo, mukalenge. Nenku túbangè ne mvensà mwi3, ngeela meeji ne nyèyè. Eyo, tùbalààyaaku mpindyewu. Tèelejàayi ne ntèma yònsò, bantu bònsò. Mbanganayi bàdiku bìtabuuja ne Pòlò uvwa mùle tètè ne Nyuma Mwîmpè? Amen. Tàngilàayi kaaba aka.

Muntu nansha umwe kànùseeswishiku to nansha bya munyi; bwalu ditùkù adi kadyàkulwa to, pàdì dipàmbuka kadiyi dyanji kulwa dyàmbedi, . . .

Ùdi ùteeta kubùumushaci mu mitù ne Yèyè ùvwa ùlwa pa dîbà adi mene. Kwambayè ne: “Bidi bikèngela kwànji kulwa dipàmbuka ku Ekeleeziya, dyàmbedi,” nwamònu’s, dilwa mu Cíkondo cya Laòdikìyà eci.

. . . *ne muntu wa mpekaatu awu àsokolodiibwè, . . .*

“Muntu wa mpekaatu,” bupidyà ku Nyuma Mwímpè. Bupidyà bùsokolodiibwè.

. . . *mwànà wa dibùtuka,*

Mùvwà Yudaàsà amu’s, mulami wa cibùcilu cya ekeleeziya.

Udi ulwisha ne ùdizàngika yèyè mwine kumutù kwa cyònsò cidìbo bàbùikila ne Nzambi, anyi cidìbo bàkuukwila, mu mushindu wà ne yèyè bu Nzambi ùdi ùsòmba mu ntempèlù wa Nzambi, . . .

Mwanètù, kùdikù muntu pa buloba apa, pa kuumusha mu Vatican, udi wenza aci anyi? Cìdi penyì?

¹⁸⁴ Mpindyewu, ndààyaaku mu Bwàkabuulwibwà 13 emu, nenku necikuleejè ne muntu awu mmusòmbe pa cimenga . . . mu cimenga kampànda, ne ciine cimenga aci ncishikika pa—pa tukùnà mwandamutekète. Ne nombà wa nyama wa lwonji ùdi nkàmà yisambombo ne makumi asambombo ne yisambombo, mufùnda mu—mu Latin . . . màleetà a cyena Loomò, àdi nkàmà yisambombo ne makumi asambombo ne yisambombo awu, àdi *VICARIVS FILII DEI*, mbwena kwamba ne: “Pa kaaba kàà Mwànà wa Nzambi,” pa nkwaswa wa butùmbi wa paapà. Ne nkwaswa wendè awu, ùdi ne cifuku cya butùmbi cya ntòndo yisatu. Ne mèmè nkààdikù mujoojè cifulu cya butùmbi aci, mwimanyine pabwìpì menemene anu mùdì cyanza cyànyì pabwìpì ne mpàla wanyì emu, nunku ewu, ne—ne mèmè kumòna cifulu cya butùmbi cilengeja cya paapà aci anu mu Vatican mene amu, mèmè mwine, mwimane ncijooja, bwa ngìikalè mutwishìlbwe ne ndi mumanyè cìmvwà ngamba aci. “Yèyè ùdi ùlwisha, yèyè mwine kumutù kwa cyònsò cidìbo bàbùikila ne Nzambi aci, bantu bònsò bàà difwànà dya Nzambi abu. Yèyè ki udi mutàmbe bunsantu ku bònsò abu; musòmbe mu ntempèlù wa Nzambi, ùdileeja anu ne yèyè ki Nzambi,” ùfwilangana luse ku mpekaatu pa buloba, ne bikwabo, nudi bamanyè’s. Bushuwa.

¹⁸⁵ Pòlò mmwambe ne: “Bikèngela dipàmbuka adi dyànji kulwa dyàmbedi, mwànà wa dibùtuka awu àsokolodiibwè.”

Kanwèna bavùlùke, ne, pàncìvwà. . . neenù, mwà nnwàmbila maalù aa anyi?

¹⁸⁶ Kaa, mvwakù mwa kujinga kwikala musòmbe mwaba awu, ntèeleja Pòlò ùyiisha cyòci aci’s kadi nwènù? Hmm! Mushindu mwine wùndi njinga kumutèeleja’s wè! Kaa, ekelekele!

¹⁸⁷ Mpindyewu, cyènzàye ncinyì? “Cimfwànyì cya nyama wa lwonji.” Tesàlònìkà Mwibìdì. Mpindyewu tèelejàayi. Tèelejàayi ne ntèmà mpindyewu, ne ntèmà yònsò. Ekeleeziya ùkaavwa

mumanè kwikala ùmwva dilwa dya paapà adi. Ncinyi aci? Ndekeelu wa cikondo cya ekeleeziya aci, Pòlò. Bàakamòna cintu cya beena Nikàlàwù eci cijuuka; bàvwa bàswa kwenza muntu munsantu, (ku cinyi?) paapà. Ngiikàdilù ya maalu a pa buloba ne bantu bàà bipidi bitumbùke bàkaavwa badifindè mu ekeleeziya, ne bàshintulula ndongamu wa dikuukwila. Pòlò, mwikàle ne Nyuma Mwîmpè, ùkaavwa muumvwè aci mu Nyuma. Nenku ekeleeziya, ne bipidi byèndè ne bantu bàà myânzù mitumbùke, bantu bavwijìbwe bàà myânzù mitumbùke, ne bikwabo, mwàkamònàbo ne kùvwa kùlwa cintu kampànda. Kadi Nyuma Mwîmpè ùvwa ùbàdìmwija bwa matùkù a ndekeelu. Kanwènaayikù bavùlùke mwàkambà Yesu bwalu abu anyi? Byenzeni bya beena Nikàlàwù, ndekeelu wa byònsò kulwabi dilongesha, ne pashiishe kulwaci bulongolodi! Bânà beetu, katwèna mu mîdimà mpindyewu nansha. Vùlukàayi, nwamònu's. S'ki twètù aba.

¹⁸⁸ Byenzeni bya beena Nikàlàwù, bulongolodi bwikàle bùbanga, bantu banene bàà myânzù mitumbùke, biikàle kumutù kwa maèkèleeziyà, ne bikwabo, pashiishe kwenzabo ekeleeziya wa Katolike. Nenku Pòlò kwambayè ne kakwèna mwa kulwa cikondo cya nshiikidilu, kakwèna mwa kulwa cikondo, pàdiku kakùyì dipàmbuka dya ku Diitabuuja dilelèlè, dya mpenta to. Diitabuuja dya mpenta nedyùmushiibwè, ne bantu bàà myânzù mitumbùke nebàbwelèmu. Nebiikàlè ne muntu wàngata kaaba kàà Nzambi, wasòmba mu ntempèlù wa Nzambi, ne wàlwisha, ùdizàngika yèyè mwine kumutù kwa bantu bònsò mushindu awu. Nenku, aci, nwamònu's, ncinyi? *Nickao*, “kucimuna beena kwitabuuja.” Nwamònu anyi? “Cyònsò cidìbo bàbiikila ne Nzambi; neàsòmbè mu ntempèlù wendè wa Nzambi, bu Nzambi.” Pòlò wàkamba ne kùvwa mwa kwanji kulwa dipàmbuka dyàmbedi, mu matùkù a ndekeelu. Nenku's ki twètù aba, mwab'ewu mene mpindyewu, ne tumòna diine dipàmbuka adi, ne biikàle tumòna mùdì ekeleeziya wènda ùtamba kuseemena kule naaCì, ne wàlukila cyàkàbidi cyànyimà. Nenku tukàadi ku cikondo cya nshiikidilu. Eyo.

¹⁸⁹ Mpindyewu, piikalàbi ne mbingu makumi asambombo ne citeema mmikumbànàngàne anu menemene, ne beena Yudà biikàle mu buloba bwabo mpindyewu, ne cikondo cya ekeleeziya wa bàà Bisàmbà bya bendè cikumbànàngàne anu menemene ku cikondo cya nshiikidilu, ku cikondo cya beena Nikàlàwù. . . anyi ku cikondo cya beena Làodikiyà; Dilwa dya Mukalenge, ndekeelu wa bintu byònsò, ndekeelu wa cikondo eci ne Dyambwibwa, bidi pabwìpì pàà mushindu kaayi? Dìbà dìdìYe ùbanga lumingu lwà makumi mwandamutekète alu, anyi bidimu mwandamutekète abi, Ekeleeziya mmumane kuya.

¹⁹⁰ Nudikù mwa kucimòna anyi, balundà bàanyi? Ela cyaanza muulu ní udi mwa kucimòna. Nwamònu anyi? Mpindyewu, katwikadikù bânà batekète to. Katwikadikù kabidi tunàya

to. Tukààdi ku cikondo cya nshìikidilu. Cintu kampànda cidi pabwìpi ne kwenzeka. Tukààdi ku ndekeelu. S'ki twètù aba.

¹⁹¹ Mbingu makumi asambombo ne citeema eyi mmikumbànàngàne anu menemene; diya dya beena Yudà ndikumbànàngàne anu menemene; cikondo cya ekeleeziya ncikumbànàngàne anu menemene. Tukààdi ku cikondo cya nshìikidilu, cikondo cya nshìikidilu, cikondo cya ekeleeziya wa Laòdikiyà, ku ndekeelu kwàci. Misànjeelà-mitootò ayi yònsò yìkaadi mimanè kuyiisha mikenji yàyi. Wùkaadi mwambiibwe. Tukààdi anu mu mpulumuku. Bidimu makumi anaayi mbyòbì ebi bidì beena Yudà munkaci mwa kwalukila. Bàkaadi mu buloba bwabo.

Cidì cilondà ncinyi cìkàlà ne cya kwenzeka? Dilwa dya Dibwe adi. S'ki bwalu mbwòbù abu. Ncyènzekè díbà kaayi? Ncyèna mumanye to. Kadi, mwanètù, bwànyì mèmè, ndi muswe kwikala mudìlongòlòle. Ndi muswe kwikala ne bilàmbà byànyì bimana kulongolola byònsò.

¹⁹² Mpindyewu, tudi anu ne—anu ne tusunsa tukese menemene, kadi ndi njinga bwa nùteelejèku ne ditalala dyònsò mpindyewu bwa katanci kakese cyanààna.

Dìbà didìYe ùbanga lumingu lwà makumi mwandamutekète alu, anyi bidimu mwandamutekète abi, Ekeleeziya mmumane kuya. Tèelejààyaaku mpindyewu. Ndi ntèèla cyàkabìdi, ntèèlulula, bwa kanùpu mwoyi to. Eci ncidì Nyuma Mwìmpè mutèèke pa kasàlà kàànyì pàmvwà mfùnda apu. Tudi mu cikondo cya Laòdikiyà. Kilisto ùdi munkaci mwa kubèngiibwa kùdi ekeleeziya Wendè Sungasunga. Mùtootò wà eci cikondo, Mukenji, mmumana kwamba. Ne Izaleela ùdi mu buloba bwèndè. Nudi bamòne kutùkaadi anyi? Tukààdi ku ndekeelu.

Mpindyewu, anu kaadìyi kàmwè anyi tukwabo tubidi bwa dyela nsèkà.

¹⁹³ Byònsò bitùdi mpindyewu tumòna ebi, nebitwàmbùlwishè, ku ngàsà Wendè, patùdi tudyènzeja bwa kulenga Bitampì Mwandamutekète bya ndekeelu ebi. Nudi numòna mwaba wùvwabi bifwànyine kwikala bitùpicile anyi? Kuumukila ku Bwàkabuulwibwà 6.1 too ne ku Bwàkabuulwibwà 19.21, ncifwànyine kwikala citùpìte, bwalu, nwamònu's, tuwa bafwànyine kwikala tuteeta kucyàngata bwa kale wàwa, mu cikondo cya bàà Bisàmbà bya bendè eci; pààbì, nudi numòna's, cidi mu eci cikondo. Nwamònu anyi?

Mpindyewu, twacìjaadikìdi ku Dìyi dya Nzambì, ne ku maalu-malonda, ne ku bintu byònsò, ne ku bimanyinu bya bikondo, ku matùkù ne, kí nkushààle cintu nansha cimwe to. Tukààdi ku dikumbana dya maalu ònsò dya bàà Bisàmbà bya bendè. Citwènza ncinyi—ncinyi pa bwalu abu? Mmusùukà wànyì ne musùukà wèbè; mmwoyi wànyì ne mwoyi wèbè; mmyoyi ya bananga bèètù. Mbatàmbe kutwèngeleka be. Tudi bapetèpète

maalu matàmbe kupeepela. Mbîmpè bwa tûyaayi kumpàla. Dîbà dîkaadi diyè bikolè kutamba munùdi nwênù nwela meeji amu, vùlukàayi anu cyanàànà.

¹⁹⁴ Mpindyewu, dîyi dya dipapulungana, panwikalà baswe kudifùnda. Tèelejàayi ne ntèmà, bu nwênù mwa kuswà. Edi ndîyi dyànyi dya ndekeelu dya dyela nsèkà, dya kumpàla kwa kwa dyòdi adi's; ndi ne kaacintu kakese menemene kaaba aka paanyimà pàà aka nunku, kantu kakese kafùnda kândi muswe kwamba. Mpindyewu tùùkijàayi anu kakese cyanàànà nùteelejè ne ntèmà, ndi nnùpèèsha cintu kampàndà cya cinùpapula, bwa kubwela buludi mu eci. Nwamònu anyi?

Kakwènaku nansha mpungà wa bunene bwa mupimbu wà keelè pankaci pàà ndekeelu wa cikondo eci ne Dilwa dya Kilisto to. Byònsò, kí nkushààle cintu nansha cimwe to. Izaleela ùkaadi mu buloba bwèndè anyi? Aci's tudi bamanyè. [Disangisha dîdi dyàmba ne: "Amen."—Muf.] Tudi mu Cikondo cya Laòdikiyà anyi? ["Amen."] Mukenji wa cikondo eci cya mpenta wùkaadi mwambiùbwe, bwa kutèeta bwa kunyùkusha bantu bwa kubàaluja ku Dibenesha dya mpenta dya ku cibangidilu anyi? ["Amen."] Mùsànjeelà yònsò ùkaadi mulwe mu cikondo cyèndè, anu cintu cimwecimwe aci anyi? ["Amen."] Matùngà àdi àlwisha matùngà naawu anyi? ["Amen."] Cikupi anyi? Kùdikù ciyòòlè cya nzala mu ditùnga leelu ewu, Ekeleeziya mulelèlè wèndesha màshinyi nkàmà ya kilòmèètà bènda bàkèba bwa kuumvwa Dîyi dya Nzambi anyi? ["Amen."] "Kaciyi cya dyàmpà nkààyaadi to, kadi cya kuumvwa Dîyi dya Nzambi." Nkulwè ciyòòlè cya nzala. Ncya bushuwa anyi? ["Amen."] Mòna's, tudi ne mwoyi anu munkaci mwàci menemene, mwab'ewu mene patùdi twakulangana apa. Nudi bamòne kutùkaadi anyi? Tudi bindile Dibwe adi.

¹⁹⁵ Dîyi dya dipapulungana's! Kuumukila anu ku cikondo cyàkenzelà Nzambi Abraham mulayi... Eci kacìnùpici to. Kuumukila anu ku cikondo cyàkenzelà Nzambi Abraham mulayi, Genese 12.3, too ne ku cikondo cyàkabèngiibwà Kilisto mu cidimu cya 33 cya bikondo byetu ebi, kùdi beena Yudà; bilondèshile Ngalàtiyà 3.16 ne 17, ne bilondèshile dilondangana dya maalu a bikondo dya beena Ebèlù dya Usher, dya U-s-h-e-r, dya Usher; bukole bwa Nzambi bùvwa ne beena Yudà munda mwa bidimu cinunu ne nkàmà citeema ne makumi ataanu ne binaayi bulubulu. Nzambi wàkatàngila bwalu bwa beena Yudà bidimu cinunu ne nkàmà citeema ne makumi ataanu ne binaayi, bilondèshile dilondangana dya maalu a bikondo dya beena Yudà, ne bilondèshile Ngalàtiyà 3.16 ne 17. Ndi ne mikwabo Mifùndu yàbùngì, kadi ndi mfilà anu yòyi ayi.

Pashiishe, paanyimà pàà bôbò bamanè kubènga Kilisto, Yèyè wàkakùdimukila kùdi bàà Bisàmbà bya bendè, bwa kwangata cisàmbà bwa Dîna Dyèndè. Nudi baswè Mufùndù pa cyòci aci, mwaba wùdici anyi? Byenzedi 15.14.

196 Mpindyewu, patùdi twenza makumi, tudi tusangana ne tudi anu menemene (tèelejàayi) ne bidimu dikumi ne mwandamutekètè bìdi bishààle, ne netwikalè ne cipòòlò cya dîbà anu cimwecimwe aci citùdi bapèèshìibwe, pàdi Nzambi ùtàngila bwalu bwetu mu bukolè bwa Nyuma Mwimpè apa, kuumukila ku cidimu cya 33 too ne mu 1977. Cipòòlò cya dîbà anu cimwecimwe aci, cya bidimu cinunu ne nkàmà citeema ne makumi ataanu ne binaayi, Nzambi ùdi ùtàngila bwalu bwetu mushindu wumwewumwe wàkatàngilàYe bwa beena Yudà awu. Bwa aci nudi nwamba bìshi?

197 Mpindyewu, fùndaaku mu kàlipé keebe amu, Mufùndù mukese mwab'ewu wùndi muswe kunùpèèsha ewu. Lewitiki 25, kubangila ku mvensà wa 8. Nzambi wàkeela dîyì dya cibilù cya disàнка, bidimu makumi anaayi ne citeema byònsò. Cidimu cya makumi ataanu civwa ncibilù cya disàнка. Tudi bamanyè nanku. Mmutùdi tuumvwa nanku. Kuumukila ku cibilù cya disàнка cya kumpàla, cya mu Lewitiki 25.8 aci, mu 1977 ki mwikalà cibilù cya disàнка cya makumi mwandamutekète, byèenza anu bidimu binunu bisatu ne nkàmà yinaayi ne makumi asatu bulubulu. *Cibilù cya disàнка*, mbwena kwamba ne: “Dibànda! Dilekelela!”

Kaa, tudi bindile dilwa dya Ditùkù dya disàнка dya Bukalenge bwa bidimu cinunu adi,
 Dyàlwà Mukalenge wetù mubènèshìibwe awu bwa kwangata Mukàj'Endè-musèla;
 Kaa, buloba bùdi bùtwa mikèmu, bwèla mbilà bwa ditùkù adi dya diikisha dya kalolo,
 Dyàlukilà cyàkàbìdi Musùngidi wetù pa buloba.

198 Nuumvù aci anyi? [Disangisha didi dyàmba ne: “Amen.”—Muf.] Nzambi mmutàngile bwalu bwetu cikondo búngì anu bumwebumwe bùdiYe mutàngile bwalu bwa beena Yudà abu. Kuumukila ku cikondo cyàkapèèshàYe Abraham mulayi aci, too ne ku dibèngiibwa dya Maasiyà mu cidimu cya 33 cya bikondo byetu ebi, kùvwa bidimu cinunu ne nkàmà citeema ne makumi ataanu ne binaayi. Nenuku patùdi twakulangana apa nkutùshààdile bidimu dikumi ne mwandamutekète. Tuvwa ne bidimu bitwè ku cinunu ne nkàmà citeema ne makumi asatu ne bya mu njila. Nkutùshààdile bidimu dikumi ne mwandamutekète, too ne mu cidimu cya '77, necìikalè cibilù cya disàнка cya makumi mwandamutekète kacya anu ku ntwàdijilu wa bibilù bya disàнка. Nenuku necìikalè cinyi? Kaa, mwanèètù! Tèelejàayi ne ntèmà mpindyewu. Kacinùpici to. Necìikalè cibilù cya disàнка cya dibànda dya Mukàjì-musèla wa bàà Bisàmbà bya bendè, ne dyalukila dya Kilisto kùdi beena Yudà, pààpàtukàbo mu bupika. Amen! Kanwènaayikù numòna anyi? Buumùkile pa buloba bujimà, mbakùngwile kuntwaku

bwa ditùkù adi. Kaa, ekelekele! Nudi bamòne kutùkaadi anyi? Katwèna bamanyè ne necyènzekè dîbà kaayi to. Tudi ku cikondo cya nshìikidilu.

¹⁹⁹ Mpindyewu tèèlejàayi. Bwenu nwènù beena kale bàdì mu—mu ekeleeziya emu, bàdì kaaba aka kùkaadi ntàntà mule abu, ndi muswe bwa nùmonèku cintu kampànda. Ncìvwakù muyiilè cyôci eci to too ne makèèlèla awu; ndi mucyàngùle kùdì mufùndi wa maalu-malonda, Paul Boyd, ne pashùshe. . . Ne mèmè ndi mucilondèshìle mu Mifùndu, mwangùle matùkù makwabo a ngondo aa kaaba aka, ne bikwabo, ne mubyàngàte, ne mubikèbùlùle, mubilondèshe too ne ku ndekeelu.

²⁰⁰ Mpindyewu, mu cidimu cya 1933, patùvwà munkaci mwa kukuukwìla mu Masonic Temple emu, mwaba wùdì église de Christ úsanganyiibwa leelu ewu emu, mu dinda kampànda dya ngondo mwinâyì, kumpàlà kwa kuumuka kumbelu, mwawa ndàmbula kàshinyì kàànyì (Mwawa mupetè kàshinyì kàà modèle '33, ne mwawa munkaci mwa kukàlàmbula ku mudimu wà Mukalenge.), ki mu cìkèènà-kumòna, mèmè kumòna cikondo cya nshìikidilu (Mpindyewu mònaayi mùdì bwalu ebù bükòka ntèmà, kuntwaku pàncìvwà anu mwànà apu, ne nudi mwa kudifwànyikijila mmwènekèlu uvwa kàshinyì kàà modèle 1933 mwa kwikala nendè, mpindyewu, mmwènekèlu uvwakù mwa kwikala nendè.), nenku mèmè kuya ku Masonic Temple aku, kùvwà, bàmwè bàà kunùdì nwènù beena kale kaaba aka mbavùlùke, ncìfùnda pa dibeji dya kale kumbèlu, cikaadi cimana kutuuta ku màshinyì ne ciyè pa buloba bujimà, nwamònu's, mùvwawa mmu cidimu cya 1933, ne mèmè kudyànjlila kwamba ne kùvwawa mwa kwikala bwalu bunene kampànda bwa bwènza dibungama bwènzekela États-Unis ewu kumpàla, anyì, patwàmbà kufika mu cidimu cya 1977. Mbanganyì bàdìku bavùlùke pàngààkambà cyôci aci? Tàngilàayi byanza. Bushuwa's.

²⁰¹ Tàngilàayi mpindyewu, mèmè kudyànjlila kwamba bintu mwandamutekètè bicìvwà munkaci mwa. . .kumpàlà kwa dikùmbana dinene dya maalu ónsò edi anyì cintu cinène cìvwà mwa kwenzeka muneemu mu États-Unis, cintu cinène kampànda cya cikwàcisha bwòwà.

Mèmè kwamba, mpindyewu vùlukàayi ne, eci cìvwawa nkumpàlà kwa kubangaci, mèmè kwamba ne tuvwa mwa kubwèla mu Mvità Miibìdì ya Buloba bujimà. Mbanganyì bàdì bavùlùke ne ngàkacyàmba? Ambàayi ne: "Amen." [Disangisha didi dyàmba ne: "Amen."—Muf.] Eyo. Mvità Miibìdì ya Buloba bujimà! Mèmè kwamba ne: "Mfumu wa ditùnga udikù mpindyewu ewu ùdì. . ." Ndi mutentùle eci mu Mufùndu wà kale, wùcìdìku ne leelu awu, cintu cya kale aci makèèlèla awu, ne: "Mfumu wa ditùnga utùdì nendè mpindyewu ewu," wa bwena uvwa. . .Mbanganyì bàdì bavùlùke ne ùvwawa nganyì? [Mwanèètù wa balùme kampànda ùdì wàmba ne: "Franklin

Roosevelt.”] Franklin D. Roosevelt. Mémè kwamba ne: “Mfumu wa ditunga utùdi nendè mpindyewu ewu neàfilè mpàla nansha too ne ku musangu mwinâyì,” ùvwa mu musangu wèndè wà kumpàla musangu awu, “neàfilè mpàla too ne ku musangu mwinâyì, ne netùkafikishiibwè ku Mvità Miibìdì ya Buloba bujimà.”

²⁰² Mémè kwamba ne: “Mfumu wa cimbàmbilà udi ujuuka mpindyewu mu Italie, Mussolini awu, neàngatè bukòokeshi. Ne yèyè neàye ku Éthiopie, ne Éthiopie neàponè ku makàsà èndè.” Kùdi bantu basòmbe mwab’ewu mpindyewu bàdì bamanyè ne, kùvwa musùmbà wa bantu bààkalwà e kwimana, pàmvwà ngenza disangisha dyànyì mu Redman’s Hall kuntwaku dilòdòlò adi, pààkakèkèngelàbì bwa mémè kuyakù bwa kuyiisha cyòcì aci, Redman’s Hall, bàmba kunkùpa pambèlu pàà cibambalu aci bwalu mvwa mwambe cintu bu nanku. [Mwanèètù wa bakàjì Wilson ùdi wàmba ne: “Amen. Ncya bushuwa.”—Muf.] Eyowa. Eyowa. Màndamù Wilson, ndi mumanyè ne wèwè udi . . . Ncya bushuwa. Pàngàakambà cyòcì aci. . . Kadi wàkacyènza anyi? “Kadi,” mungàakambà, “neàfikè ku ndekeelu wa bundù,” ne yèyè’s wàkakùfika. Yèyè ne mukàjì uvwayè wènda nendè bundumbà, bààkabèèlesha tutungu ne kubàkùdika ku mwonji mu mùsèèsù, makàsà meela muulu, bilàmbà byabo bilembeleja. Eyo, aci’s cyàkenzeka.

²⁰³ Ne pashìishe mémè kwamba ne: “Bányìshidì bakàjì bwa kwelabò tukàndà twa masungulangana. Cìdì kakùyì mpatà to bundù pa ditunga. Nenku, mu dyela dya tukàndà amu, dínghà ditùkù nebasungulè muntu udi kàyì ukùmbana to.” S’mbenze cyòcì aci mu masungulangana àshààdì aa. Ekelekele, ekelekele! Inaayi. . . (Mémè kwamba ne: “Maalu a mamanya neàye kumpàla mu mushindu wà ne. . .”) To, mwab’ewu, aci nciisàtù. Mfwilaayikù luse.

²⁰⁴ Cyàkalondà ncyòcì eci, mwaba awu, ciinâyì. Mémè kwamba ne: “Yètu mvità neyìikalè ne Allemagne, ne nebiibakè mwaba munene menemene wà dibwe dya nshààmendà ne nebàdyèlè mu bimanu muntwamu, ne beena Amerike nebàdye mutuutu wà wùkwàcisha ne bwòwà.” Nzambi wa Bukolè bwònsò mmumanye, Mwena kumpàla kùndì mwimane mpindyewu awu, mémè ngàkamòna ba-Nazis badìshikàmìne abu bàtwa beena Amerike misèbà nunku ewu, ne bikwabo, ku lwine lumbu alu. Ne kùdi nsongàalùme yàbùngì yìdì miimane mpindyewu kaaba aka yìvwà ku lumbu lwà Siegfried Line aku, bàdì bamanyè civwàcì. Ne vùlukààyì ne, civwa mbidimu dikumi ne cimwe kumpàla kwa lumbu lwà Siegfried Line alu kwibakiibwalù. Nzambi mmulelèlèlè anyi? Yèyè ùcìtu anu ùdyànjlila kwamba bintu byènzekeka anyi? Tàngilààyì. Aci, civwa nciinâyì.

²⁰⁵ Mpindyewu cintu ciitànù. “Maalu a mamanya neàye kumpàla mu mushindu wà ne nebènzè kàshinyì kàà kakàyì kàkèngela kwikalabò bàkàludika ne yèndà to. Ne tùshinyì

netùtungunukè anu ne kupèeshiibwa mbùngakeenu wa diyi, too ne ku dikùmbana dya maalu ònsò, cikondo cya nshìikidilu. Mémè kumòna dîkù dya beena Amerike bènda bàpweka ne njila, mu njila mwalabàle, bèndela mu kàshinyi beelè nyimà kùvwà kùkèngelà yèndà kwikalayè aku, bìvwa bimwèka anu bu bàvwà bànyà dames anyi twarta.” Nenku twètù’s tukàadi bakàpetè. Kàkaadi ku télévision. *Maalu À Mamanya À Mwasàkànaayi*, to, *Byamù Bilamakaja’s wè*, bònsò’s bàdi naaci. Tukàadi bapetè kàshinyi aku. Nkakòntònònwena kule, kùdì—kùdì tulòndò twa mpolondo. Kabyàkukèngela bwa bôbò kwikalàmù ne yèndà to. Udi ulongolola anu kaamulonda keebe mushindu ewu, anu mùtù wenza bwa tèlefonè webè amu, nenku kàshinyi keebe aku kàya neebe too ne kuntwaku; kàkàyi mwa kupeta njùwù, anyi ní ncinyi, ne tùshinyi tukwabo to. Cyamu cya nzembu cìdi cìsàka tukwabo twònsò kule neebe. Nwamònu anyi? Bàkaadi naakù. Kaa, ekelekele! Elààyikù meeji pa bwalu abu. Cidyànjila kwamba bidimu makumi asatu kumpàlà kwa kwenzekaci!

²⁰⁶ Mpindyewu, aci’s cìdi cìkatùfikisha dîbà adi ku disungula dya Kennedy bu Mfumu wa ditùnga.

Nenku kàshinyi kùikalà mwa kubwela mu—mu cyalu aka, kàkùmbaja bintu bitaanu (pa mwandamutekète) bikaadi byenzèke anu mu byòbi.

²⁰⁷ Mpindyewu, mémè kudyànjila kwamba, ne mwambe ne: “Ndi mumòne muntu mukàji munene ùjuuka, wa mmwènekelu mulenga, muvwàle bilàmbà byenzè bu bikùnzùbile bya bukalenge bubàndile.” Nenku ndi mwelè tubòkò tukese kwìnshì eku ne: “(Ùvwa mukòòkeshi munene mu États-Unis; pàmwàpa ng’ekeleeziya wa Katolike.)” Muntu mukàji, muntu mukàji kampànda; ncyèna mumanyè ne neciikalè ekeleeziya wa Katolike to. Ncyèna mumanyè to. Ncyèna mwa kucyàmba to. Cintu cimwepele cìndi mumòne, ndi mumòne muntu mukàji, ki kwàjiki.

²⁰⁸ Kadi edi nditùngà dya mwànà mukàji. Ditùnga edi didi nombà dikumi ne isatu, mu cipròfetà. Didi ne mishoonyi dikumi ne yisatu, mìtootò dikumi ne yisatu. Dyàkabanga ne nkòlònyí dikumi ne yisatu. Dikumi ne yisatu, dikumi ne yisatu, byònsò bìdi dikumi ne yisatu. Didi òmwènekela mu nshapità wa 13 wa Bwàkabuulwibwà, bifwànàngàne. Didi dikumi ne yisatu. Ne dyòdi nditùngà dya mwànà mukàji.

²⁰⁹ Tubàdi twa dishipa dya mabàkà mu Amerike tùdi tùfila dishipa dya mabàkà, kùdì bèètù bantu bakàji, kutàmba matùnga makwabo ònsò. Nsòmbelu mulenga mu dyetu ditùnga mmushààdile, ne dishipa dya mabàkà, kutàmba mùdìbi mu France anyi mu Italie, mwine mùdi bundumbà bwènzekela mu misèsù amu. Pa nanku, kadi bôbò abu mbandumbà; bèètù twètù mbakàji basèla kadi bàteeta kwikala basòmbè ne balùmè bùngi

cyakaa, ne balùmè bààbúngì bàdi basèlàngàne bàteeta kwikala basòmbe ne bakàjì bakwàbo.

²¹⁰ Mu matùngà mùdìbo ne disèlà dya bakàjì bààbúngì, mbitàmbe bwìmpè misangu cinunu. Kadi, pààbì's, disèlà dya bakàjì bààbúngì ndìbì, tudì bamanyè. Kadi, mbwa kuleeja anu mutùdi twètù bapwekè milongo.

²¹¹ Ndi ne kapese kàà cibèjibeji kuntu kwàka, mùdìbo baleejè ne pàvwà nsongàalùmè yetu twètù ya beena Amerike miyè dyàmwàmwà dya mbù, mu mvità ya ndekeelu eyi, bàmba ne kupìta pa, ngeela meeji, cìvwa mbya pa lukàmà bu makumi mwandamutekeke... Mòna's, mpindyewu, anjì indilaayi kakese, ngeela meeji bàvwa mbasatu pa banaayi bàvwà bayè dyàmwàmwà dya mbù, bàvwà bakàjì baabo bashipè naabò mabàkà kumpàlà kwa kwalukilabò. Ne mutù wàci wà bwalu munene wùdi wàmba ne: "Cìdi cyenzèkèle nsòmbelu mulenga wa beena Amerike beetu ncinyi?" Nudi bavùlùke ne nuvwa bawùmòne anyi? Nwènù bònsò nuvwa bawùmòne, ngeela meeji. "Cìdi cyenzèkèle nsòmbelu mulenga wa bakàjì beetu beena Amerike ncinyi?" Mu byapù, bàdi bàkwàta mudimu kuntwaku ne balùme bakwabo. Nditùngà dya mwànà mukàjì. Cyàpetàdi ncinyi? Nzambi muntu mukàjì, anyi nzambi mukàjì.

²¹² Mpindyewu, pashiishe, paanyimà pàà cyòci aci, mèmè kukùdimuka e kutàngila. Ki mèmè kumòna États-Unis ewu munkaci mwa kwoshika cyenzè mùdi mushikì wà bintu wòshika amu, mbwebwe yìvwa mitaayisha. Ne ùvwa wòshika cyenzè mùdi mushikì wà—wà mudilu munda mwa bitùpà bya nkùnyi, amu, anyi cintu kampànda cimulàkùshe mudilu. Ki mèmè kutàngila too ne kùvwà mèsù àshiikila aku, ditùngà òvwa ditaayisha dishàale anu tusùnsukilà. Ki pashiishe cikèèna-kumòna aci kunguumukaci. Bitaanu pa bisatu abi bikaadi byenzèke...anyì, bitaanu pa mwandamutekète's wè, bikaadi byenzèke.

²¹³ Kadi's ki cyòci cìdi cilwa cìleeja eci. Ki pashiishe mèmè kudyànjila kwamba. Kacya ncitukù mwambe ne Mukalenge ngudi mucingambile to, kadi, mèmè mwimane mu dinda adi mu ekeleeziya, mèmè kwamba ne: "Mushindu wùdi maalu ènda àya kumpàla..." Mèmè ntu mwalùkile too ne ku ndekeelu kwa lumbu lwàbò alu, ne mèmè kuya lubilu too ne ku ndekeelu mukwabo wa lumbu alu. Mèmè kwamba ne: "Mushindu wùdi maalu ènda àya kumpàla, nèndyanjilè kwamba ne cikondo... Ncyèna mumanye ne ndi ncyàmba bwa cinyi to. Kadi ndi ndyànjila kwamba ne nebyènzèkè byònsò pankaci pàà mpindyewu mene, cidimu cya 1933 eci, ne cya 1977."

Kadi nciyi mucimanyè to, Nzambi ngudi mumanye mwoyi wànyì, ncìvwakù mucimanyè to too ne makèèlèlà awu ne, cidimu cya 1977 ncyà cibilù cya disànka, kabidi kwenzèke anu menemene cikondo bùngi bwa mwomùmwe bwàkapèèshàYe

Izaleela abu, ne bikwabo byònsò ku ndekeelu. Pa nanku tudi ku. . . Kadi's ki twètù aba ku ndekeelu kwa cikondo, ku dilwa dya lumingu lwa makumi mwandamutekète. Katwèna bamanyè ne ndìbà kaayi dyàà Ekeleeziya to. Kaa, ekelekele! Citùdì mwa kwenza ki cinyi's, nwènù balundà bàanyi? Tukaàdi penyì?

²¹⁴ Nudi bamòne citùdì mpindyewu anyi? [Disangisha didi dyamba ne: "Amen."—Muf.] Nudi bumvwè mpindyewu lumingu lwà makumi mwandamutekète lwà Danyèle alu anyi? ["Amen."]

Mònaayi, mpindyewu, patwàtùngunukà bwa kubwela mu Bitampì ebi ne bikwabo, tukàngula Bitampì abi. Cya kumpàla cìdì cìpàtuka, mubàndi wa pa kabalù katòòke, ne mwikàle ne butà bwa mikete mu cyanza. Tàngilàayi ne mulùmýàna awu nganyi. Tàngilàayi mubàndi wa pa kabalù katòòkòlòke udi paanyimà pèndè awu. Nwamònu anyi? Tàngilàayi ne nganyi mwine awu, ne tàngilàayi mùdìbo bàlwa. Tàngilàayi mùdì binunu lukàmà ne makumi anaayi ne binaayi abi bilwa. Tàngilàayi pàdì virgo mukùtàkàne awu ùlwa. Pashìishe tàngilàayi mùdì bintu byònsò ebi byènzeka: dipòngolola dya Mpànza, Makènga, nyuma ya bukooyà yisatu mifwànàngàne ne ndimbà ayi. Tàngilàayi bintu abi mùdìbi bikùmbanàngana anu menemene mu makènga awu, anu menemene pàdìwu àpòngolodiibwa apu. Musangu wònsò wùdì Citampì cikàngudiibwa, dikènga didi dipòngolodiibwa, ne dibùtudiibwa dilwa. Kadi tàngilàayi cìdì cyènzekà mpindyewu mene kundeelelu aku.

²¹⁵ Nenku, kaa, tàngilàayi bapròfetà basatu aba. . . anyi bapròfetà babidi aba, pàdìbo bàjuuka kaaba aka. Kadi munkaci mwa lumingu, bàdì bùùmushiibwa mushindu awu, ne pashìishe Mvità ya Harmaguédon yìdì yikùtuka. Pashìishe Nzambi ùdì ùbanga kwakula, Yèyè mwine, pashìishe ùdì ùjuuka ne ùbanga kulwanganana mvità. Bapròfetà abu bàdì bàtuuta buloba. Bàdì bàyiisha Dìna dya Yesu Kilisto. Bàdì bàbàtiiza mushindu wumwewumwe awu. Bàdì bènza cintu cimwecimwe, cyàkenzà beena mpenta bàà kumpàla, ne baataatù aci, ne bààbúngì bàdì bàbàlonda. Kadi aba bàdì badyènzè nsangilu abu, bulongolodi abu, mbutùngùnùke anu ne kuya, ne nansha mene bukolè bwa bapròfetà abu kabwàkabùcibula to. Ki ndekeelu wa byònsò kwambò ne: "Netùcìvwijè cyònsò bulongolodi bumwepele." Nenku ùdì ùbweja (ncinyi aci?) cinyangu, cyena Loomò, bwa kutàmba kupaasalaja cintu cyònsò nkòòng, cìdì cìvwija dibùtuka aci. "Cinyangu cìdì cìvwijà dibùtuka" aci, cìdì cibweja byònsò, "bukooyà."

²¹⁶ Vùlukàayi ne, maamù ndumbà wa kale uvwa musòmbe pa nyama wa lwonji, uvwa muvwàle bilàmbà bikùnze kùnzùù mushindu awu awu, nyama awu ùvwa ne mitù mwandamutekète ne nsèngù dikumi. Nudi bavùlùke aci anyi? "Ne yèyè ùvwa ne lupànza mu cyanza, lwà bukooyà bwa cinyangu cyèndè." Aci cìvwa ndilongesha dyèndè dyàkatangalajilàye bantu. Kadi's ki

bwalu mbwôbù abu, nwênù bânà beetu. Tukàadi ku cikondo cya nshiikidilu.

217 Nwênù bânà bakese, katwênakù bamanyè to, tudi bafwànyine kubènga kwikala ne mwoyi bya katùyikù mwa kwalukila kabidi dilòdòlò edi to. Tudi bafwànyine kubènga kwikala ne mwoyi bya katùyikù mwa kumòngana kabidi muntu ne mukwèndè to. Ncyèna mumanyè. Kadi, ndekeelu ùdi pabwìpì menemene, ndekeelu ùdi pabwìpì menemene. Mufùndù's ngwòwò ewu. Kakùyì mpatà to, ki cileeji cya mu Mifùndù ncyôci aci, cipwàngane.

218 Mpindyewu, kwòkù cintu kampànda cyùdi kùyì muumvwe to, mfùndilè kabeji ùcimmanyishè. Nwamònu anyi? Ambàku cintu kampànda. Bàmwè bàà kunùdi nwênù bânà beetu bàdi bàtèelejà mikàbà ya mèyì kuntwaku abu, mu bitùpà bikwabo, kwòkù cintu kampànda cìndiku mwa kwenza bwa kunùkwàcisha, nùmmanyishaayi. Wèwè udi mwa kubènga kutwà ku cyànyì, ne mèmè ndi mufwànyine kubènga kutwà ku cya bulongolodi bwenu; kì ngwèwè to, kadi ndongolwelu wa bulongolodi bwenu abu. Ncitu mubènge kutwà ku cya beena Katolike to. Ncyèna ngamba ne ncyèna munangè beena Katolike, ne ncyèna munangè bantu bàà mu bulongolodi to. Kì nnanku to. Ntu munangè bantu bònsò, kadi ndi mbèngangana ne ndongolwelu udi kacya wàshààla anu munùbàm̀bidikile panshì awu. Ki cìdiku ncyôci ncyaci, ndongolwelu waci awu. Ki cyôci aci.

219 Mèmè ncìvwa mubèngàngàne ne Allemagne to; cìvwa n'Nazisme. Ncìvwa mubèngàngàne ne beena Italie to; bwalu bùvwa—bùvwa mbwà dibèngangana ne Fascisme. Nenku vùlukàayi ne, ngàkadyànjila kwamba dikwabo dīyì mu ciine cikondo aci, anu dīyì didyànjila kwamba cyanàana, ne bààbùngì bàà kunùdi nwênù beena kale abu mbacivùlùke. Ngàkamba ne: “Kùdi tusùmbù tunène tusatu tùdi tuteeta kwangata bukòokeshi pa buloba leelu ewu: Fascisme, Nazisme, ne Communisme.” Kadi ngàkamba cinyì? Twònsò atu tùvwa mwa kuya kuupuka mu Communisme.

220 Pashiishe mèmè kunwàmbila bònsò bwa kucyàmbulula ne: “Ikàlaayi ne mèsù matàngija pa Russie.” Nudi bavùlùke aci anyi? “Ikàlaayi ne mèsù matàngija pa Russie. Yèyè yònsò neàkuupukè mu Communisme.”

Nenku pashiishe neàkuupukè yèyè yònsò, ndekeelu wa byònsò, mu cyena Katolike. Vùlukàayi ne, byònsò nebikuupukè mu cyena Katolike. Ncya bushuwa menemene. Aci nku Mvità ya Harmaguédon, kule *emu* nunku, pàalwà Kilisto, Yèyè mwine.

221 Kadi bapròfetà basatu aba. . . Bidimu bisatu ne cyàbìbìdì cimwe ebi's wè, aci m' Bwàkabuulwibwà 11.3, nukàadi bamubalè misangu ne misangu: “Ndi mufile bukòlè kùdi bantèmù Bàanyì babidi, ne bóbò nebàmbè bìpròfetà munda mwa matùkù cinunu

ne nkàmà yibidi ne makumi asambombo.” Mbúngì kaayi abu, matùkù cinunu ne nkàmà yibidi ne makumi asambombo? Bidimu bisatu ne cyàbibìdì cimwe. “Ne pashiishe nebàshebeyiibwè mu mùsèsèsù,” anu munkacì mene mwa lumingu lwà makumi mwandamutekète elu’s.

Pa nanku, nwamònu mwaba wùdì mbingu makumi mwandamutekète ya Danyèlè yisanganyiiibwa anyi? Nudi bamòne mwaba wutùdì ne mwoyi anyi? Tukàadi ku ndekeelu, nwênù balundà bàanyi bananga. Tukàadi ku ndekeelu. Matùkù . . .

Matùngà àkaadi àpanduluka, Izaleela nyewu
ùtàbuluka,
Bimanyinu byàkadyànjlà bapròfetà kwamba;
(S’ki twètù aba.)
Matùkù a bàà Bisàmbà bya bendè mmabala,
(Apa’s.) mùle tètè ne bintu bìdì bikwàcisha
bwôwà;
“Alùkilaayi, Éyì nwênù bàdì batangàlàjiiibwe,
kùdì beenu sungasunga.”

Tùwimbàayi:

Ditùkù dya bupikudi dikaadi pabwìpì,
Myoyi ya bantu yìdì yàmba kwimana bwa
bwôwà;
Ujiiibwáyi ne Nyuma, ikàlaayi ne myéndù yenu
milongolola ne misukula,
Bàndulukàayi! Bupikudi bwenu bùkaadi
pabwìpì.

Kaa, ekelekele! Abi kí mbilenga bilayà anyi?

Matùngà àkaadi àpanduluka, Izaleela nyewu
ùtàbuluka,
Bimanyinu byàkadyànjlà bapròfetà kwamba;
Matùkù a bàà Bisàmbà bya bendè mmabala,
mùle tètè ne bintu bìdì bikwàcisha bwôwà,
“Alùkilaayi, Éyì nwênù bàdì batangàlàjiiibwe,
kùdì beenu sungasunga.”

Bònsò pàmwè mpindyewu:

Ditùkù dya bupikudi dikaadi pabwìpì,
Myoyi ya bantu yìdì yàmba kwimana bwa
bwôwà;
Ujiiibwáyi ne Nyuma, ikàlaayi ne myéndù yenu
milongolola ne misukula,
Bàndulukàayi! Bupikudi bwenu bùkaadi
pabwìpì.

Lekàlaayi mèmè nnwìmbilè citùminyì cikese.

Baprófetà bàà mashimi bàdi bàshima, bàdi
bàvila Bulelèlèlè bwa Nzambi,
Bwa ne Yesu Kilisto awu ki Nzambi wetù;

Bàdi bàMuvwija Mupersona mwisâtù kampànda. Aci nudi
bamanyè. Kadi, kí ncidìYè nansha. Yèyè ùdi Nzambi wetù.

Kadi twètù netwèndelè myaba yàkadyatà
bapostolo.

Bwalu ditùkù dya bupikudi dikaadi pabwìpì,
Myoyi ya bantu yìdi yàmba kwimana bwa
bwôwà;
Ujìibwáyì ne Nyuma, ikàlaayi ne myèndù yenu
milongolola ne misukula,
Bàndulukààyi! Bupikudi bwenu bùkaadi
pabwìpì.

²²² Kanwènaayikù ne disànka anyi? Alùkila ku Mukenji, wèwè
mwanètètù! Alùkila ku cya ku cibangidilu. Alùkila ku mpenta!
Alùkila ku dibènesha dya cya bushuwa! Alùkila ku Dìnà dya
Yesu Kilisto! Alùkila ku dibàtiiza dya Nyuma Mwìmpè! Alùkila
ku bimanyinu ne maalu a kukèma! Alùkila ku mpenta! Shààla
kule ne bulongolodi! Alùkila ku Nyuma Mwìmpè! Yèyè ki
Mulongeshi wetù.

Bwalu ditùkù dya bupikudi dikaadi pabwìpì,
Myoyi ya bantu yìdi yàmba kwimana bwa
bwôwà;
Ujìibwáyì ne Nyuma, ikalaayi ne myèndù yenu
milongolola ne misukula,
Bàndulukààyi! Bupikudi bwenu bùkaadi
pabwìpì.

²²³ Abi kí mbilenga bilayà anyi? Cyàkambà muprófetà ncinyi?
“Nekùlwe cikondo kwikalàku, kùyi mwa kwamba ne mbufùku
anyì mmundaamuunyà.” Tàngilààyi mùdìku. Nwamònu anyi?
Kaa, kubì be, munda mwa bikondo byònsò bya ekeleeziya!

Kadi ne—nekwikalè Bukènkè ku ìbaamulòòlò,
Kajila kàà ku Butùmbi nenùkàpetè bushuwa;
Mu njila wa màyì mmùdì Bukènkè leelu,
Bajiika mu Dìnà dya mushinga dya Yesu.
Batekète ne bakolè, nyingàlalaayi ku
mpekaatu yenu yònsò,
Nyuma Mwìmpè neàbwelè cya bushuwa;
Makènkè a dilòòlò aa àfikì,
Mbulelela ne Nzambi ne Kilisto badi Umwe.

Nekwikalè Bukènkè . . .

Bònsò pàmwè!

. . . ku ibaamulòlò,
 Kajila kàà ku Butumbi nenùkàpetè bushuwa;
 Mu njila wa mâyi mmùdì Bukênkè leelu,
 Bajiika mu Dîna dya mushinga dya Yesu.
 Batekète ne bakole, nyingalalaayi ku
 mpekaatu wenu,
 Nyuma Mwîmpè neàbwelè cya bushuwa.
 Bwalu Makênkè a dilòlò àfikì,
 Mbulelela ne Nzambi ne Kilisto badi Umwe.
 (Kî mbasatu to; kadi Umwe!)

224 Alùkilaayi ku Mukenji! Alùkilaayi ku cibangidilu! Alùkilaayi ku cyàkalongeshà Pòlò! Alùkilaayi ku dibàtiiza dyàkabàtiizàye yèyè naadi adi! Yèyè wàkamòna bantu babàtiijiibwe mushindu mukwabo; kubàmbilayè bwa kulwa kubàtiijiibwabò cyàkàbìdì. Wàkamba ne: “Mwanjelo mulwe ùfuma mu Dyulu, mulongèshe cingà cintu nansha cinganyi, Yèyè èdiibwè mulawu.” Pa nanku, ndyalukila dya cyàkàbìdì ku Mukenji’s, mulundà wanyì! Dìbà dikaadi ku ibaamulòlò.

225 Kaa, mêmè ndi muMunangè bikolè be, kadi nwênù? Mbanganyi bàdì bàmòna lumingu lwà makumi mwandamutekète lwa Danyèlè mpindyewu, ne bàmòna cìdì lumingu lwà makumi mwandamutekète? Mbanganyi bàdì bàcìitabuuja? Ambàayi ne: “Amen.” [Disangisha didi dyamba ne: “Amen.”—Muf.] Amen! Butumbi bwikalè kùdì Nzambi!

226 Mpindyewu, cintu cìdì cilondà ncinyi? Bitampì Mwandamutekète mpindyewu. Netùbwelèmu buludì, piikalà Mukalenge mwa kwanyisha. Ndìbà kaayi dikalàci, ncyèna mumanye to. Anu dìbà kanà dyònsò dyàcìfilàYe adi, dìbà adi netùbwelèmu buludì. Dìbà adi netwènzè disangisha dile, dile menemene, bwalu nebyàngatè kuumukila ku nshapità mwi6 too ne ku wa 19, bwa kucijikija, bu mûndì nya naabi bitùulùbitùulù emu.

227 Mpindyewu, ncyèna muswe bwa muntu ùmukè mwikàle ùmvwa cyòci eci bibi to. Mukàbà wà mèyi wùcidi anu wùnyunguluka. Ncyèna muswè bwa muntu kuumvwayè bibi to. Mpindyewu kanùmvukù bibi to, nwamba ne: “Mwanèètù Branham wàm̀bì ne Yesu neàlwe mu cidimu cya 1977.” Mêmè ncyènakù mwambe cintu bu nanku nansha. Bìdì mwa kwenzeka ne Yesu àlwe leelu ewu. Kadi mêmè ndi mudyànjile kwamba ne pankaci pàà cidimu cya ’33 ne cya ’77 cintu kampànda ncifwànyine kwenzeka, ne bintu bìndì mumòne byènzeka, mu cikèènà-kumòna ebi, mbifwànyine kwenzeka. Ne bitaanu bya ku byòbì bikaadi byenzèke. Ne ndi ngeela meeji ne, ne bintu bya mushindà bitùdì naabi mpindyewu ebi. . .

228 Kadi nudi bamòne cìdì Mfumu wetù wa ditùnga ùfuma ku dyamba aci anyi? Ùkèba mikwabo mvità. Mmuswe kufidila cileejilu pa—pa Berlin, mwàm̀biye. Ùvwa muswe kufila cileejilu.

Kadi bishi bwa Cuba udi mumfundu mwetu ewu? Bwa cinyi kubenga kufidila cileejilu pa yêyè awu? Bishi bwa awu awu? Kaa, s'mmacimbu anu ètù a cya bushuwa aa! Nwamònu anyi?

²²⁹ Kaa, mwanètù, twètù's tukàadi anu ku ndekeelu. Bòbò's nebiikalè mwa... Nebilwe kujika anu mùdi Nzambi mwambe ne mmùvwàbi amu, pa nanku bìdi ne dikwàcisha kaayi—kaayi bwa kwenza ní ncinyi cyònsò pamutù pàa kubala anu cyanààna bìdiYe Yêyè mwambe, ne kwikala badìlongòlòle, ne kudìlongolola ku cyòci aci. Ne kuyilekela yilwa, dîbà adi. Tudi bayìndile.

Tudi bindile dilwa dya Ditùkù dya disànkà dya
 Bukalenge bwa bidimu cinunu adi,
 Dyàlwà Mukalenge wetù mubènesha bwa
 kwangata Mukaj'Èndè-musela udi mwindile;
 Kaa, buloba bùdi bütwa mikèmù, bwèla mbilà
 bwa ditùkù adi dya disùngidiibwa dya mu
 kalolo,
 Dyàlwà cyàkàbìdi Musùngidi wetù pa buloba.
 Kaa! Mukalenge wetù neàlwe cyàkàbìdi pa
 buloba,
 Eyowa, Mukalenge wetù neàlwe cyàkàbìdi pa
 buloba,
 Kaa, Sàtaanà neàswikiibwè bwa bidimu
 cinunu,
 Katwàkwikala ne muteecyanganyi dîbà adi
 nansha,
 Paanyimà pàa Yesu mumane kulwa cyàkàbìdi
 pa buloba.

Mbanganyi bàdi badìlongòlòle? Ela cianza muulu. Kaa, ekelekele!

Kaa! Mukalenge wetù neàlwe cyàkàbìdi pa
 buloba,

Tùjuukilàayi anu kuulu cyanààna tùlabulanganèku ku
 cianza muntu ne mukwèndè.

Mukalenge wetù neàlwe cyàkàbìdi pa buloba,
 Kaa, Sàtaanà neàswikiibwè bwa bidimu
 cinunu,
 Katwàkwikala ne muteecyanganyi dîbà adi
 nansha,
 Paanyima pàa Yesu mumane kulwa cyàkàbìdi
 pa buloba.

Kaa! Mukalenge wetù neàlwe cyàkàbìdi pa
 buloba.
 Eyowa, Mukalenge wetù neàlwe cyàkàbìdi pa
 buloba,

Kaa, Sàtaanà neàswikiibwè bwa bidimu
cinunu,
Katwàkwikala kabidi ne muteecyanganyi dîbà
adi nansha,
Paanyimà pàà Yesu mumane kulwa cyàkàbìdì
pa buloba.

Dilwa dya cyàkàbìdì dya Yesu nediikalè
dyandamuna ku tunyinyinganya ne myadi
ya buloba,
Bwalu dimanya dya Mukalenge nedyùlè pa
buloba, pa mbû ne mu dyulu;
Nzambi neùmushè mabèèdì ónsò ne binsònjì
bya ku màsaamà nebìkamè.
Paanyimà pàà Yesu mumane kulwa cyàkàbìdì
pa buloba.

Kaa! Mukalenge wetù neàlwe cyàkàbìdì pa
buloba,
Eyowa, Mukalenge wetù neàlwe cyàkàbìdì pa
buloba,
Kaa, Sàtaanà neàswikiibwè bwa bidimu
cinunu,
Katwàkwikala ne muteecyanganyi dîbà adi
nansha,
Paanyimà pàà Yesu mumane kulwa cyàkàbìdì
pa buloba.

²³⁰ Kaa, ekelekele! Kanwènaayikù nudyùmvwa bilenga anyi?
Anjì elààyibì meeji, nwènù balundà bàànyì, eci's mmpenta,
dikuukwila! Eci mmpenta. Tùtuutààyi bikàshi ne tùwìmbààyi.
Nwenu beena Mpenta, bantu bònsò, dilekèlèlaayaaku
mpindyewu, umùshaayi bintu bya kale bya kwisùkwisù bya ci-
Méthodiste abi mpindyewu. Tùyaayi, tùwìmbààyaaku!

Kaa! Mukalenge wetù neàlwe cyàkàbìdì pa
buloba,
Eyowa, Mukalenge wetù neàlwe cyàkàbìdì pa
buloba,
Sàtaanà neàswikiibwè bwa bidimu cinunu,
Katwàkwikala ne muteecyanganyi dîbà adi
nansha,
Paanyimà pàà Yesu mumane kulwa cyàkàbìdì
pa buloba.

Kaa! Mukalenge wetù neàlwe cyàkàbìdì pa
buloba, (Ki mùdì Bible wàmba!)
Eyowa, Mukalenge wetù neàlwe cyàkàbìdì pa
buloba,
Sàtaanà neàswikiibwè bwa bidimu cinunu,

Katwàkwikala ne muteecyanganyi dîbà adi
 nansha,
 Paanyimà pàà Yesu mumane kulwa cyàkàbidì
 pa buloba.

Nudi baMunangè anyì? Eyo. Mèmè ndi muMunangè. *Ndi MuMunangè*, Mwanèètù wa bakàji Gibbs. Kaa, twèlàayi anu byanza byetu muulu cyanàànà kùdìYe.

Ndi muMunangè, ndi muMunangè
 Bwalu Yèyè wàkannanga kumpàla
 Ne wàkampetela lupandu (Penyi? Pànwapa
 mene ku Kalvariyo.)
 Pa mucì wà Kalvariyo.

Ndi muMunangè, (Butùmbi's wè!) ndi
 muMunangè
 Bwalu Yèyè wàkannanga kumpàla
 Ne wàkampetela lupandu
 Pa mucì wà Kalvariyo.



LUMINGU LWÀ MAKÛMÌ MWANDAMUTEKÈTÈ LWÀ DANYÈLÈ LUA61-0806
(The Seventieth Week Of Daniel)

DILONDANGANA DYÀ MALONGESHA PA MBINGU MAKÛMÌ MWANDAMUTEKÈTÈ YÀ DANYÈLÈ
Diyiisha edi dya Mwaneetu William Marrion Branham dyakayiishiibwa bwa musangu wa kumpala mu Anglais mu dyàlumingu mu dinda, mu matùkù à6 a ngondo wa mwandamukùlù, cidimu cya 1961, mu Branham Tabernacle mu Jeffersonville, Indiana, U.S.A. Ndyumusha pa mukaba wa mêyì ne dituuta ku cyamu mu kaabujima kààdì mu Anglais. Nkudimwinu wa mu Ciluba ewu mmutuuta ku cyamu ne mwabanya kùdì Voice Of God Recordings.

CILUBA

©2021 VGR, ALL RIGHTS RESERVED

VOICE OF GOD RECORDINGS
P.O. Box 950, JEFFERSONVILLE, INDIANA 47131 U.S.A.
www.branham.org

Dîyi dya bwena-cintu

Makenji ônsò tudi badilaminyine. Mukanda ewu udi mwa kutuuciibwa pa mabeji ne cyamu cya kwebe kumbelu bwa mudimu webe wêwè anyi bwa kupeeshangana, kabiya bya mfranga to, bu cintu cya kutangalaja naaci Evanjeeliyo wa Yesu Kilisto. Mukanda ewu kawenaku mwa kusumbishiibwa, kuvudijiibwa bya bipitepite, kwediibwa mu cibànzà cya lùntàndalà, kulamiibwa mu cikàlwilà, kukudimunyiibwa mu myakulu mikwabo, anyi kulombesha naawu mpetu kakuyi mukanda wa cishimbi-dîyi wa dikwanyishila mukufundila kudi Voice Of God Recordings® nansha.

Bwa kumanya maalu makwabo anyi kupeta bîngà bintu bitudi naabi, anyisha webeje:

VOICE OF GOD RECORDINGS
P.O. Box 950, JEFFERSONVILLE, INDIANA 47131 U.S.A.
www.branham.org